

# Bungx Hnyouv Ziouv



**Zoc caux Porv Nyei Mienh:**

**Zeuz Yauzsing**

## Bungx Hnyouv Ziouv Nyei Porv Mengh Waac

Mbuo mouz laanh mienh buangh zuqc naanc zingh, kouv naanc, caux zuqc ging-borqc nyei sic nyei. Maiv gunv maaih deix ih zanc zuqc buangh jienv, maaih deix koqv hoqc buangh baac, maaih deix maiv lauh zuqc buangh. Mbuo buangh zuqc nyei se maiv fih hhangv, maiv dongh dangh buangh. Yopv 5:7 gorngv, “*Mv baac mienh cuotv seix zungv zuqc buangh kuonx naanh hhangv douz-fing ndaix faaux*”. Mbuo buangh nyei kouv naanc se camv jienv faaux hhangv. Hoqc bungx hnyouv Ziouv yiem mbuo buangh zuqc kuonx naanc nyei ziangh hoc za'gengh aqc. Mv baac se gorngv mbuo bieqc hnyouv taux Ziouv nyei fiem-fingx, bieqc hnyouv gorngv Tin-Hungh se cau-fim taux mbuo, Ninh goux caux gunv jienv nyungc-nyungc sic yiem mbuo nyei maengc nor mbuo gauh haih bungx hnyouv Ziouv yiem mbuo buangh zuqc nyei.

Maaih mienh buangh zuqc kuonx naanc ziouc naaic gaax, “*Tin-Hungh za'gengh gunv caux goux jienv nyungc-nyungc sic nyei fai?*” fai “*ye zuqc buangh nyei weic zuiz fai?*” Siensex liuz Yesu nyei mienh se maiv ndutv buangh zuqc sic nyei jauv weic mbuo corc yiem naaiv norm baamh gen nyei. Yie duqv longc 20 hnyangx nyei ziangh hoc mbuox mienh lunx mienh yiem wuic dorngh, mbuox jiu-baang mienh gorngv oix zuqc bungx hnyouv Ziouv, oix zuqc muangx Ninh nyei waac, mv baac gengh aqc duqv bungx hnyouv weic zuqc gorngv se heic nyei zoux ei gengh aqc. Tin-Hungh nyei lingc caux leiz se longx nyei bun mbuo, goux jienv mbuo, maiv gunv mbuo maiv bieqc hnyouv, fai haiz maiv oix muangx fai ei. Mbuo buangh zuqc nyei sic maaih nyungc baav za'gengh aqc duqv bun mbuo bungx hnyouv Ziouv, buangh jienv nyei ziangh hoc za'gengh hnamv maiv tong. Mbuo gauh haih bungx hnyouv Ziouv nyei waac se gorngv mbuo bieqc hnyouv Ziouv nyei waac caux hnyouv.

Maaih ziangh hoc mbuo buangh nyei sic, naanc zingh, kuonx naanc, hhangv yie mbuo nyei hmuangv doic buangh zuqc nor - yie nyei youz zuqc janx buonv mbai, liuz daic. Naaiv nyungc ziangh hoc gauh horpc zuqc bungx hnyouv Ziouv yaac gauh qiemx zuqc bungx hnyouv Ziouv. Yie mbuo ganh nyei hmuangv doic duqv buangh zuqc nyei njaaux taux yiem mbuo hhangv Baulo gorngv yiem Lomaa 8:35-39 “*Giduc hnamv mbuo. Maaih haaix nyungc haih zoux bun mbuo nqaev duqv ndutv? Naanc zingh fai? Kuonx hnyouv nyei sic fai? Zuqc mienh zoux doqc fai? Ngorc hnaangx fai? Laaix jomc maiv maaih lui-houx zuqv fai? Haih hoic maengc nyei sic fai? Zuqc daix daic fai?* 36 *Hhangv Ging-Sou fiev jienv gorngv, “Weic meih yie mbuo ziangh hnoi zuqc mienh daix jienv yiem. Mienh funx yie mbuo hhangv benx oix zuqc daix nyei ba'gi yungh nor.”* 37 *Yiem naaiv deix yietc zungv nzaic zingh, Giduc, dongh hnamv mbuo wuov dauh, bun mbuo hingh jiex nzengc.* 38 *Yie siensex dingc Tin-Hungh hnamv mbuo yaac maiv maaih haaix nyungc haih nqaev ndutv bun ninh maiv hnamv, maiv gunv ziangh fai daic, fin-mienh fai mienv, haaix nyungc maaih lingc maaih qaqv nyei, ih zanc cuotv daaih nyei sic fai nqa'haav hingv nyei sic,* 39 *yiem gu'nguaaic lungh fai ga'ndiev ndau nyei, fai haaix nyungc zeix daaih nyei maanc muotc. Tin-Hungh longc mbuo nyei Ziouv, Giduc Yesu, biux mengh ninh hnamv mbuo, yaac maiv maaih haaix nyungc haih nqaev ndutv bun Tin-Hungh maiv hnamv.”* Mbuo haih bungx duqv hnyouv Ziouv weic Ninh za'gengh hnamv haic mbuo, maiv gunv mbuo buangh nyei haaix nyungc gunv bungx hnyouv mbuo nyei Ziouv Yesu. Tov Tin-Hungh bun mbuo maaih siensex fim maaih qaqv bungx hnyouv Ninh.

**Bungx Hnyouv Ziouv Nyei Ginc/Contents:**

1. **Da'yietv Ginc: Yie Haih Bungx Hnyouv Tin-Hungh Nyei Fai?**
2. **Da'nyeic Ginc: Bungx Hnyouv Ziouv Nyei Za'eix**
3. **Da'faam Ginc: Bungx Hnyouv Ziouv Nyei Goux**
4. **Da'feix Ginc: Bungx Hnyouv Ziouv Nyei Qaqv**
5. **Da'hmz Ginc: Bungx Hnyouv Ziouv Nyei Cong-mengh**
6. **Da'luoqc Ginc: Bungx Hnyouv Ziouv Nyei Hnamv**
7. **Da'cietv Ginc: Bungx Hnyouv Ziouv Weic Ninh Zeix Mbuo Daaih**
8. **Da'betv Ginc: Bungx Hnyouv Ziouv Yiem Kouv Naanc**
9. **Da'juov Ginc: Bungx Hnyouv Ziouv Yiem Naanc Zingh Nyei Gu'nyuoz**
10. **Da'ziepc Ginc: Bungx Hnyouv Caux Laengz Zingh Ziouv Yiem Maanc Sic**

Maaiah Zunh Doz Qiex, Fangx Naangh, Fangx Linh, Fiev Nyei Sou, Mienh Yesu Nzung yiem:

**[www.yauzsing.wordpress.com](http://www.yauzsing.wordpress.com)**



**Hoqc Bungx Hnyouv Ziouv (Da'yietv Ginc):**  
**Yie Haih Bungx Hnyouv Tin-Hungh Nyei Fai?**

**Ging-sou: Naanc Zingh Nzung 3:37-38**

**Gorngv Jiex Gorn Nyei Waac:**

Maiv bungx hnyouv Tin-Hungh se mangc maiv jiez Ninh, mangc maiv jiez ninh gorngv nyei waac caux zoux jiex daaih nyei sic. Maiv bungx hnyouv se cai gorngv Tin-Hungh maiv gunv caux goux jienv nyungc-nyungc. Maiv bungx hnyouv Tin-Hungh se cai Ninh gengh longx haic bun mbuo. Ei Tin-Hungh mangc, maiv bungx hnyouv Ninh nyei mienh se maiv muangx waac nyei mienh. I^saa^laa^en mienh hnyouv sie nyei ziangh hoc "*ninh mbuo gorngv doqc Tin-Hungh ziouc gorngv, 'Yiem naaiv deic-bung-huaang Tin-Hungh haih bun nyanc hopv fai?'*"

<sup>20</sup> *Ninh mborqv la'bieiv-zorng bun wuom baetv cuotv, wuom liouc mingh benx ndoqv buangv mienz nzengc. Ninh aengx haih ceix laangh ziqc fai lorz orv juang ninh nyei baeqc fingx fai?*

<sup>21</sup> *Ziouv muangx haiz ninh mbuo nyei waac ziouc qiex jiez haic. Ninh longc douz buov Yaakopv nyei zeiv-fun. Ninh yietc zei gauh fatv qiex jiez I^saa^laa^en Mienh,* <sup>22</sup> *weic zuqc ninh mbuo maiv sienx Tin-Hungh yaac maiv kaux ninh nyei njoux en" (Singx Nzung 78:19-22).*

Mbuo haih bungx hnyouv Tin-Hungh se gorngv mbuo haih mangc mbuo buangh nyei sic tong Ninh nyei m'zing fai Ninh nyei waac. Yaac yiem sienx fim. Hnangv mbuo sienx Ninh mbuo sienx gorngv mbuo duqv njoux weic mbuo sienx kuv fienx (Lomaa 10:17). **Weic naaiv mbuo haih bungx hnyouv Ziouv, haih maaih sienx fiem yiem mbuo buangh zuqc nyei nyungc-nyungc weic Ging-sou gorngv nyei waac. Kungx yiem Ging-sou hnangv bun mbuo haih buac fai hnamv duqv tong yiem mbuo buangh zuqc nyei sic. Weic Singx Lingh dorh mbuo ei Ging-sou, dorh Ging-sou nyei waac daaih orn mbuo buangh zuqc nyei bun mbuo haih bungx hnyouv yiem nyungc-nyungc sic.**

**Gorngv muonc caux mengh Ging-sou:**

**A. Mbuo buangh zuqc nyungc-nyungc sic, lengc jeiv waaic nyei sic. Ging-sou gorngv:**

1. Mbuo oix zuqc sienx zien leiz cingx bun mbuo haih bungx hnyouv Tin-Hungh yiem kuonx naanc nyei ziangh hoc.
2. Sienx gorngv Tin-Hungh se goux caux gunv nyungc-nyungc Ninh zeix daaih nyei
3. Sienx gorngv Tin-Hungh hiuv nyungc-nyungc
4. Sienx gorngv Tin-Hungh nyei hnamv se dunh yunh
5. Weic Tin-Hungh hnamv mbuo, Ninh kungx oix bun longx nyei mbuo hnangv. Weic Ninh hiuv nyungc-nyungc, Ninh hiuv duqv haaix nyungc longx nyei bun mbuo. Weic Ninh goux jienv gunv jienv nyungc-nyungc, Ninh maaih qaqv caux hatc maaz haih zoux nyungc-nyungc.
6. Maiv gunv waaic sic cuotv daaih Tin-Hungh core goux jienv mbuo nyei (Naanc Zingh Nzung 3:37-38; Yo^han 19:10-11; Matv^tai 26:39; I^saa^yaa 38:17).

**B. Mbuo oix zuqc zieqv duqv gorngv Tin-Hungh nyei eix se gauh hlo, gauh ndo mbuo haih bieqc hnyouv nyei.**

1. Mbuo oix zuqc hoqc bungx hnyouv maiv gunv maiv bieqc hnyouv (weic mbuo maiv hiuv duqv hoz nqaang nyei sic).

2. Tin-Hungh nyei waac yiem Ging-sou se gaux bun mbuo, gaux tengx mbuo yiem mbuo hnoi-hnoi buangh zuqc nyei sic. Maiv gunv faix-fiuv, fai domh sic, camx baav fai lauh nyei sic, mbuo oix zuqc hoqc bungx hnyouv Ziouv se gorngv mbuo oix bun Ninh nyei mbuox duqv njang-laangc.
3. Ndange mbuo haih bungx hnyouv Ziouv mbuo oix zuqc maaih jiu tong hhangv Ndaa^witv hungh gorngv nor, "*O Ziouv aac, nyiemc meih nyei mbuox wuov deix oix kaux meih, weic zuqc meih maiv guangc lorz meih wuov deix mienh*" (Singx Nzung 9:10). Hiuv duqv Ziouv nyei mbuox nyei mienh se hiuv maaih jiu tong, maiv dan hiuv taux. Mbuo sienx Ninh nyei mienh caux ninh gorngv waac daux gaux, muangx ninh nyei waac weic doqc Ging-sou ziouc haih bungx hnyouv Ziouv, haih bungx hnyouv Ninh gorngv nyei waac

### C. Tin-Hungh za'gengh goux jienv gunv jienv nyungc-nyungc fai?

1. Mouz doic, mouz laanh mienh oix hiuv duqv gorngv Tin-Hungh za'gengh gunv fai goux jienv nyungc-nyungc nyei fai? Nyungc-nyungc yiem mbuo nyei maengc nyei fai? Weic maaih sienx Tin-Hungh mienh camv gorngv taux ninh mbuo buangh nyei naanc zingh, kouv naanc, caux kuonx naanc. Se gorngv Tin-Hungh gunv jienv nor, naaic se ca'bouc cuotv fai la'guaih cuotv fai? Baengc, diev kouv nyei jauv, nzauh nyei sic zoux bun mienh naaic Tin-Hungh, "Meih gengh goux jienv yie mbuo nyei fai? Meih cau fiem taux yie mbuo nyei fai?"
2. Se gorngv Tin-Hungh maaih qaqv maaih hatc maaz goux jienv yaac hnamv mbuo, weic haaix nyungc mbuo zuqc buangh zuqc naaiv buangh zuqc wuov...mienh maaih camv gor buangh zuqc...zuqc diev, zuqc hoic, zuqc kouv naanc, zuqc mun. Se gorngv Tin-Hungh haih nor yoc maiv tengx, fai oix tengx nyei mv baac maiv haih fai?
3. **Tin-Hungh goux jienv fai liuc leiz nyungc-nyungc:** Tin-Hungh maaih qaqv ninh yaac oix tengx nyei weic Ninh gengh longx haic. Janx nyei waac heuc "*Providence of God*" fai Tin-Hungh liuc leic goux mbuo nyei maengc. Maiv gunv buangh longx fai waaic Ninh goux jienv mbuo nyei. Buangc longx se hungh heic buatc nyei mv baac buangh waaic se gauh aqc duqv buatc Tin-Hungh nyei buoz. Tin-Hungh goux jienv ninh zeix daaih nyei nyungc-nyungc, norm-norm ziangh hoc nyei.
4. **Tin-Hungh zanc-zanc goux jienv Ninh zeix nyei nyungc-nyungc, yaac gunv jienv nyungc-nyungc weic Ninh nyei mbuox haih duqv njang-laangc, weic oix bun Ninh nyei naamh nyouz duqv longx. Maiv maaih haaix nyungc cuotv daaih Ninh maiv hiuv fai cau-fim.**

### D. Mbuo haih bungx hnyouv Tin-Hungh nyei fai?

1. Tin-Hungh haih zanc-zanc goux jienv mbuo nyei fai? Tin-Hungh cau-fim taux mbuo nyei fai? Mbuo buatc mengh nyei gorngv Tin-Hungh zanc-zanc goux jienv mbuo, mbuo ziouc haih bungx hnyouv Ninh. Ninh zanc-zanc liuc leiz jienv mbuo.
2. Tin-Hungh maiv dan zeix mbuo daaih hhangv ninh, Ninh nyei dorn Yesu "*sustain*" fai bouh jienv mbuo. "*Naaiv dauh Dorn Tin-Hungh longc zeix maanc muotc yaac paaiv ninh nzipc maanc muotc benx ninh nyei jaa-dingh.*"<sup>3</sup>Ninh aengv Tin-Hungh nyei njang-laangc, yaac zuangv nzengc Tin-Hungh, aengx longc ninh

maaih lingc nyei waac **bouh jienv maanc muotc**. Ninh nzaaux liuz baamh mienh nyei zuiz, nqa'haav yiem tin-dorngh zueiz jienv maaih haangh daauh nyei Tin-Hungh nyei mbiaauc maengx" (Hipv^lu 1:2-3). Yiem Ko^lo^si 1:17 gorngv, "Yesu yiem ndaangc maanc muotc. Yietc zungv yaac bangc ninh maaih yietc nyeic."

3. Nyungc-nyungc maaih yietv maaih nyeic weic Yesu Giduc, maiv maaih haaix nyungc ganh haih cuotv daaih; nyungc-nyungc maaih gorn ... zeix daaih nyei nyungc-nyungc zueih yietv zueih nyeic nyei yiem ... hlaax, hleix, lungx qieix. I^saa^yaa 40:26 gorngv, "maiv maaih yietc norm hleix dingx laih"; Naa^Haa^mi 9:6 yaac mbuox mbuo, "Tin-Hungh bun nyungc-nyungc maaih maengc"; Singx Nzung 147:8-9 zungv gorngv, "Ninh goux lomc zangc nyei saengh kuv"; Gongzoh 17:25-28 yaac orn mbuo, "Ninh bun mbuo maaih maengc ziangh". 2 Ko^lin^to 9:10 duqv gorngv, "Ninh bun mbuo maaih nyanc hopv"; Singx Nzung 31:15 yaac mbuox mbuo gorngv, "mbuo nyei ziangh hoc se yiem Ninh". Diemv-diemv qieix mbuo tauv se gorngv mengh Ninh nyei En caux hnamv, hnoi-hnoi mbuo haih ziangh se weic Ninh nyei en hnavg. Ninh zanc-zanc goux jienv mbuo.
4. Mbuo haih bungx hnyouv Tin-Hungh. Se gorngv mbuo haih hoqc mangc buate nyungc-nyungc yiem Ziouv nyei buoz zoux cuotv daaih yiem norm-norm ziangh hoc.
5. Tin-Hungh goux jienv nyungc-nyungc. Maiv maaih yietc nyungc ca'bouc fai la'guaih cuotv daaih. Maiv maaih haaix nyungc cuotv daaih dongh ninh maiv hiuv fai maiv ei ninh nyei za'eix.
6. Maaih mienh cai Tin-Hungh weic ninh mbuo maiv bieqc hnyouv Tin-Hungh zoux nyei, weic Tin-Hungh zoux nyei maiv zeix ei mienh hnamv nyei.
7. Weic haaix nyungc mbuo buangh zuqc sic? Zien nyei, Tin-Hungh hnamv mbuo, Ninh yaac maaih qaqv haih tengx nyei. Nyungc baav nyei mun maiv gunv Ninh gunv jienv nyei, mv baac mbuo zuqc buangh. Ninh nyei en gaux bun mbuo haih diev duqv, bun mbuo gauh haih bungx hnyouv Ninh. Weic sienx Yesu Giduc duqv buangh nyei sic caux maiv sienx nyei mienh dau maiv fih hnavg. Sienx nyei mienh maaih lamh kaux yiem Yesu, bungx hnyouv maiv goiv yieuc wuov dau Ziouv, haih bungx hnyouv dongh hiuv duqv hoz ngang wuov dau Ziouv, mbuo buangh nyei weic bun Ninh nyei mbuox haih duqv njang-laangc, yaac weic bun mbuo duqv longx nyei.

### **Hoqc Bungx Hnyouv Ziouv (Da'nyeic Ginc):** **Bungx Hnyouv Ziouv Nyei Za'eix**

**Ging-sou yiem: Singx Nzung 33:10-11** "Ziouv bun zuangx fingx caangh laangh nyei jauv maiv lamh longc, ninh bun maanc fingx nyei za'eix zoux maiv cuotv haaix nyungc. 11 Ziouv caangh laangh nyei waac yietc liuz yiem, ninh yiem hnyouv hnamv cuotv nyei za'eix yiem tauv maanc gouv maanc doic."

### Gorngv jiex gorn waac:

Mbuo maiv hiuv duqv weic haaix nyungc sic cuotv dongh ninh mbuo cuotv nyei ziangh hoc. Yietc nyungc mbuo hiuv nyei se, maiv gunv mbuo zipv fai maiv zipv, ei Tin-Hungh nyei za'eix fai maiv ei, mbuo maiv haih zoux cuotv haaix nyungc cuotv liuz Ninh nyei za'eix. Yaagorpc mengh nyei gorngv, "*Gorngv naaiv deix waac nyei mienh muangx yie maah! Meih mbuo gorngv, 'Th hnoi fai njang hnoi yie mbuo oix mingh naaiv norm zingh fai wuov norm zingh, yiem wuov zoux yietc hnyangx nyei saeng-eix duqv leic.'* Mv baac meih mbuo liemh maiv hiuv duqv njang hnoi meih mbuo nyei maengc oix hnavg haaix nor. Meih mbuo se hnavg diqv dien mouc nor, cuotv dangh hnavg aengx mitc mi'aqv. Meih mbuo horpc zuqc gorngv, '*Se gorngv Ziouv nyei za'eix, yie mbuo haih ziangh jienv zoux naaiv nyungc, zoux wuov nyungc.*'" (Yaagorpc 4:13-15; Cong-Mengh Waac 27:1-14).

### Gorngv Mengh Ging-Sou:

#### A. Tin-Hungh gunv/goux jienv nyungc-nyungc:

1. Gunv nyei eix-leiz se, janx nyei waac gorngv "God is in control". Ninh gunv jienv nyungc-nyungc nyei. Ninh zoux ei Ninh ganh nyei za'eix, naaiv se Ninh nyei fiem-fingx. Maiv maaih haaix nyungc dongh Ninh zeix daaih nyei haih zoux haaix nyungc, cuotv liuz Ninh nqoi hnyouv.
2. Mbuo duqv juangc jienv hoqc jiex daaih gorngv dongh mbuo buangh zuqc sic fai kuonx naanc nyei ziangh hoc mbuo oix zuqc bungx hnyouv Ziouv, weic Ninh hnamv mbuo, weic Ninh goux jienv mbuo, yaac hiuv nyungc-nyungc mbuo haih bungx hnyouv Ninh.
3. Goux fai beu nyei eix-leiz, se gorngv maaih yietc nyungc cuotv daaih yiem naaiv lungn ndiev dongh Tin-Hungh maiv goux, maiv hiuv duqv, maiv haih tengx nor wuov nyungc mbuo hnavg haaix nor haih bungx hnyouv Ninh? Se gorngv meih bun nyungc jaaix nyei ga'naaiv yie tengx meih goux, meih hiuv duqv yie hnamv meih nyei, meih hiuv duqv yie ziepc zuoqv nyei, mv baac se gorngv yie maiv maaih qaqv fai hatc maaz tengx meih goux meih nyei ga'naaiv nor, meih fungc bungx hnyouv yie tengx meih goux meih nyei ga'naaiv jaaix. Baulo mengh nyei gorngv Tin-Hungh haih goux nyei. Yiem 2 Ti<sup>mo</sup> tai 1:12 gorngv, "*Weic naaiv kuv fieng yie ih zanc hnavg naaiv nor siouc kouv. Mv baac yie maiv nyaiv, weic zuqc hiuv duqv yie sienx nyei se haaix dauh yaac hiuv dingc yie jiu bun ninh nyei, ninh haih beu jienv taux siemv zuiz wuov norm hnoi.*"
4. Tin-Hungh zanc-zanc goux, fai liuc leiz, Ninh zeix daaih nyei nyungc-nyungc. Ninh zanc-zanc gunv jienv Ninh goux nyei weic bun Ninh nyei mbuox duqv njang-laangc yaac weic bun sienx Ninh nyei mienh duqv longx.
5. Maaih haaix nyungc cuotv daaih dongh Tin-Hungh maiv nqoi nzuih nyei fai? Nyungc-nyungc cuotv daaih ei Ninh nyei za'eix (Cong-mengh 16:9; 19:21; 21:30; Gorngv seix zangc 7:13; Naanc Zingh Nzung 3:37; Yagorpc 4:15; Laauc Yaangh 3:7). Maiv gunv mbuo haih mbenc, mv baac haih cuotv se weic Tin-Hungh. Maiv maaih haaix nyungc cuotv Ninh maiv hiuv. Maiv gunv mbuo maiv bieqc hnyouv, m'zing mangc maiv buatc. Maiv gunv buatc waaic nyei sic cuotv mv baac weic mbuo mangc maiv buatc wuov ndangc hingv (Lomaa 8:28 "*Mbuo hiuv duqv Tin-Hungh bun hnamv ninh, dongh ei ninh nyei za'eix heuc daaih wuov deix, yiem maanc sic duqv longx*").

6. Maiv gunv maaih waaic sic cuotv, maiv gunv mienh hoic, baengc, fai kuonx naanc, nyungc-nyungc Ziouv hiuv duqv nyei. Ziouv ninh nyei buoz zoux gong yiem mbuo nyei nza'hmien nyei, maiv gunv nzunc baav aqc duqv buatc cing. Hnangv Baulo gorngv nor za'gengh duqv longx nyei. Longx nyei Ziouv maiv haih bun waaic sic meih mv baac maaih waaic nyei mienh haih zoux hoic meih (Gong-zoh 24:27). Ninh hiuv duqv meih buangh nyei sic nyei, maiv maaih haaix nyungc dongh Ninh maiv hiuv. Mbuo yiem Ziouv nyei buoz-ndiev, Ninh goux jienv mbuo, beu jienv mbuo (Ye^li^mi 32:41).

## B. Tin-Hungh nyei qaqv:

1. Mbuo buangh zuqc sic nyei ziangh hoc, aqc duqv bun mbuo buatc Tin-Hungh nyei qaqv fai gorngv Ninh gunv/goux jienv mbuo buangh zuqc nyei. Mbuo buatc mienh waaic mienh zoux hoic mbuo, mbuo buatc mienh zoux dorngc nyei daaih guoqv zuqc mbuo, mbuo zoux nyei hoic zuqc mbuo, maaih ziangh hoc mbuo hnamv, Tin-Hungh za'gengh maaih qaqv goux nyungc-nyungc nyei fai? Buatc mborqv jaax, buatc ndau dongx, buatc wuom yiemx, buatc nziaux-zunc, buatc mienh daic camv, za'gengh aqc bun mbuo buatc Tin-Hungh nyei qaqv zoux gong yiem naaiv deix sic. Mienh hnyouv ngaengc doix-dekc Tin-Hungh. Mbuo hnamv, "naaiv hnangv haaix nor haih zeix Tin-Hungh nyei eix?" Mbuo sienx gorngv Tin-Hungh haih zoux mbuoqc horngh nyei sic yiem mienh nyei maengc nyei mv baac yie hnangv haaix nor haih mangc duqv buatc? Jiex daaih maiv lauh, mbuo buatc maaih nziaux-zunc buonc deic-bung waaic camv...mv baac mbuo yaac buatc Tin-Hungh goux jienv yietc buonc mienh. Doix jienv nziaux-zunc buonc wuov muonz, ninh nyei auv zuqc mingh ndie-sai nyei biau vungz gu'nquaz. Nzuonx daaih buatc ziangh norm biau v buonc njang nzengc. Se gorngv mbuo mangc nor mbuo buatc Tin-Hungh nyei buoz zoux nyei gong nyei.
2. Maiv gunv maaih ziangh hoc mbuo mangc maiv buatc Tin-Hungh nyei buoz zoux nyei gong mv baac Ninh zanc-zanc zoux gong nyei. Ninh maiv dangv nyungc baav mbuo buangh nyei - maiv zeix Ninh maiv haih mv baac weic bun Ninh nyei mbuox haih duqv njang-laangc. Mbuo buangh zuqc nyei mbuo hiuv duqv maaih ziox nyungc Tin-Hungh dangv jienv bun mbuo maiv buangh zuqc mbuo zungv maiv hiuv (Singx Nzung 121:3-4). Mbuo doqc taux E^se^te wuov buonv sou mbuo buatc cing nyei gorngv Tin-Hungh goux jienv Ninh nyei mienh. Maiv gunv yiem naaic buonv sou maiv gorngv yietc nzunc taux Tin-Hungh nyei mbuox, mv baac doqc nyei mienh haih buatc cing gorngv Tin-Hungh beu jienv gunv jienv Ninh nyei mienh nyei. Maiv daan Ninh goux hnangv Ninh longc mienh, longc cuotv nyei sic weic bun Ninh nyei mbuox duqv njang-laangc. Tin-Hungh maiv daan njoux Ninh nyei mienh mv baac bun Ninh nyei mienh duqv hingh.
3. Tin-Hungh bun cuotv daaih yiem mbuo nyei maengc, yiem ga'hlen nyei jauv nyungc-nyungc weic bun mbuo duqv longx. Se gorngv mbuo hiuv duqv Ninh, hiuv Ninh hnamv mbuo, hiuv Ninh goux jienv mbuo (Lomaa 8:28). Nyungc-nyungc cuotv daaih yiem mbuo nyei maengc se maiv zeix ca'bouc mv baac ei Ziouv nyei eix. Weic naaiv mbuo yiem maanc sic oix zuqc laengz zingh Ninh (1 Te^saa^lo^ni^gaa 5:18).



### C. Tin-Hungh zoux ei Ninh ganh nyei eix:

1. Mbuo hngangv haaix nor haih yiem maanc sic laengz zingh Tin-Hungh se gorngv cuotv daaih nyei nyungc-nyungc sic maiv zeix weic bun mbuo duqv longx? Tin-Hungh zoux nyungc-nyungc ei Ninh ganh nyei za'eix, horpc Ninh nyei hnyouv. Maiv maaih haaix dauh haih goiv fai dangv Ninh nyei eix. Naaiv za'gengh aqc duqv bieqc hnyouv nyei eix-leiz yaac aqc duqv zipv nyei. Weic naaiv mbuo jiex gorn doqc naaiv deix Ging-sou (Yopv 42:2 "Yie hiuv duqv maanc sic meih haih zoux nyei, meih nyei za'eix maiv maaih haaix nyungc haih dangv duqv jienv."); Singx Nzung 115:3 "Yie mbuo nyei Tin-Hungh yiem gu'nguaaic lungh, ziux ninh buate horpc nyei ninh ziouc zoux."; I<sup>^</sup>saa<sup>^</sup>yaa 14:27 "Nernh Jiex nyei Ziouv dingc hngangv naaiv zoux, haaix dauh haih dangv jienv maiv bun zoux? Ninh nyei buoz sung cuotv daaih, maaih haaix dauh haih bun ninh hluotv nzuonx?"; I<sup>^</sup>saa<sup>^</sup>yaa 43:13 "Yiem loz! hnoi daaih yie m'daaih yietc liuz zoux Tin-Hungh. Maiv maaih haaix dauh haih njoux mienh biaux ndutv yie nyei buoz. Yie zoux nyei haaix nyungc, maiv maaih haaix dauh haih goiv yienc."; I<sup>^</sup>saa<sup>^</sup>yaa 46:10 "Yiem dongh cor wuov yie gorngv setv mueiz oix cuotv daaih nyei sic, yaac yiem loz-hnoi gorngv maiv gaengh duqv zoux nyei sic. Yie nyei za'eix liepc dingc mi'aqv. Da'faanh yie a'hneiv zoux nyei yie zungv oix zoux ziangx."; Ndaa<sup>^</sup>ni<sup>^</sup>en 4:35 "Lungh ndiev maanc mienh ninh maiv funx maaih jaax-zinh. Yiem lungh maaih qaqv nyei ga'naaiv caux yiem lungh ndiev nyei baamh mienh mbu'ndongx, ninh sueih ninh ganh nyei eix zoux. Maiv maaih haaix dauh haih laanh ninh nyei buoz, fai naaic ninh, "Meih zoux haaix nyungc laeh?"; E<sup>^</sup>fe<sup>^</sup>so 1:11 "Yietc zungv sic cuotv daaih ei Tin-Hungh nyei za'eix yaac ei ninh dingc ziangx. Tin-Hungh weic ninh ganh nyei za'eix ginv mbuo, bun mbuo caux Giduc juangc maengc ziangh, benx ninh nyei mienh. Ninh hngangv naaiv zoux se ei ninh jaa-ndaangc dingc ziangx zoux."
2. Maiv maaih haaix dauh haih dangv Ziouv nyei eix, maiv maaih haaix dauh haih yienc. Nyungc-nyungc ei Ninh ganh nyei za'eix. Naaiv se Tin-Hungh nyei fiem-fingx weic zuqc Ninh se Tin-Hungh. Hiuv duqv naaiv horpc zuqc bun mbuo sin zinx jienv yiem Ninh nyei nza'hmien, mv baac weic Ninh nyei hnamv, Ninh cau-fim taux Ninh zeix daaih nyei mienh.
3. Tin-Hungh maaih mouz deic bun laanh laanh mienh. Ninh yaac maaih qaqv caux hatc maaz haih tengx mbuo zoux duqv Ninh liuc leiz nyei mouz deic. Se gorngv mbuo hiuv maiv maaih haaix nyungc haih hoic mbuo dongh mbuo nyei Ziouv maiv hiuv nor, Ninh maaih Ninh nyei mouz deic. Ninh maaih nyei mouz deic bun yietc laanh yietc laanh se maiv fih hngangv (E<sup>^</sup>fe<sup>^</sup>so 2:10). Ninh oix Ninh nyei mouz deic cuotv daaih yiem mbuo nyei maengc, weic Ninh goux jienv gunv jienv...bun cuotv nyei sic yiem maengc weic setv mueiz haih cuotv daaih ei jienv Ninh nyei za'eix.
4. Gorngv taux Tin-Hungh gunv caux goux jienv nyungc-nyungc nyei se aqc bun mbuo haih bieqc hnyouv fai mangc duqv buate cing, weic zuqc nzunc baav mbuo buangh zuqc nyei mbuo mangc maiv tong. Mbuo buate cuotv daaih nyei sic, buate hoic nyei, buate mun nyei...mv baac se gorngv haih mingh wuov ndange liuz mangc nzuonx nor mbuo mv baac haih hngangv Yo<sup>^</sup>sepv dongh ninh zuqc ninh gorz mbuo zoux hoic, zuqc mienh zorqv wuonx, mv baac Tin-Hungh zanc-zanc caux ninh yiem, Ninh ziouc haih gorngv mbuo ninh nyei gorz mbuo,

"Hnangv naaiv se maiv zeiz gorx mbuo bun yie daaih naaiv. Se Tin-Hungh ganh paaiv yie daaih. Ninh bun yie hnangv Faalo Hungh nyei die, zoux ninh nyei biauv zong nyei ziouv, yaac gunv nzengc P'yipv Deic-Bung" (Tin deic douh 45:8).

5. Deix baav yiem mbuo nyei maengc, yiem naaiv gitv lungv ndiev mbuo maiv duqv buate fai hiuv cing Tin-Hungh hnangv haaix nor zoux gong yiem mbuo nyei maengc hnangv Yo^sepv duqv buate nor, mv baac Tin-Hungh zoux nyei gong yiem mbuo nyei maengc se longx haic. Weic zuqc Ging-sou gorngv, "Loz-hnoi fiev jienv Ging-Sou nyei yietc zungv waac se fiev daaih njaaux mbuo, weic bun mbuo maaih noic diev yaac kuinx mbuo, mbuo cingx daaih maaih lamh hnamv dorngx" (Lomaa 15:4). Mbuo duqv doqc taux E^se^te fai Yo^sepv nyei maengc se weic bun mbuo haih gauh bieqc hnyouv Tin-Hungh zoux nyei gong yiem maengc.
6. Hnangv Tin-Hungh gorngv yiem Ye^li^mi 29:11 "Ziouv gorngv, 'Yie hiuv duqv yie weic meih mbuo maaih nyei za'eix, se weic bun meih mbuo duqv longx maiv zeiz duqv ciouv, weic bun meih mbuo maaih hoz nqaang yaac maaih lamh hnamv dorngx.'" Naaiv deix waac se gorngv Yu^ndaa nyei fingx dongh ninh mbuo zuqc zorqv mingh zoux bou nyei ziangh hoc. Mv baac maaih eix-leiz cing nyei yaac buangv nzengc yiem Ziouv nyei waac. **Tin-Hungh weic mbuo maaih za'eix fai mouz deic nyei. Weic maiv maaih mienh haih dangv Ziouv nyei eix, mbuo haih bungx hnyouv Ziouv nyei.**

#### Dorh Ging-sou nyei eix-leiz daaih longc:

1. Ei mbuo mangc buate nyei, mbuo buate mbuo nyei maengc buangc yietc nyungc hoic jiex yietc nyungc. Mv baac mbuo nyei Ziouv hiuv duqv nyungc-nyungc; nyungc-nyungc cuotv daaih yaac ei jienv Ninh nyei za'eix.
2. Mbuo nyei maengc maaih camv nyei mbuo gorngv, "se gorngv...feix duqv..." mv baac Tin-Hungh maiv zoux dorngc, maiv maaih yietc nyungc ca'bouc. Hnangv Singx Nzung 18:30 gorngv nor, "Naaiv dauh Tin-Hungh, ninh nyei doz dunh yunh nyei. Ziouv laengz nyei waac, buate za'gengh zien nyei. Ninh zoux torngv-baaih weic yietc zungv ndaauh kaux ninh nyei mienh."
3. Hnangv mbuo buate yiem E^se^te wuov buonc sou, Tin-Hungh goux jienv Ninh nyei mienh. Hnangv Yo^sepv nyei maengc Tin-Hungh goux jienv nor: ei baamh mienh mangc buate ninh buangh camv, mv baac Yo^sepv ganh zieqv duqv Tin-Hungh gunv jienv nyungc-nyungc, nyungc-nyungc ei Ziouv nyei za'eix cuotv. Lu^te nyei maengc yaac fih hnangv (Lu^te 2:1-10): ei baamh mienh nyei m'zing mangc se buate kouv naanc, mv baac Tin-Hungh ganh maaih Ninh nyei dunh yunh za'eix bun Lu^te nyei maengc duqv bieqc Tin-Hungh nyei douh zong.
4. Maiv gunv buangh longx fai ciouv mbuo hiuv duqv Ziouv goux jienv mbuo nyei (Gorngv seix zangc 7:14; I^saa^yaa 45:7; Naanc zingh nzung 3:38).
5. Mbuo oix zuqc hoqc bungx hnyouv Ziouv, yietc nzunc yietc nzunc nyei ginv muangx Ninh, ginv ei Ninh, ginv bungx hnyouv Ninh. Ginv bungx hnyouv se eix...nzunc baav haaix hnangv jang maiv haih nor mv baac mbuo haih ginv bungx hnyouv weic Ziouv nyei waac dongh zien leiz. Mbuo oix zuqc sienx gorngv longx nyei Tin-Hungh kungx oix

longx nyei bun Ninh nyei naamh nyouz hhangv. Mbuo buangh zuqc nyei maiv gunv haaix nyungc se longx nyei bun mbuo.

6. Buangh zuqc kouv nyei ziangh hoc oix zuqc ginv zoux nyei bun Ziouv nyei mbuox haih duqv njang-laangc, ginv bungx hnyouv Ninh. Maiv dungx ginv gorngv "maengc naaiv maengc wuov"...Tin-Hungh laengz jienv gorngv maiv gunv mbuo buangh zuqc haaix nyungc Ninh nyei en gaux bun mbuo (2 Ko<sup>^</sup>lin<sup>^</sup>to 12:9 "*Mv baac Ziouv dau yie, 'Meih duqv yie nyei en ziouc gaux aqv. Weic zuqc meih mau nyei ziangh hoc yie nyei qaqv se gauh henv jiex.' Hhangv naaiv, yie a'hneiv bungx waac-maux gorngv yie mau nyei dorngx weic duqv Giduc nyei qaqv nzie jienv yie.; Fi<sup>^</sup>lipv<sup>^</sup>poi 4:6-7 Maiv dungx weic haaix nyungc gaaax hnyouv. Oix zuqc weic nyungc-nyungc sic daux gaux jough Tin-Hungh, laengz zingh Tin-Hungh, ei meih mbuo qiex longc nyei tov ninh tengx. 7 Tin-Hungh nyei baengh orn, dongh baamh mienh zungv hnamv maiv zaaic nyei baengh orn, ziouc beu jienv meih mbuo nyei hnyouv caux hnamv nyei jauv, weic zuqc meih mbuo caux Giduc Yesu juangc maengc ziangh.*")
7. Mbuo taaih Tin-Hungh se gorngv mbuo ginv bungx hnyouv Ninh maiv gunv mbuo maiv bieqc hnyouv mbuo buangh nyei.

### **Hoqc Bungx Hnyouv Ziouv (Da'faam Ginc):** **Bungx Hnyouv Ziouv Nyei Goux**

#### **Cong-Mengh 21:1**

#### **Gorngv jiex gorn nyei waac:**

Se gorngv meih oix zuqc tengx gong-ziouv zoux gong yietc seix, gong-ziouv za'gengh doqc hoic duqv meih kouv, gong-zinh yaac maiv bun meih, bun deix gaux duqv meih ziangh hhangv nor, meih za'gengh haiz hnyouv naamx, maiv lamh kaux dorngx weic meih zoux ninh nyei bou. Mv baac liemh zeih meih duqv bungx nqoi, meih haih suiv mingh ganh norm deix bung siang jiez gorn. Mv baac maaih yietc nyungc sic, meih maiv maaih zinh nyanh suiv. Meih maiv haih biaux maiv jiex, maiv maaih nyanh biaux maiv gunv qiangx ndongc naaic longx.

Meih ziouc mingh naaic meih nyei gong-ziouv, tengx ninh lorz nyanh bun meih haih mingh duqv taux siang dorngx. Sienx nyei fai, gong-ziouv bun nyanh meih, maiv dan bun gaux hhangv, bun camv gor, bun gau ninh zungv jiomc nzengc. Meih mbuo gorngv naaiv se gouv saah? Cuotv fangx naangh hhangv saah? Mv baac Ging-sou fiev jienv mengh nyei: I<sup>^</sup>saa<sup>^</sup>laa<sup>^</sup>en mienh zuqc I<sup>^</sup>yipv ziouv hoic ninh mbuo zoux gong zoux bou. Mv baac dongh Tin-Hungh heuc ninh mbuo cuotv nyei ziangh hoc ninh mbuo maiv maaih zinh nyanh, mv baac Tin-Hungh tengx liuc leiz naaiv nyungc sic. Ninh gorngv mbuox Mose, "*Yie yaac oix bun I<sup>^</sup>yipv Mienh taaih meih mbuo. Meih mbuo cuotv nyei ziangh hoc ziouc maiv zuqc kungx-buoz baeqc zaux nyei mingh. Dauh dauh m'sieqv dorn oix zuqc tov juangc laangz juangc biau nyei I<sup>^</sup>yipv Mienh nyei jiem siou-setv, nyaanh siou-setv, caux lui-houx bun meih mbuo nyei dorn, meih mbuo nyei sieqv zornj jienv. Hhangv naaic meih mbuo ziouc zorqv I<sup>^</sup>yipv Mienh nyei ga'naaiv gaaatv jienv mingh nzengc aqv* (Cuotv<sup>^</sup>i<sup>^</sup>yipv 3:21-22). Tin-Hungh laengz nyei za'gengh cuotv daaih doix nzengc yiem Cuotv<sup>^</sup>i<sup>^</sup>yipv 12:35-36 "*Ninh mbuo ei jienv Mose paaiv nyei waac zoux, tengx I<sup>^</sup>yipv Mienh tov jiem nyaanh nyei siou-setv caux lui-houx. Ziouv bun I<sup>^</sup>yipv Mienh nqoi fim nqoi eix ninh mbuo. Ninh mbuo tov haaix nyungc, I<sup>^</sup>yipv Mienh ziouc bun wuov nyungc. Ninh mbuo hhangv naaiv nor nduov (luv) duqv I<sup>^</sup>yipv Mienh nyei ga'naaiv dorh jienv mingh nzengc.*" I<sup>^</sup>yipv

mienh zoux nyei sic se bun cing kungx Tin-Hungh ganh haih zoux hhangv, weic I^yipv mienh nqoi fim nqoi eix nyei bun. Naaiv se maiv zeiz pou-tong nyei sic. Bun camv gor hhangv jang luv duqv nyei ga'naaiv nor. Tin-Hungh zoux nyei mbuo hnamv maiv tong. Tin-Hungh zoux bun I^yipv mienh nqoi fim nqoi eix nyei bun. Tin-Hungh goux jienv Ninh nyei mienh.

### Gorngv mengh Ging-sou:

#### A. Tin-Hungh liuc leiz Ninh nyei mienh

1. Mbuo mouz laanh mienh maaih ziangh hoc bangc mienh fai kaux mienh. Ninh mbuo ginv nyei tengx mbuo fai hoic mbuo, duqv longx fai ciouv. Maiv gunv ndongc haaix zoux longx mbuo maaih ziangh hoc m'daaih yiem mienh nyei buoz ndiev (zoux gong mienh yiem gong-ziouv, horqc saeng yiem fin-saeng) yiem baamh mienh mangc nyei mbuo yiem dauh, fai yiem nyungc, nyei buoz-ndiev.
2. Mienh zoux nyei fai ginv nyei tengx fai hoic zuqc mbuo nyei, mbuo hiuv duqv mienh zoux nyei hoic fai haih tengx duqv mbuo. Mbuo hhangv haaix nor zoux fai dau dongh mbuo yiem naaiv nyungc mienh nyei buoz-ndiev? Mbuo haih bungx hnyouv Ziouv, sienx gorngv Ninh haih yienc naaiv nyungc mienh nyei hnyouv nyei fai? Haih tengx mbuo nyei fai?
3. Se gorngv maaih laanh mienh oix hoic mbuo, oix lorz qiangx zoux orqv sic bun mbuo, mbuo bungx hnyouv Ziouv gorngv Ninh haih dangv jienv goux jienv mbuo nyei fai? Mbuo sienx gorngv Ninh maiv bun mienh zoux waaic nyei hoic mbuo nyei fai? Ging-sou mengh nyei gorngv Tin-Hungh haih, Ninh yaac liuc leiz goux jienv mbuo nyei.
4. Mbuo haih bungx hnyouv Ziouv weic zuqc Ninh liuc leiz goux mbuo, liuc leiz zoux gong yiem mienh nyei maengc dongh Ninh mbuo ginv zoux nyei haih zuqc taux mbuo. Maiv gunv mienh zoux nyei haaix nyungc, Tin-Hungh liuc leiz ziangx goux jienv Ninh nyei mienh. Se gorngv Tin-Hungh goux caux gunv nyungc-nyungc nor, ninh yaac goux jienv mbuo, maiv gunv mienh ginv nyei haaix nyungc. Tin-Hungh goux jienv mienh nyei hnyouv bun ninh mbuo haih ginv nyei tengx duqv mbuo, weic Tin-Hungh oix tengx mbuo, Ninh yaac goux tengx maiv bun mienh ginv nyei haih hoic zuqc mbuo. Cong-mengh 21:1 gorngv, "*Hungh diex nyei hnyouv se hhangv diuh ndoqv yiem Ziouv nyei buoz, sueih Ziouv nyei eix bun ninh huin mingh haaix bung.*" Maiv gunv zoux hungh gunv mienh nyei mienh Tin-Hungh yaac haih goiv ninh nyei hnyouv gunv ninh nyei hnyouv. Mangc E^saa^laa 1:1 mengh nyei gorngv taux Tin-Hungh dorh hungh diex nyei hnyouv. Mangc Ndaa^ni^en 1:9 mbuo buatc mengh nyei Tin-Hungh bun zoux jien fouv nyei mienh nqoi hnyouv Ziouv nyei mienh.

#### B. Tin-Hungh dangv jienv Ninh nyei mienh

1. Mbuo duqv buatc mengh nyei gorngv Tin-Hungh haih, yaac gunv jienv, mienh nyei hnyouv dorh mienh zoux ei Ninh nyei za'eix.
2. Maaih ziangh hoc Tin-Hungh yaac dangv jienv mienh maiv bun zoux hoic zoux doqc Ninh nyei mienh. Mbuo mangc Apc^laa^ham nyei maengc, weic ninh gamh nziex mienh daix ninh weic oix longc ninh nyei auv ziouc mbuox hungh gorngv naaic se ninh nyei muoc. Hungh zorqv ninh nyei auv mingh, mv baac Tin-Hungh dangv jienv maiv bun hungh muoqv Apc^laa^ham nyei auv. Tin^deic^dough 20:6 "*Mbeix buatc nyei ziangh hoc Tin-Hungh aengx gorngv mbuox ninh, 'Yie hiuv nyei. Meih hhangv naaiv nor zoux meih nyei hnyouv zingx nyei. Yie ganh dangv jienv, maiv bun meih*

- baamz zuiž dorngec yie. Se weic naaiv yie maiv bun meih hluo zuqc ninh.*" Tin-Hungh dangv jienv hungh nyei hnyouv. Tin-Hungh goux jienv Saalaa maiv bun hungh diex, Aa^mbi^me^lekv, muoqv ninh.
3. Weic Apc^laa^ham maiv bungx hnyouv Tin-Hungh zoux bun ninh nyei auv Saalaa zuqc yiem dorngec aqc nyei, mv baac Tin-Hungh dangv jienv maiv bun haaix nyungc hoic Saalaa.
  4. Gamh nziex fai maiv doic se yietc nyungc Tin-Hungh longc tengx dangv jienv maiv bun win-wangv daaih hoic Tin-Hungh nyei mienh. Yiem Tin^deic^douh 35:5 *"Yaakopv caux gan ninh nyei zuangx mienh cuotv jauv mingh wuov zanc, Tin-Hungh bun huing nzuonx wuov deix zingh nyei mienh gamh nziex haic, ziouc maiv zunc Yaakopv nyei dorn mbuo."* Yiem Tin^deic^douc 34 mbuo buatec mienh caa Yaakopv nyei sieqv, ninh nyei dorn nduov daix yietc langz m'jangc dorn. Yaakopv gamh zix yiem wuov ga'hlen fingx nyei mienh daaih daix ninh mbuo mv baac Tin-Hungh dangv jienv maiv bun mienh hoic ninh mbuo.
  5. Tin-Hungh mengh nyei dangv jienv se yiem Cuotv^i^yipv sou 34:23-24 *"Meih mbuo nyei yietc zungv m'jangc dorn yietc hnyangx oix zuqc daaih zaangc buo nzunc yie, Ziouv Tin-Hungh, I^saa^laa^en Mienh nyei Tin-Hungh. 24 Yie oix zunc fingx-fingx mienh yiem meih mbuo nyei wuov ndaangc maengx cuotv mingh, bun meih mbuo nyei deic-jaaix jangv cuotv. Meih mbuo yietc hnyangx mingh zaangc Ziouv, meih mbuo nyei Tin-Hungh buo nzunc, maiv maaih haaix dauh nzaeng meih mbuo nyei ndau aqv."* Tin-Hungh heuc yietc zungv m'jangc dorn dingh ninh mbuo zoux nyei nyungc-nyungc, buo nzunc yietc hnyangx daaih Ninh nyei nza'hmien. Maaih eix-leiz gorngv nyungc-nyungc dingh nzengc...naaiv za'gengh bungx hnyouv Ziouv, naaiv za'gengh biux mengh Ziouv goux jienv ninh mbuo. Naaiv se benx qiangx win-wangv haih daaih hoic, mv baac se gorngv ninh mbuo ei Ziouv ziouc goux jienv ninh mbuo.
  6. Tin-Hungh zoux gong yiem mienh nyei maengc, Tin-Hungh dangv jienv mienh zoux nyei dongh doix-dekc Ninh nyei za'eix nyei. Se gorngv nyungc-nyungc cuotv daaih weic tengx mbuo, hnavg Baulo gorngv yiem Lomaa 15:4, *"Loz-hnoi fiev jienv Ging-Sou nyei yietc zungv waac se fiev daaih njaaux mbuo, weic bun mbuo maaih noic diev yaac kuinx mbuo, mbuo cingx daaih maaih lamh hnamv dorngec."* Tin-Hungh zoux nyei gong yiem I^yipv mienh nyei hnyouv nqoi fim nqoi eix nyei bun zinh nyanh I^saa^laa^en mienh, Tin-Hungh dangv jienv i bung i maengx I^saa^laa^en mienh nyei win-wangv njaaux mbuo yaac orn taux mbuo gorngv Tin-Hungh liuc leiz mbuo nyei maengc. Ninh dangv jienv maiv bun waaic nyei hoic mbuo nyei maengc. Nyungc-nyungc Tin-Hungh zoux nyei weic bun mbuo duqv longx.

### C. Tin-Hungh sueih Ninh nyei mienh:

1. Tin-Hungh *maiv* nzunc-nzunc dangv jienv nyungc-nyungc mienh zoux waaic hoic mbuo nyei sic. Mbuo maiv hiuv weic haaix nyungc Tin-Hungh sueih mienh zoux dongh ninh mbuo zoux nyei. Mbuo buatec I^saa^laa^en mienh dingh, maiv ceix zangc Tin-Hungh nyei biau v ziepc hnyangx nyei ziangh hoc weic win-wangv hoic (E^saa^laa 4:6-24).
2. Mbuo maiv hiuv, nzunc baav Tin-Hungh dangv, nzunc baav Tin-Hungh sueih. Mv baac mbuo hiuv duqv dingc gorngv Tin-Hungh haih nyei yaac dangv jienv mienh maiv bun zoux hoic Tin-Hungh nyei mienh. Weic Tin-Hungh hnamv mbuo, maiv gunv mienh zoux haaix nyungc, mbuo duqv longx weic Tin-Hungh. Yo^sepv nyei

maengc benx fangx cing nyei gorngv taux naaiv, Tin Deic Douh 50:20 “*Meih mbuo daav za'eix hoic yie, mv baac Tin-Hungh longc wuov nyungc za'eix zoux longx nyei sic. Hnangv ih zanc mbuo buac jienv nor, ninh longc naaiv nyungc za'eix njoux mienh camv nyei maengc.*”

3. Yiem Ging-sou nzunc baav Tin-Hungh sueih mienh zoux hnyouv ngaengc. **Nzame Leiz Latc 2:30** “*Mv baac Hetv^mbon Zingh nyei Si^honx Hungh maiv kangv bun mbuo yangh ninh nyei deic-bung jiex, weic zuqc Ziouv, meih mbuo nyei Tin-Hungh, zoux bun Si^honx Hungh nyei hnyouv ngaengc, maiv kangv muangx, weic zorqv ninh jiu bun yiem meih mbuo nyei buoz-ndiev hnangv ih jaax hnoi nor.*” **Ye^su^waa 11:20** “*Se Ziouv ganh zoux bun wuov deix mienh nyei hnyouv ngaengc, cingx daaih caux I^saa^laa^en Mienh mborqv jaax, weic bun ninh mbuo ganh zuqc mietc nzengc. Ninh maiv korv-lienh ninh mbuo, zungv bun ninh mbuo zutc nzengc mi^aqv, hnangv Ziouv paaiv ziangx Mose wuov nor.*”
4. Maaih camv mbuo maiv bieqc hnyouv mv baac yietc nyungc mbuo hiuv duqv mengh nyei se Tin-Hungh haih zoux gong yiem mienh nyei hnyouv caux hnamv nyei javv bun mienh haih zoux ei jienv Ziouv nyei za'eix. Maiv gunv sienx fai maiv sienx Ninh haih goiv mienh nyei hnyouv, yientc mienh nyei eix. Tin-Hungh ei Ninh nyei za'eix.
5. Mbuo haih bungx hnyouv Ziouv, haih bangc Ziouv yiem norm-norm dorngx, nyungc-nyungc sic.

#### **Ginv ei Ging-sou nyei eix-leiz:**

1. Mbuo baamh mienh hiuv nyei se faix fiuv sic, Tin-Hungh hiuv nyungc-nyungc. Weic naaiv mbuo maiv haih bieqc hnyouv toux taux Ziouv zoux nyei, zoux goux nyei, nyungc-nyungc cuotv daaih nyei.
2. Mbuo hiuv duqv Tin-Hungh hnamv mbuo, Ninh biux mengh Ninh nyei hnamv yiem Yesu Giduc, weic naaiv mbuo haih bungx hnyouv Ninh.
3. Yiem naaiv norm seix zangc maaih zix nyungc mbuo maiv hiuv, maiv bieqc hnyouv nzengc, mbuo kungx haih bungx hnyouv dongh zeix mbuo wuov dauh Ziouv, zuoqc mbuo nzuonx wuov dauh Ziouv. Tin-Hungh se maiv hnangv mbuo. Ninh se Doz, *mbuo se zeix daaih nyei hnangv.* Tin-Hungh zoux Ziouv, Ninh maiv zeiz zoux zuiz nyei gorn. Maiv gunv zoux zuiz-mienh haih duqv Tin-Hungh goiv ninh mbuo nyei hnyouv, Tin-Hungh maiv nduov mienh baamh zuiz (Yaagorpc 1:13-14).
4. Baamh mienh haih ginv bungx hnyouv Ziouv fai maiv bungx hnyouv, ginv ei fai ginv maiv ei. Tin-Hungh bun mienh haih ginv hnamv Ninh fai mbuoqc Ninh fai maiv hnamv maiv mbuoqc. Mv baac nyungc-nyungc baamh mienh ginv nyei ninh mbuo ganh ndaam-dorng, yietc zungv nyei ginv se benx Tin-Hungh sueih mienh nyei eix (Yo^sepv nyei gorz mbuo maaic ninh; Yu^ndatc maaic Yesu; He^lotv daix mienh, Bi^latc wuonc mienh).
5. Se gorngv mbuo hiuv duqv Tin-Hungh haih, yaac goiv mienh nyei hnyouv caux hnamv nyei sic daaih ei jienv Ninh nyei za'eix zoux nor, mbuo oix zuqc hnangv haaix nor dau fai ziangh? Mbuo nyei maengc se yiem Ziouv nyei buoz-ndiev. Maiv gunv haaix nyungc mienh zoux haaix nyungc, mbuo haih bungx hnyouv Ziouv dongh hiuv duqv yaac liuc leiz wuov ndangc hingv nyei sic weic mbuo.
6. Mbuo oix zuqc daux gaux tov, nzunc baav mienh zoux nyei haih tengx fai hoic mbuo nyei maengc nyei, mbuo oix zuqc tov Tin-Hungh tengx, tov Tin-Hungh koi mienh nyei hnyouv

goiv mienh nyei hnyouv dongh ninh mbuo zoux nyei haih zuqc mbuo nyei (gong-ziouv, hung h jaa jienv fouv...nyungc-nyungc).

7. Se gorngv mbuo qiemx zuqc mienh tengx oix zuqc tov Ziouv koi mienh nyei hnyouv goiv mienh nyei hnyouv tengx. Mangc E<sup>se</sup>te nyei maengc mbuo hiuv cing, mienh oix hoic I<sup>saa</sup>laa<sup>en</sup> mienh ninh ziouv daux gaux tov Tin-Hungh; liuz, ninh mingh mbuox hung h diex nqoi hnyouv tengx.
8. Nzunc baav Tin-Hungh sueih mienh sueih sic cuotv daaih yiem mbuo nyei maengc hoic zuqc mbuo, hnavg **Se<sup>fan</sup>yaa 7:17**, "*Ziouv, meih nyei Tin-Hungh, caux meih yiem. Ninh zoux mborqv jaax henv nyei baeng bun meih hingh jhex. Ninh zungv weic meih oix a'hneiv orn-lorqc. Ninh hnamv meih ziouc oix ceix meih jiez daaih. Ninh oix weic meih orn-lorqc nyei baaux nzung mbui.*" **Lomaa 8:31** "*Se gorngv Tin-Hungh tengx mbuo, haaix dauh haih caux mbuo doix-dekc?*" Yietc nyungc mengh nyei mbuo oix zuqc hiuv se maiv maaih haaix nyungc cuotv daaih maiv zeiz ei jienv Ninh nyei za'eix. Ninh nyei za'eix se nyungc-nyungc longx nyei.
9. Mienh weic haaix nyungc buangh zuqc hoic, zuqc mun, zuqc nzauh, zuqc kouv, zuqc mienh zoux doqc? Maiv gunv hnavg haaix nor, mbuo oix zuqc ziangh ei jienv Ziouv nyei za'eix.
10. Mbuo maiv horpc zuqc guaix fai dorh Ziouv daaih benx jaev sin weic mbuo zoux piatv nyei. Se gorngv meih ganh maiv longc hnyouv hoqc sou, ndortv maiv horpc zuqc gorngv naaic se Ziouv nyei za'eix, lueic maiv zoux gong maiv duqv bouh faaux maiv horpc zuqc guaix Tin-Hungh.
11. Mbuo zoux nyei mbuo ganh oix zuqc ndaam-dorng.
12. Nzamc Leiz Latc sou 29:29 gorngv mengh nyei taux Tin-Hungh nyei "sovereinty" (goux, fai gunv jienv nyungc-nyungc nyei leiz): "*Gem jienv nyei sic se Ziouv, mbuo nyei Tin-Hungh nyei. Laauc yaangh nyei sic yietc liuz benx mbuo nyei caux mbuo nyei zeiv-fun nyei, weic bun mbuo haih ei jienv naaiv deix leiz-latc nyei yietc zungv waac zoux*". Mbuo hiuv duqv Ziouv nyei eix dongh fiev yiem Ging-sou wuov hnavg, cuotv liuz naaic mbuo maiv hiuv haaix nyungc Ziouv nyei eix, haaix nyungc maiv zeiz, weic naaiv maiv dungx la'guaih laaic, gaqv, fai cai. Mbuo nyei gong se ei jienv Ziouv nyei eix dongh biux mengh yiem Ging-sou nyei. Cuotv liuz naaic Ziouv zoux ei Ninh ganh nyei eix mbuo zipv.

### **Hoqc Bungx Hnyouv Ziouv (Da'feix Ginc):** **Bungx Hnyouv Ziouv Nyei Qaqv**

**Ging-sou yiem : Maako 4:35-41** Dongh wuov hnoi lung h maanz-hmuangx, Yesu mbuox sai-gorx, "*Mbuo mingh wuov ngaanc ziqc koiv-dorn orqc?*" Ninh mbuo ziouc leih nqoi zuangx mienh, bieqc Yesu zueiz jienv wuov poux nzangv, dorh ninh mingh mi'aqv. Aengx maaih deix nzangv gan jienv mingh. Mingh gau, liemh zeh borngz gorng domh nziaaux, buonc wuom jiez laangc nqomz bieqc nzangv. Wuom aav lamh buangv nzangv aqv. Mv baac Yesu yiem nzangv-dueiv nzomz jienv nzomz-dauh m'njormh. Sai-gorx mingh heuc ninh nyie yaac gorngv, "*Sai-Diex aah! Sai-Diex! Mbuo ndortv wuom daic nzengc aqv loh! Meih maiv nzauh fai?*" Yesu jiez sin daaih hatc nziaaux yaac hatc wuom-laangc, "*Dingh aqv!*" Nziaaux ziouc sienc mi'aqv. Wuom-laangc yaac dingh. Sekv nzengc mi'aqv. Yesu naaic sai-gorx, "*Meih mbuo weic haaix diuc gamh nziex? Meih mbuo corc maiv sienx kaux yie?*" Sai-gorx mbuo gengh! gamh nziex haic. Laanh ziouc naaic laanh, "*Naaiv laanh mienh haaix dauh orqv? Liemh nziaaux caux wuom-laangc yaac muangx ninh nyei waac.*" (Mangc Matv<sup>tai</sup> 8:23-27; Lugaa 8:22-25)

## Gorngv jiex gorn nyei waac:

Maaiah sienx Tin-Hungh mienh hnamv dorngc. Tin-Hungh maiv laengz jienv gorngv sienx liuz Ninh ziouc maiv zuqc buangh zuqc sic, fai duqv butv zoih, fai maiv zuqc mienh zoux hoic. E<sup>fe</sup>so 1:3, “*Ceng mbuo nyei Ziouv Yesu Giduc nyei Die, Tin-Hungh, weic zuqc mbuo caux Giduc juangc maengc ziangh Tin-Hungh ziouc bun Singx Lingh ceix tin-dorngv nyei nyungc-nyungc fuqv bun mbuo*” Tin-Hungh yaac laengz jienv, “*Yie nyei Tin-Hungh maaiah nzoih nyungc-nyungc. Meih mbuo qiemx zuqc nyei yietc zungv, ziux ninh maaiah nyei ninh ziouc longc Giduc Yesu ceix bun meih mbuo.*” (Fi<sup>lipv</sup>poi 4:19). Duqv njien-youh se maiv zeiz maaiah baamh gen nyei ga’naaiv. Zuqc diev zuqc ging-borqc se benx yietc nyungc sienx Yesu mienh laanh laanh duqv buangh, yaac oix zuqc mbungh jienv ging jienv hnyouv.

Yiem mbuo buangh zuqc sic nyei ziangh hoc, mbuo haih mengh baeqc yaac haih zieqv duqv Ziouv gauh longx. Naaiv se sai-gorx mbuo hoqc duqv nyei yiem Gaa<sup>li</sup>li koiv. Yesu bueix jienv njormh nyei ziangh hoc maaiah domh nziaaux buonc daaih. Naaiv biux mengh gorngv maiv gunv Yesu caux jienv sai-gorx mbuo yiem nzangv ninh mbuo haih buangh zuqc sic zoux bun ninh mbuo gamh nziex. Ih zanc yaac fih hnavg nyei, mbuo haih buangh zuqc sic. Mbuo yaac haih hoqc duqv buo nyungc eix-leiz yiem naaiv norm mbuoqc horngv nyei sic.

## Gorngv Mengh caux muonc Ging-sou:

### A. Mangc Ziouv Yesu nyei nyungc zeiv

1. Yesu zoux nyungc zeiv bun mbuo zuotc yiem mbuo buangh zuqc “nziaauc buonc mbuo nyei maengc nyei ziangh hoc”...maaiah ziangh hoc mbuo kouv maaiah ziangh hoc mbuo buangh zuqc sic - hoic maengc nyei sic. Mbuo horpc zuqc hnavg haaih nor zoux?
2. Mbuo buate Yesu kouv, “Yesu yiem nzangv-dueiv nzomz jienv nzomz-dauh m'njormh.” Ninh ziangh hnoi nyei zunh gor doz ninh nyei sin zangc kouv haic (Maako 4:1). Naaiv tengx duqv mbuo buate gorngv mbuo yaac maaiah ziangh hoc kouv yiem mbuo zoux nyei gong, maiv gunv longx nyei gong. “*Mbuo nyei domh sai mienh maiv zeiz maiv hiuv mbuo mau nyei dorngx, weic zuqc ninh ganh yaac zuqc nyungc-nyungc seix jiex, hnavg mbuo zuqc seix nor, mv baac ninh maiv baamz zuiz*” (Hipv<sup>lu</sup> 4:15).
3. Yesu zoux nyungc zeiv bun mbuo buate taux sienx fim. Yiem Gaa<sup>li</sup>li koiv se haih liemh zeh maaiah domh nziaaux buonc daaih, nziaaux buonc wuom bieqc nzangv, sai-gorx mbuo nzauh taux ninh mbuo nyei maengc. Yesu bungx hnyouv Zangc Diex corc njormh jienv. Mbuo nyei maengc yaac fih hnavg nyei, maiv gunv zuqc domh nziaaux buonc daaih mbuo haih bungx hnyouv Ziouv. Hipv<sup>lu</sup> 13:5 gorngv, “*Maiv dungx bun mauv nyaanh nyei jauv gunv meih mbuo nyei maengc. Meih mbuo maaiah nyei, oix zuqc buangv hnyouv weic zuqc Tin-Hungh gorngv, “Yie yietc liuz maiv leih meih, yietc liuz yaac maiv guangc meih*”.

### B. Muangx Ziouv Yesu gorngv nyei waac

1. Mbuo zuotc Yesu nyei nyungc zeiv mbuo yaac haih muangx Ninh orn mbuo yiem Ninh nyei qaqv. Maaiah camv nyei sienx Yesu mienh duqv buate Tin-Hungh nyei qaqv se yiem mbuo buangh zuqc nyei sic.



2. Mbuo duqv buate Ninh nyei qaqv ziouc bun mbuo hiuv duqv Ninh cau-fim taux mbuo. Weic mbuo zuqc buangh zuqc sic, bun mbuo zieqv duqv gorngv baamh mienh ganh maiv maaih qaqv fai maiv maaih za'eix aqv, ziouc bangc Tin-Hungh.
3. Maiv gunv sai-gorx mbuo se yiem koiv nyei mienh, ninh mbuo duqv jiex ziex nyungc sic, mv baac naaiv nzunc se maiv hnavg duqv buangh jiex nyei.
4. Yiem ninh mbuo buangh zuqc nyei ninh mbuo corc cai Ziouv. Sai-gorx mingh heuc Yesu nyie yaac gorngv, "*Sai-Diex aah! Sai-Diex! Mbuo ndortv wuom daic nzengc aqv loh! Meih maiv nzauh fai?*"
5. Mv baac Yesu cau-fim taux ninh mbuo nyei. "*Yesu jiez sin daaih hatc nziaaux yaac hatc wuom-laangc, 'Dingh aqv!' Nziaaux ziouc sienc mi'aqv. Wuom-laangc yaac dingh. Sekv nzengc mi'aqv. Yiem naaiv Bide hoqc duqv gorngv Oix zuqc zorqv yietc zungv youh-nzauh guangc bun ninh weic zuqc ninh goux jienv meih mbuo*" (1 Bide 5:7).
6. Za'gengh longx haih se gorngv mbuo muangx Yesu orn mbuo, mbuo ziouc hiuv duqv Ninh gengh cau-fim taux mbuo, Ninh hnavm mbuo. Mbuo buate nziaaux dingh ei Yesu hatc nyei waac, wuom yaac sekv nzengc. Camv nyei maiv gunv nziaaux dingh mv baac wuom corc maiv liemh zeih dingc.

### C. Maaih Ziouv caux yiem maiv zuqc gamh nziex

1. Nziaaux dingh liuz, wuom sekv liuz, Yesu njaaux i nyungc Ninh nyei sai-gorx mbuo. Mbuo yaac haih hoqc duqv i nyungc yiem ninh mbuo. Yesu tengx liuz sai-gorx mbuo cing njaaux ninh mbuo.
2. **Da'yietv** Yesu naaic gaax, "*Meih mbuo weic haaix diuc gamh nziex?*" Siensex Tin-Hungh maiv horpc zuqc gamh nziex weic zuqc gamh nziex se maiv zeiz yiem Tin-Hungh daaih. 2 Ti<sup>mo</sup>^tai 1:7 "*Tin-Hungh ceix bun mbuo se maiv zeiz gamh nziex nyei hnyouv.*" Gamh nziex se yiem loz maengc, siensex Tin-Hungh duqv siang-maengc. Yesu gorngv hemx weic sai-gorx mbuo maiv maaih siensex fim, maiv maaih daamv.
3. "*Meih mbuo corc maiv siensex kaux yie?*" Sai-gorx mbuo gengh! gamh nziex haic. Laanh ziouc naaic laanh, "*Naaiv laanh mienh haaix dauh orqv? Liemh nziaaux caux wuom-laangc yaac muangx ninh nyei waac.*" Naaiv nyungc gamh nziex se gamh nziex taaih...gamh nziex ei, gamh nziex daaih ging jienv hnyouv, fai mbungh jienv...
4. **Da'nyeic** nyungc Yesu njaaux se siensex fim nyei javv. Yesu maiv gorngv hemz jienv haaix laanh gorngv nqemh ninh mbuo maiv maaih siensex fim, mv baac Ninh zanc-zanc gorngv kuinx mienh heuc oix zuqc maaih siensex fim (Mangc Matv<sup>ai</sup> 8:26).

### Ginv Ei Ging-sou nyei eix-leiz:

1. Norm-norm mbuoqc horngv nyei jangx hoc biux mengh taux siensex fim nyei javv. Oix zuqc maaih siensex fim cingx haih zoux horpc Ziouv Tin-Hungh nyei hnyouv. Maiv gunv mbuo maaih sic, buangh zuqc haaix nyungc hoic, mbuo oix zuqc zuotc Yesu nyei nyungc, oix zuqc muangx Ninh nyei waac, haiz Ninh gorngv nyei, hoqc bungz hnyouv Ninh, bungz hnyouv yiem Yesu se nduqc nyungc dongh bun mbuo haih bun nziaaux dingh, wuom-laangc suonc yiem mbuo nyei maengc hnavg.
2. Se gorngv nziaaux zungv muangx Ziouv nyei waac mbuo zoux haaix nyungc maiv muangx?

3. Se gorngv Yesu yiem jienv meih mbuo nyei nzangv fai maengc, Ninh goux jienv gunv jienv meih mbuo nyei. Gunv bungx hnyouv Ninh. Ninh cau-fim taux meih mbuo nyei maengc, Ninh goux jienv meih mbuo nyei maengc nyei.

### **Hoqc Bungx Hnyouv Ziouv (Da'hmz Ginc):** **Bungx Hnyouv Ziouv Nyei Cong-mengh**

**Ging-sou yiem : Lomaa 11:33** *"Tin-Hungh nyei en za'gengh longx haic. Ninh nyei cong-mengh caux wuonh zaang ndo haic. Tin-Hungh dunx nyei sic haaix dauh haih hnamv duqv zaaic? Ninh zoux nyei jauv maiv maaih haaix dauh haih samx duqv cuotv."*

#### **Gorngv jiex gorn nyei waac:**

Mbuo hiuv duqv Tin-Hungh maiv zoux dorngc, zoux piatv yiem mbuo nyei maengc. Tin-Hungh mengh nyei yaac hiuv cing Ninh zoux nyei sic. Hnangv Baulo gorngv nor, Ninh nyei cong-mengh caux wuonh zaang ndo haic. Mbuo baamh mienh maiv haih bieqc hnyouv Ziouv cuotv liuz Ninh biux mengh Ninh nyei eix bun mbuo hiuv hnangv. Nyungc-nyungc Tin-Hungh zoux nyei se weic bun Ninh ganh nyei mbuox duqv njang laangc (Yo<sup>^</sup>han 15:8; Lomaa 1:21; 11:36; 1 Ko<sup>^</sup>lin<sup>^</sup>to 10:31; E<sup>^</sup>fe<sup>^</sup>so 1:12-14; Laauc Yaangh 4:11, 5:13, 15:4). Gorngv taux Tin-Hungh nyei njang-laangc mbuo maiv haih bieqc hnyouv nzengc; hnangv Baulo gorngv nor mbuo ih zanc buatac nyei se mou-mouc nyei hnangv.

#### **Gorngv Mengh caux muonc Ging-sou:**

##### **A. Longx nyei yiem waaic nyei sic**

1. Baamh mienh buangh zuqc sic, ziouc naaic Tin-Hungh zoux haaix nyungc yie buangh zuqc naaiv buangh zuqc wuov?
2. Mbuo naaic weic mbuo maiv haih buatac haih maaih longx nyei sic yiem mbuo buangh zuqc nyei sic. Fai mbuo buangh zuqc nyei hnangv haaix nor haih bun Ziouv nyei mbuox duqv njang-laangc?
3. Hnangv nyungc-nyungc hingh nyei, se gorngv hungh heic hingh se maiv maaih jaax-zinh ndongc aqc nyei hingh. Sorngx qaqv mienh hingh mv baac caux ninh mbuo doix-dekc nyei se mau, hingh nyei se maiv ndongc caux ninh mbuo doix-dekc nyei fih ndongc. Duqv longx nyei ziangh hoc meih maiv buatac Tin-Hungh ndongc meih buangh zuqc sic nyei ziangh hoc buatac Ninh nyei qaqv tengx, buatac Ninh nyei hatc maaz gunv meih nyei maengc.
4. Weic Tin-Hungh nyei cong-mengh, Ninh zoux nyei nyungc-nyungc bun mbuo duqv longx bun Ninh duqv njang-laangc yiem mbuo buangh zuqc nyei sic. Maiv gunv mbuo baamh mienh mangc hnangv jang maiv maaih longx nyei .
5. Tin-Hungh nyei mienh yiem orqv nyei lungh ndiev. Mbuo nyei win-wangv (Mienv nyei Hungh hnangv 1 Bide 5:8 gorngv, *"Oix zuqc ging hnyouv mbungh jienv. Meih mbuo nyei win-wangv, mienv nyei hungh, hnangv sienh nor njunh jienv mingh mingh daaih daaih lorz mienh ngaatc nyan."* Yiem Lugaa 22:31 gorngv, *"Simon aah! Simon! Muangx oc. Saadaan duqv Tin-Hungh nqoi nzuih seix meih mbuo yietc zungv*

- hnavgv mienh nyomx cuqv nor*". Fai mienv oix hoic mbuo zoux bun mbuo gorngv doqc fai ki Tin-Hungh hnavgv Yopv nyei auv gorngv heuc ninh zoux nor.
6. Tin-Hungh nyei mienh buangh zuqc hoic nyei, buangh zuqc baengc, buangh zuqc mun nyei, buangh zuqc nzauh nyei yiem naaiv maaih zuiz nyei lungh ndiev, mv baac Tin-Hungh haih tengx mbuo maiv gunv mbuo buangh zuqc longx nyei fai waaic nyei haih bun mbuo duqv longx weic Ninh nyei mbuox.
  7. Mbuo haih bungx hnyouv Ziouv nyei cong-mengh weic yiem waaic sic haih maaih longx nyei. Maiv gunv Ziouv nyei naamh nyouz buangh zuqc waaic nyei, mbuo haih buatac longx nyei sic weic Ziouv nyei cong-mengh maiv gunv longx nyei se maiv zeiz dongh mbuo oix nyei mv baac longx nyei yiem Ziouv nyei za'eix.

## **B. Cing-nzengc yiem orqv nyei sic**

1. **Lomaa 8:28** "*Mbuo hiuv duqv Tin-Hungh bun hnavmv ninh, dongh ei ninh nyei za'eix heuc daaih wuov deix, yiem maanc sic duqv longx*". **Se maaih mienh gorngv camv nyei mv baac oix zuqc mangc Lomaa 8:29** "*Weic zuqc Tin-Hungh jaa-ndaangc ginu wuov deix, ninh yaac dingc bun ninh mbuo hnavgv ninh nyei Dorn nor. Ninh nyei Dorn ziouc duqv zoux zuangx muoz-doic nyei domh gorx.*" Duqv longx weic bun mbuo haih hnavgv Ninh nyei dorn Yesu Giduc.
2. Maiv zeiz duqv longx ei mbuo nyei za'eix fai mbuo nyei hnavm. Mbuo buatac Hipv^lu 12:10 gorngv, "*Mbuo nyei cien die mborqv njaaux mbuo se ziux ninh mbuo buatac horpc zuqc njaaux nyei, yaac weic dangh baav hnavgv. Mv baac Tin-Hungh mborqv njaaux mbuo se weic bun mbuo duqv longx yaac weic bun mbuo hnavgv ninh nor, cing-nzengc.*" Tin-Hungh hiuv duqv Ninh oix zuqc hnavgv haaix nor zoux cingx bun mbuo haih zuangv Ninh nyei dorn, bun mbuo haih cing-nzengc.
3. Mbuo nyei die mborqv njaaux mbuo weic oix mbuo duqv longx, mbuo nyei Tin-Dorng Diex gauh hiuv duqv longx...mbuo zoux die nyei mienh hiuv duqv maiv gunv mbuo ndongc haaix oix bun mbuo nyei fu'jueiv duqv longx maaih ziangh hoc mbuo mborqv dorngc nyei. Mv baac Tin-Hungh maiv mborqv njaaux dorngc.
4. Hipv^lu 12:11 gorngv, "*Zuqc mborqv njaaux wuov zanc, maiv maaih haaix dauh njien-youh, zungv haiz nzauh nyei. Mv baac zuqc mborqv njaaux liuz, hoqc hiuv nyei mienh nqa'haav ziouc zoux duqv horpc yaac maaih baengh orn.*" Tin-Hungh njaaux mbuo weic oix yienc mbuo, oix mbuo zuangv Ninh nyei Dorn.
5. Singx Nzung 119:71 gorngv, "*Yie zuqc kouv se longx nyei, weic bun yie hoqc linc meih nyei leiz-nyeic.*" Mbuo doqc hoqc ging-sou haih yienc mbuo nyei maengc nyei mv baac dongh mbuo buangh zuqc kouv naanc nyei ziangh hoc, mbuo gauh hoqc duqv Tin-Hungh nyei waac. Nyungc zeiv maaih "hnyouv suonc" fai "diev duqv" nyei hnyouv, maiv zeiz doqc hoqc duqv nyei mv baac buangh hoqc duqv nyei.
6. Tin-Hungh hiuv nyungc-nyungc. Yiem Ninh hiuv nyei Ninh longc daaih bun mbuo haih zuangv Ninh nyei Dorn Yesu, haih zoux cing-nzengc. Ninh hiuv duqv haaix nyungc mbuo qiemx zuqc, haaix zanc mbuo qiemx zuqc.

## **C. Tin-Hungh maiv zuqc porv mengh Ninh zoux nyei sic mbuox mbuo**

1. Mbuo oix hiuv weic haaix nyungc, zoux haaix nyungc, naaiv fai wuov cuotv daaih?
2. Mbuo maaih baengc mbuo oix hiuv haaix nyungc baengc haaix nyungc ndiev zorc?
3. Tin-Hungh maiv zuqc porv mengh Ninh zoux nyei mbuox mbuo, fai weic haaix diuc Ninh zoux dongh Ninh zoux nyei. Yopv nyei maengc bun cing mbuo buatac gorngv

- Tin-Hungh zoux "zeix nyungc-nyungc nyei Ziouv". Ninh maiv zuqc porv mbuox zeix daaih nyei ga'naaiv weic haaix nyungc Ninh zoux dongh Ninh zoux nyei. Mienh gox Yopv nyei jauv Yopv zungv maiv hiuv. Mv baac Tin-Hungh bun mbuo hiuv weic bun cing gorngv hnangv Lomaa 8:28 gorngv nor, "*Mbuo hiuv duqv Tin-Hungh bun hnamv ninh, dongh ei ninh nyei za'eix heuc daaih wuov deix, yiem maanc sic duqv longx.*"
4. Taux setv mueiz Yopv zieqv duqv gorngv weic ninh buangh zuqc nyei sic, ninh zieqv duqv Tin-Hungh. Yopv 42:5 "*Zinh ndaangc yie nyei m'normh haiz mienh gorngv taux meih, mv baac ih zanc yie nyei m'zing duqv buatac meih.*" Yiem Yopv nyei maengc mbuo haih buatac cing nyei mbuo buangh zuqc nyei sic se bun mbuo gauh haih zuangv Yesu Giduc. Yiem mbuo ganh nyei m'zing mangc nor, maiv buatac longx nyei sic mv baac Ziouv hiuv mbuo, oix zuqc bungx hnyouv Ziouv.
  5. Tin-Hungh maiv qiemx zuqc dau fai porv mengh haaix nyungc mbuox mbuo. Mbuo tov Tin-Hungh bun mbuo haih bieqc hnyouv dongh Ninh oix njaaux mbuo nyei. Yaac bungx hnyouv Ninh zoux nyei nyungc-nyungc weic oix bun mbuo duqv longx, bun mbuo gauh haih zuangv Yesu Giduc.

### **Ginv Ei Ging-sou nyei eix-leiz:**

1. I^saa^yaa 55:8-9 "*Ziouv gorngv, 'Yie hnamv nyei sic se maiv hnangv meih mbuo hnamv nyei. Yie nyei jauv yaac maiv hnangv meih mbuo nyei jauv. 9 Weic zuqc lungx leih ndau ndongc haaix hlang, yie nyei jauv yaac hnangv wuov nor gauh hlang meih mbuo nyei jauv, yie hnamv nyei sic yaac gauh hlang meih mbuo hnamv nyei sic.'*"
2. Lomaa 11:33 "*Tin-Hungh nyei en za'gengh longx haic. Ninh nyei cong-mengh caux wuonh zaang ndo haic. Tin-Hungh dunx nyei sic haaix dauh haih hnamv duqv zaaic? Ninh zoux nyei jauv maiv maaih haaix dauh haih samx duqv cuotv*".
3. Yopv gorngv Tin-Hungh za'gengh longx haic bun ninh. "*Meih naaic, 'Naaiv haaix dauh longc maiv maaih wuon-zaang nyei mienh gem jienv yie nyei za'eix?' Weic naaiv yie gorngv yie maiv mengh baeqc nyei sic, se mbuoqc horng haaic nyei sic, zungv jiex ndaangc yie haih hiuv nyei*" (Yopv 42:3).
4. Buatac sic cuotv maiv dungx faan, mv baac zuotc. Weic zuqc Ziouv nyei cong-mengh hlang haic mbuo maiv hnamv maiv zaaic, mbuo haih zaah mangc Ziouv zoux nyei sic nyei, yaac haih hoqc yiem Ziouv zoux nyei sic nyei.
5. Cong-mengh 21:30 gorngv, "*Maiv maaih haaix nyungc cong-mengh fai wuonh zaang fai caangh laangh nyei waac haih hingh jiex Ziouv.*" Se gorngv Tin-Hungh tengx mbuo, maaih haaix dauh haih noic duqv mbuo? (Lomaa 8:31) Maiv zuqc gamh nziex dongh mbuo buangh zuqc nyei weic Ziouv zoux gong yiem wuov nyei.
6. Tin-Hungh weic Ninh nyei cong-mengh Ninh goux jienv deic bung nyei...

### **Hoqc Bungx Hnyouv Ziouv (Da' Luoqc Ginc):** **Bungx Hnyouv Ziouv Nyei Hnamv**

**Ging-sou yiem: Lomaa 8:35-37**

**Gorngv jiex gorn nyei waac:** Mbuo mouz laanh mienh maaih ziangh hoc zoux dorngc, gorngv dorngc, lengc jeiv yiem dongh mbuo buangh zuqc sic nyei ziangh hoc. Mbuo zoux nyei zuiz se dongh mbuo **cai** taux Ziouv nyei hnamv bun mbuo. Meih mbuo maaih fu'jueiv nyei mienh hiuv

duqv deix mueiz nyei. Meih za'gengh hnamv haic meih nyei fu'jueiv, meih ganh zungv siev nyungc-nyungc weic ninh mbuo. Se gorngv fu'jueiv oix longc nyungc baav ga'naaiv dongh meih hiuv duqv maiv longx bun ninh, mv baac ninh ziouc gorngv meih maiv hnamv ninh nor, meih haiz hngangv haaix nor? Se gorngv mbuo zipv yaac sienx gorngv Tin-Hungh gunv nyungc-nyungc, goux nyungc-nyungc nor gauh hungh heic bun mbuo sienx gorngv Ninh hnamv mbuo, maiv gunv maaiah ziangh hoc mbuo hnamv dorngc. Mbuo haih bungx hnyouv Ziouv weic Ninh za'gengh longx haic bun mbuo. Ging-sou mengh nyei gorngv Tin-Hungh se hnamv nyei gorn (1 Yo^han 4:8). Weic zuqc Tin-Hungh se hnamv, weic naaiv Ninh za'gengh longx haic (Singx Nzung 145:7-9). Maiv gunv Ninh zuqc dingc zui- mienh nyei zuiz, “*ye maiv a'hneiv orqv mienh daic. Yie a'hneiv orqv mienh guangc nqoi ninh zoux nyei javv duqv maengc ziangh jienv*” (E^se^ken 33;11).

Dongh mbuo yiem jienv sic nyei mbu'ndongx, mbuo sic hlo jienv faaux, mbuo haih ginu bungx hnyouv Ziouv fai cai taux Ninh nyei hnamv. Mbuo haih hngangv fu'jueiv nor qiex jiex weic maiv duqv domh mienh ei ninh mbuo ziouc gorngv “Meih maiv hnamv yie” fai “Yie maiv hnamv meih”. Doix jienv naaiv norm ziangh hoc Mienv nyei hungh haih lorz qiangx daaih nduov mbuo guaix Tin-Hungh fai cai Tin-Hungh nyei hnamv hngangv ninh nduov Haa^waa nor.

### **Gorngv Mengh caux muonc Ging-sou:**

#### **A. Tin-Hungh nyei hnamv biux mengh yiem ziepc nzangc jaax**

1. Gan longx Tin-Hungh nyei mienh mv baac maaiah ziangh hoc zuqc Mienv ging-borqc nyei. Mangc Yopv nyei maengc, ninh zuqc Mienv nyei hungh gorngv hoic ninh. Zuqc hoic nyei ziangh hoc mbuo haih hngangv Yopv nyei auv gorngv nor, houv liuz Tin-Hungh daic hnyouv nqai, fai hngangv Yopv zoux nor, bungx hnyouv Tin-Hungh.
2. Tin-Hungh nyei hnamv biux mengh yiem ziepc nzangc jaax. Ninh hnamv lungx ndiev mienh bun Ninh nyei Dorn Yesu daic weic mbuo (Yo^han 3:16).
3. 1 Yo^han 4:9-10 “*Tin-Hungh hngangv naaiv nor bun mbuo hiuv duqv ninh hnamv mienh. Ninh paaiv ninh nyei ndoqc Dorn njiec baamh gen, weic bun mbuo haih kaux ninh nyei Dorn duqv ziangh jienv. 10 Hnamv nyei javv se hngangv naaiv. Maiv zeiz mbuo hnamv Tin-Hungh. Tin-Hungh hnamv mbuo ziouc paaiv ninh nyei Dorn daaih fiqv mbuo nyei zuiz.*”
4. Tin-Hungh se hnamv, mbuo qiemx zuqc jiex nyei se maiv zeiz simv nqoi maiv buangh zuqc sic, mv baac buangh nyei maiv haih beiv taux dongh mbuo oix duqv nyei, mbuo ziouc haih diev duqv. Yesu mengh nyei gorngv maiv maaiah yietc nyungc yiem naaiv baamh gen nyei njien-youh orn-lorqc haih beiv taux yietc liuz nyei orn lorqc yiem wuov Tin-dorngx weic mbuo duqv mbuox fiev jienv yiem ziangh maengc dan (Lugaa 10:20). Fih hngangv maiv maaiah yietc nyungc yiem naaiv baamh gen zuqc diev kouv nyei haih beiv taux yietc liuz siouc kouv yiem wuov deic nyuoqc.
5. Tin-Hungh hnamv mbuo bun ninh nyei Dorn mbuo, maaiah eix-leiz gorngv Tin-Hungh bun mbuo dongh mbuo qiemx zuqc jiex nyei. Ninh bun jaaix jiex nyei mbuo, Ninh nyei ndoqc Dorn, daaih daic weic bun mbuo haih duqv yietc liuz nyei maengc.
6. Lomaa 5:8 *Mv baac Tin-Hungh bun cing ninh ndongc haaix hnamv mbuo. Dongh mbuo corc zoux zuiz-mienh nyei ziangh hoc Giduc weic mbuo daic. Baulo gorngv yiem E^fe^so 2:1 Zinh ndaangc laaix meih mbuo maiv muangx Tin-Hungh nyei waac yaac baamz zuiz, meih mbuo se dorngx daic mi'aqv. Hngangv E^se^ken buatc I^saa^laa^en mienh hngangv mbungv nqai nor (E^se^ke^en 37). Naaiv se fangx*

gorngv taux mbuo ndangc duqv Tin-Hungh njoux mbuo. Mbuo se dornx daic mi' aqv.

7. Mv baac Tin-Hungh hnamv mbuo bun Ninh nyei Dorn Yesu daaih njoux mbuo, bun mbuo haih benx Ninh nyei naamh nyouz. Haaix zanc meih cai fai jiex gorn yiem hnyouv gorngv Tin-Hungh maiv hnamv meih, gunv hnamv nzuonx fai mange nzuonx ziepc nzangc jaax. Jangx jienv mbuo se zeix daaih nyei baamh mienh, mbuo maiv muangx Ziouv nyei waac mingh zoux zuiz, mv baac Tin-Hungh corc hnamv mbuo. Mbuo maiv zic duqv, yaac bietv maiv duqv kungx Tin-Hungh weic Ninh nyei hnamv Ninh ginv hnamv mbuo hnavg. Weic naaiv maiv gunv mbuo buangh zuqc sic, kouy naanc, fai zuqc hoic mbuo haih bungx hnyouv hnamv mbuo wuov dauh Ziouv.

### **B. Tin-Hungh hnamv ninh nyei biauv zong mienh**

1. Weic Tin-Hungh nyei en mbuo duqv njoux: E<sup>fe</sup>so 2:8 "*Meih mbuo duqv njoux se weic Tin-Hungh nyei en, weic zuqc meih mbuo sienx kaux ninh. Se maiv zeiz meih mbuo ganh zoux nyei, se Tin-Hungh ceix bun nyei zingh nyeic.*" Duqv njoux nyei mienh duqv benx Tin-Hungh nyei hmuangv doic. Hipv<sup>lu</sup> 8:10 Ziouv gorngv, "*Wuov deix hnoi-nyieqc jiex liuz, yie oix caux I<sup>saa</sup>laa<sup>en</sup> nyei zeiv-fun liepc jiez nyei ngaengc waac se hnavg naaiv. Yie oix zorqv yie nyei leiz-latc fapv jienv ninh mbuo nyei mba'nziu-gorn, yaac fiev jienv ninh mbuo nyei hnyouv gu'nyuoz. Yie ziouc zoux ninh mbuo nyei Tin-Hungh, ninh mbuo yaac zoux yie nyei baeqc fingx.*" Weic Yesu Giduc mbuo duqv benx Ninh nyei biauv-zong mienh. Mbuo maaiah Singx Lingh njiec dingc jienv mbuo bun mbuo hiuv cing gorngv mbuo se Ninh nyei naamh nyouz.
2. Lomaa 8:15-16 gorngv, "*Meih mbuo zipv daaih nyei Singx Lingh maiv zeiz hoic meih mbuo zoux nouh, bun meih mbuo gamh nziex. Singx Lingh bun meih mbuo benx Tin-Hungh nyei naamh nyouz. Mbuo ziouc kaux Singx Lingh heuc Tin-Hungh, "Aa Die aah! Aa Die!"* Yiem wuov gitv lungh ndiev cuotv liuz zien dorn, mienh maiv haih heuc m'jangc zoux "Aa Die".
3. Mbuo nyei Tin-Dorngh Diex hnamv mbuo, hnavg Dae hnamv ninh nyei cien fu'jueiv nor, weic ninh ginv mbuo benx ninh nyei biauv-zong mienh (Singx Nzung 103:11 "*Lungh leih ndau ndongc haaix hlang, ninh hnamv taaih ninh wuov deix ndongc wuov hlo.*") Mbuo haih bungx hnyouv Tin-Hungh weic Ninh nyei cong-mengh, weic Ninh nyei hnamv.

### **C. Mbuo haih bungx hnyouv Ziouv weic Ninh nyei hnamv**

1. Tin-Hungh nyei hnamv maiv goiv yienc weic biux mengh nyei yiem Yesu. Ninh nyei hnamv maiv zite, maiv haih sauv maiv hingh. Weic naaiv Baulo gorngv maiv maaiah haaix nyungc haih leih ndutv Tin-Hungh nyei hnamv (Lomaa 8:39). Tin-Hungh nyei hnamv liouc tong Yesu Giduc njiec taux bun mbuo (hnavg hmei-maac caux nquaah nyei waac-beiv yiem Yo<sup>han</sup> 15 nor). Se gorngv maiv maaiah hmei-maac, biouv maiv haih duqv buonx...nquaah dorh buonx mingh bun biouv.
2. Tin-Hungh hnamv mbuo tong taux Ninh nyei Dorn Yesu. Tin-Hungh nyei hnamv bun Ninh nyei Dorn maiv yienc, ninh nyei hnamv bun mbuo yaac maiv goiv yienc. Ninh nyei hnamv yaac maiv haih piatv. Mbuo oix zuqc hoqc mange dongh mbuo buangh zuqc nyei sic yiem Ziouv nyei m'zing. Mbuo duqv caux Ninh juangc maengc ziangh, mbuo buangh zuqc nyei Ninh maiv guangc mbuo. Ninh zanc-zanc caux mbuo yiem.

3. **Tin-Hungh hnamv ninh mborqv njaaux (Hipv<sup>^</sup>lu 12:5-6** *"Meih mbuo la'kuqv Tin-Hungh kuinx meih mbuo hnavg die kuinx dorn wuov deix waac fai? Ninh gorngv, "Yie nyei dorn aac, Ziouv mborqv njaaux nyei ziangh hoc oix zuqc muangx longx, ninh gorngv-njaaux nyei ziangh hoc maiv dungx hnyouv namx"*. Mbuo bieqc dorngc hnyouv gorngv "se gorngv Tin-Hungh hnamv mbuo nor kungx duqv longx ei mbuo oix nyei hnavg". Mbuo la'kuqv gorngv mbuo ganh nyei baamh mienh dae zungv maaih ziangh hoc zuqc mborqv ninh mbuo nyei fu'jueiv. Yie mborqv yie nyei dorn nyei ziangh hoc maiv zeiz gorngv yie maiv hnamv ninh, yie hnamv ninh cingx mborqv njaaux. Maiv maaih hnamv nor, yie zungv maiv gunv ninh zoux nyei sic. Yie maaih ziangh hoc mborqv dorngc, mv baac Tin-Dorng Diex maiv mborqv dorngc. Maiv gunv nzunc baav mbuo maiv bieqc hnyouv mv baac haih bungx hnyouv gorngv weic Ninh hnamv mbuo naaiv se longx nyei bun mbuo.
4. **Tin-Hungh hnamv maiv piatv: Singx Nzung 32:10** *"Orqv mienh zuqc siouc kouv camv, mv baac kaux Ziouv nyei mienh zungv oix duqv Ziouv ziepc zuoqv nyei hnamv, goux jienv ninh"*. Tin-Hungh nyei hnamv se maiv haih piatv, maiv haih yienc. Maiv hnavg baamh mienh nyei hnamv yienc. I<sup>^</sup>saa<sup>^</sup>yaa 54:10 gorngv, *"Maiv gunv domh mbong zuqc zorqv nqoi, fiuv-mbong zuqc ndanc dongz, yie oix yietc liuz ziepc zuoqv nyei hnamv meih, maiv bungx ndortv. Yie laengz baengh orn nyei ngaengc waac yietc liuz maiv leih nqoi meih."* Wuov nyungc nor, mbuo zuqc buangh nyei sic se weic bun mbuo duqv longx, maiv gunv haaix nyungc sic. Weic naaiv Baulo cingx gorngv yiem Lomaa 8:28 *"Mbuo hiuv duqv Tin-Hungh bun hnamv ninh, dongh ei ninh nyei za'eix heuc daaih wuov deix, yiem maanc sic duqv longx."*
5. **Baulo ganh gorngv ninh buangh nyei kouv naanc weic bun ninh maiv ceng hlo, haih nyiemc ganh zoux faix (2 Ko<sup>^</sup>lin<sup>^</sup>to 12:9). Tin-Hungh nyei en gaux bun Ninh.** Mbuo maiv zuqc gamh nziex, maiv zuqc nzauh, mbuo gunv bungx hnyouv Ziouv.
6. **Tin-Hungh nyei hnamv caux mbuo yiem, hnavg ninh mbuox ninh nyei mienh I<sup>^</sup>saa<sup>^</sup>laa<sup>^</sup>en nor (I<sup>^</sup>saa<sup>^</sup>yaa 41:14** *"O Yaakopv aac, meih hnavg gaeng-mau maiv henv, maiv dungx gamh nziex. O I<sup>^</sup>saa<sup>^</sup>laa<sup>^</sup>en aac, meih faix. Yie ganh oix tengx meih."* Naaiv se Ziouv gorngv, *dongh Zuoqc Meih Wuov Dauh, se I<sup>^</sup>saa<sup>^</sup>laa<sup>^</sup>en nyei Cing-Nzengc Tin-Hungh."*)

### **Ginv Ei Ging-sou nyei eix-leiz:**

1. Maaih ziangh hoc mbuo oix zuqc sienx dinge Ziouv nyei waac, Ninh gorngv Ninh hnamv mbuo, Ninh za'gengh hnamv mbuo (2 Ko<sup>^</sup>lin<sup>^</sup>to 5:7). Maaih ziangh hoc mbuo nyei sienx fim haih mau fai maiv wuonv nyei; maaih ziangh hoc zungv haih cai gorngv Tin-Hungh za'gengh hnamv yie nyei fai niv? Ninh za'gengh hnamv meih nyei.
2. Mbuo buatc Tin-Hungh za'gengh tengx, za'gengh dau, za'gengh hnamv Ninh nyei naamh nyuoz (Singx Nzung 31:22). Tin-Hungh maiv guangc Ninh nyei naamh nyouz, weic Ninh nyei Dorn Yesu zuoqc mbuo nzuonx daaih.
3. Tin-Hungh nyei hnamv maiv haih piatv, Ninh maiv la'kuqv Ninh laengz nyei waac. Ninh gorngv nyei waac Ninh ei jienv zoux. Ninh gorngv Ninh hnamv mbuo. Mbuo zuqc bungx hnyouv Ninh nyei waac. Maiv dungx mangc piex Ninh weic maiv bungx hnyouv Ninh.

4. Maiv zeiz nzunc-nzunc bieqc hnyouv mbuo buangh zuqc nyei, fai buatc duqv cing fai hiuv duqv mengh gorngv zoux haaix nyungc mbuo buangh zuqc. Mv baac mbuo hiuv duqv hnavg Hipv^lu 13:20-21 gorngv nor, "*Tov ceix baengh orn nyei Tin-Hungh, dongh mbuo nyei Ziouv Yesu daic mingh bun ninh nangh daaih wuov dauh, bun meih mbuo duqv nyungc-nyungc longx weic ei jienv ninh nyei eix zoux. Yaac tov Tin-Hungh longc Yesu Giduc yiem mbuo gu'nyuoz bun mbuo zoux nyungc-nyungc horpc ninh nyei hnyouv. Yesu Giduc longc ninh nyei nziaamv liepc jiez yietc liuz yiem nyei ngaengc waac yaac zoux Goux Ba'gi Yungh nyei Domh Ziouv. Mbuo oix zuqc yietc liuz ceng ninh taux maanc gouv maanc doic. Aamen.*"

**Hoqc Bungx Hnyouv Ziouv (Da'cietv Ginc):**  
**Bungx Hnyouv Ziouv Weic Ninh Zeix Mbuo Daaih**

**Ging-sou yiem : Singx Nzung 139:13,16**

**Gorngv jiex gorn nyei waac:** Mbuo haih bungx hnyouv Ziouv weic Ninh zeix mbuo daaih. Zeix mbuo nyei Ziouv hiuv duqv Ninh zeix daaih nyei mienh. Ninh zeix daaih nyei se maiv fih hnavg. Nyungc zeiv: yie nyei m'zing maiv njang, oix zuqc dangh muoz ziux. Niouv cie yiem lung h muonz zanc maiv nangc mbienc. Zorqv nqoi muoz ziux fai naetv m'zing nyei ndie nor mangc maiv zien. Yie maiv zeiz ngopv, weic zuqc oix m'zing njang nyei mv baac maaih zieh laanh mienh maaih nyei baengc yiem sin za'gengh gauh kouv jiex naaiv. Yie nyei youz zuqc janx buonv liuz longc dienx tengx tauv qiex hnavg, ziangh sin maiv haih dongx, duqv nyeic ziepc lengh hnyangx hnavg daic mi'aqv. Maaih mienh camv liemh m'zing zungv maiv maaih, liemh maiv haih nyanc ga'naaiv oix zuqc longc yang uix yiem ga'sie. Maaih mienh muangx maiv haiz. Maaih nzunc yie ngopv gorngv nqemc mba'biei cuotv siepv oix zuqc cingv janx japv ndortv zinh camv haic. Maaih hnoi yie buatc yie nyei mba'biei saa nyei...se gorngv maiv maaih mba'biei nor gauh fatv maiv oix aqv. Yiem naaic daaih yie maiv ngopv taux mba'biei cuotv siepv aqv. Maaih mienh ziangh sin nyungc-nyungc zungv zoux gong nyei mv baac ngopv fai guaix nqemh naaiv nqemh wuov maiv nzueic. Maaih mienh nqemh sin zangc, maaih mienh nqopv taux fiem-fingx nyei javv. Maiv gunv haaix nyungc, yie gorngv nyei se maaih mienh camv aqc duqv zipv ganh fai a'hneiv dongh Tin-Hungh zeix nyei. Maaih mienh gorngv ninh mbuo nyei maengc yietc liuz maiv benx, feix duqv naaiv feix duqv wuov, oix yienc naaiv oix yienc wuov. Yie sienx gorngv jienv nyei, mbuo laanh laanh mienh qiemx zuqc bungx hnyouv Ziouv weic Ninh zeix mbuo daaih. Dongh mbuo maaih qiemx nyei yiem maengc, Singx Nzung 139:13-16 gorngv nyei se orn duqv hnyouv haic.

**Gorngv Mengh caux muonc Ging-sou:**

**A. Tin-Hungh zeix mbuo daaih**

1. **Yiem Singx Nzung 139:13-16** "*Meih zeix yiem yie gu'nyuoz nyei nyungc-nyungc. Yiem maa nyei ga'sie meih gapv yie daaih. 14 Yie ceng meih weic zuqc meih zeix yie cuotv daaih peix fuc haic, mbuoqc horng hhaic. Meih zoux nyei nyungc-nyungc za'gengh peix fuc haic. Yie nyei hnyouv zien-zien hiuv duqv. 15 Yie yiem maa nyei ga'sie zeix cuotv, se yiem gem jienv nyei doringx gapv yie nyei mbungv-qorng nyei ziangh hoc, zungv bingx meih maiv mbueiz. 16 Yie nyei sin maiv gaengh benx fangx zeiv, meih nyei m'zing zungv buatc yie mi'aqv. Yie liemh maiv gaengh maaih yietc*



*norm hnoi wuov zanc, meih weic yie dingc daaih nyei hnoi-nyieqc yietc zungv fiev jienv meih nyei sou-daan."* Naaiv mengh nyei gorngv mbuo se Tin-Hungh zeix daaih. Maiv gunv Ninh longc maa caux dae bun mbuo cuotv daaih, Ninh goux jienv mbuo yiem norm-norm ziangh hoc. Ndaa^witr gorngv Tin-Hungh gapv ninh daaih, janx nyei waac gorngv "lunh", hnangv mienh lunh ga'naaiv nor. Se gorngv mbuo hiuv duqv sin ga'nyuoz nyei ga'naaiv za'gengh mbuoqc horngh peix fuc nyei, nyungc-nyungc maaih ninh ganh nyei gong, yietc zungv zoux nyei gong maaih jiu tong doic. Ndaa^witr zieqv duqv hnangv Tin-Hungh zeix lungh zeix ndau zeix nyungc-nyungc. Tin-Hungh yaac zeix ninh daaih. Meih se Tin-Hungh nyei buoz-dauh zeix daaih.

2. **Ging-sou camv nyei mengh nyei gorngv Tin-Hungh zeix mbuo laanh laanh mienh. Yopv 10:8-11** *"Meih nyei buoz nanv yie, zeix yie cuotv daaih, ih zanc meih daaux nqaang daaih oix mietc yie. 9 Tov jangx jienv meih longc ba'naih nie zeix yie, meih corc oix bun yie nzuonx benx nie-mbung fai? 10 Meih dox yie cuotv daaih hnangv nyorx, aengx bun yie gitv daaih hnangv nyorx-hmei-ngaengc maiv zeiz? 11 Meih longc ndopv caux orv benx lui bun yie zuqv, yaac longc mbungv caux jaan daaux jienv."* **Singx Nzung 119::73** gorngv, *"Meih nyei buoz zeix yie daaih aengx liepc yie, tov bun yie bieqc hnyouv weic bun yie duqv hoqc linc meih nyei lingc."* **Yi^le^mi 1:5** *"Yie maiv gaengh zeix meih daaih yiem maa nyei ga'sie wuov zanc, yie hiuv duqv meih. Meih maiv gaengh cuotv seix, yie yaac ginv ziangx meih. Yie paaiv meih douc waac bun maanc guoqv mienh."*
3. Se gorngv mbuo hiuv duqv Tin-Hungh zeix mbuo daaih mbuo ziouc oix zuqc a'hneiv zipv weic mbuo se benx Ninh zeix daaih nyei. Se gorngv mbuo maiv a'hneiv Tin-Hungh zeix mbuo hnangv haaix nor, mbuo ziouc maaih sic caux Tin-Hungh. Mbuo oix zuqc bieqc hnyouv gorngv ZUIZ hnangv haaix nor yienc dongh Tin-Hungh zeix mbuo nyei mouz deic. Tin-Hungh zeix mbuo nyei sin, hnyouv, lingh wuonh. Wuov nyungc oix zuqc goux longx Tin-Hungh zeix nyei. Ndaa^witr hungh maiv guaix mv baac ceng Tin-Hungh. Ninh gorngv, *"Yie ceng meih weic zuqc meih zeix yie cuotv daaih peix fuc haic, mbuoqc horngh haic. Meih zoux nyei nyungc-nyungc za'gengh peix fuc haic. Yie nyei hnyouv zien-zien hiuv duqv"* (Singx Nzung 139:14).
4. Mbuo haih gorngv Ndaa^witr se ziangh duqv longx (1 Saa^mu^en 16:12) ninh cingx daaih haih ceng Tin-Hungh, ninh haih patv nzung. Ninh zoux hungh mv baac yie niv? Yie hnangv naaiv haih maaih haaix nyungc jaax-zinh? Maaih nyei, weic Tin-Hungh zeix meih daaih. Maiv gunv meih nyei sin zangc hnangv haaix nor, Tin-Hungh bun Ninh nyei ndoqc dorn daaih - hnangv I^saa^yaa 53:2 gorngv nor, *"Ninh yiem Ziouv nyei nza'hmien hlo daaih hnangv cunx lunx, hnangv ndiangx-nzungh yiem ndau-nqaai cuotv cunx. Maiv maaih fangx zeiv fai nzueic nyei jaax bun yie mbuo haiz oix mangc. Yaac maiv maaih nzueic nyei dorngx laqv yie mbuo nyei mueic."* Yesu, doz-mienh ganh nyei fangx-zeiv yaac maiv maaih nzueic nyei jaax hnangv douc waac mienh gorngv nor, mv baac Ninh hiuv duqv Ninh nyei mouz deic se zuqc daic weic lungh ndiev mienh nyei zuiz. Ndaa^witr ceng Tin-Hungh maiv zeiz weic ziangh duqv nzueic mv baac weic Tin-Hungh zeix ninh daaih.
5. Sienx Tin-Hungh mienh oix zuqc zieqv duqv gorngv Tin-Hungh zeix mbuo daaih, mbuo oix zuqc ceng Ninh. Naaiv se benx gorn bun mbuo zipv yaac a'hneiv Tin-Hungh zeix mbuo. Mbuo se Tin-Hungh nyei buoz-dauh. Weic naaiv oix zuqc goux longx ganh nyei sin, sin se Tin-Hungh nyei singx dinc. Mbuo zipv yaac bungx hnyouv Tin-Hungh zeix nyei yiem mbuo nyei maengc. Maiv gunv mbuo buangh

- zuqc haaix nyungc baengc fai maaih haaix nyungc baengc dongh cuotv seix daaih maaih nyei se weic Tin-Hungh nyei mbuox haih duqv njang-laangc, weic bun mbuo haih zanc-zanc bangc kaux Ninh (Cuotv<sup>i</sup>yipv 4:11).
6. Naaiv se aqc duqv bun mbuo zipv nyei, lengc jeiv se gorngv mbuo ganh fai mbuo hnamv nyei mienh maaih naaiv nyungc baengc dongh bun mbuo maiv haih dongx fai mingh-mingh daaih-daaiah. Yesu dau dongh mienh naaic taux yiem-toic m'zing maengh nyei mienh yiem Yo<sup>han</sup> 9:1-3 "*Yesu yangh jienv jauv mingh, buatc dauh yiem-toi m'zing maengh nyei mienh. 2 Sai-gorx mbuo naaic Yesu, 'Sai-Diex aah! Naaiv dauh mienh cuotv seix daaih m'zing maengh se laaix ninh ganh nyei zuiz fai laaix ninh nyei diex maac nyei zuiz?' 3 Yesu dau, 'Ninh m'zing maengh maiv zeiz laaix ninh ganh nyei zuiz fai ninh diex maac nyei zuiz. Ninh nyei m'zing maengh se weic bun Tin-Hungh zoux nyei sic yiem naaiv dauh mienh nyei sin biux mengh cuotv daaih.'"* Dingh jienv hnamv dangh Yesu gorngv nyei eix-leiz. Maaih laanh mienh cuotv seix daaih m'zing maengh mangc maiv buatc taux ninh benx domh mienh, weic oix bun Tin-Hungh nyei mbuox duqv njang-laangc. Weic haaix nyungc ninh ziangh seix m'zing maengh? Weic bun maaih norm ziangh hoc mienh haih buatc Tin-Hungh zoux nyei sic. Mbuo maaih camv nyei maaih m'zing nyei, yaac mangc duqv buatc nyei mv baac maiv mengh baeqc Tin-Hungh yaac maiv zieqv Tin-Hungh zeix mbuo daaih oix mbuo ziangh ei Ninh nyei mouz deic. Tin-Hungh nyei njang-laangc zic duqv nyungc-nyungc. Zic duqv mienh cuotv seix daaih m'zing maengh, zic duqv mbuo mingh mbuox mienh goiv hnyouv guangc zuiz.
  7. Se gorngv mbuo bungx hnyouv Tin-Hungh mbuo ziouc a'hneiv Ninh zeix daaih nyei, jiejx gorn yiem mbuo ganh nyei maengc. Tin-Hungh zeix mbuo daaih Ninh hiuv duqv haaix nyungc longx bun mbuo, haaix nyungc haih hoic mbuo. Weic naaiv Ninh bun Ging-sou, Ninh nyei waac, dorh jienv mbuo goux jienv mbuo. Maaih ziangh hoc mbuo zuqc nyutc buov, mv baac Ziouv zoux torngv laangh dorngc, zoux ndauh kaux, zoux jauv bun mbuo yangh.
  8. Meih nyei maengc maiv haih a'hneiv mienh, maiv haih wuonv, maiv haih buangv hnyouv buangh eix nyei ziangh, maiv haih hingh mueic jieqv fai korh fiqv mienh, cuotv liuz meih laengz zingh Tin-Hungh zeix meih maiv hngangv ganh dauh mienh. Mbuo horpc zuqc laengz zingh Tin-Hungh zeix mbuo daaih maiv hngangv mienh, mienh maaih camv nyei mbuo maiv maaih, mbuo mouz laanh mienh maaih ganh nyei lengc, fiem-fingx dongh Tin-Hungh bun daaih dongh maiv hngangv ganh dauh. Mbuo yiem nyei dorngx, mbuo maaih nyei hmuangv doic, mbuo zoux nyei gong, maaih nyei ga'naaiv, maaih nyei fuqv, nyungc-nyungc se yiem Tin-Hungh daaih. Mbuo oix zuqc longc weic bun Ninh nyei mbuox duqv njang-laangc, yaac laengz zingh Ninh nyei en.

## B. Bungx Hnyouv Tin-Hungh Zeix Nyei

1. **Singx Nzung 139:15** "*Yie yiem maa nyei ga'sie zeix cuotv, se yiem gem jienv nyei dorngx gapv yie nyei mbungv-qorng nyei ziangh hoc, zungv bingx meih maiv mbueiz. 16 Yie nyei sin maiv gaengh benx fangx zeiv, meih nyei m'zing zungv buatc yie mi'aqv. Yie liemh maiv gaengh maaih yietc norm hnoi wuov zanc, meih weic yie dingc daaih nyei hnoi-nyieqc yietc zungv fiev jienv meih nyei sou-daan."* Yiem gorn Tin-Hungh liuc leiz mbuo nyei maengc, Ninh maaih Ninh nyei mouz deic weic haaix nyungc Ninh zeix mbuo daaih. Mbuo haaix zanc cuotv seix, cuotv seix yiem haaix

- buonc mienh nyei biau-v-zong, haaix zanc nzuonx seix Tin-Hungh zungv liuc leiz ziangx mi' aqv.
2. Tin-Hungh maiv daan zeix mbuo hnangv mbuo nyei ziangh hoc yiem naaiv norm seix zangc se yiem Ninh nyei buoz. **Singx Nzung 31:15** "*Yie ziangh nyei hnoi-nyieqc yiem meih nyei buoz, tov njoux yie biaux ndutv yie nyei win-wangv caux zeix yie wuov deix mienh nyei buoz-ndiev.*" Maiv daan Tin-Hungh gunv mbuo nyei ziangh hoc yiem naaiv seix zangc, Ninh yaac gunv mbuo yiem nyei dorngx. **Gong-zoh 17:26** "*Tin-Hungh longc yietc laanh mienh zoux buonv zeix cuotv maanc fingx bun yiem buangv lungv ndiev. Ninh jaa-ndaangc dingc ziangx ziangh hoc caux ninh mbuo yiem nyei gapv-jaaix.*" Tin-Hungh zeix mbuo daaih, Ninh hiuv mbuo nyei ziangh hoc yiem naaiv seix zangc, Ninh yaac hiuv duqv mbuo horpc zuqc yiem haaix norm dorngx weic bun Ninh nyei mbuox haih duqv njang-laangc. Zuov taux Ziouv dorh mbuo nzuonx maiv maaih haaix nyungc haih daaih hoic fai zorqv mbuo nyei maengc.
  3. Ndangc mbuo cuotv seix, Tin-Hungh maaih Ninh nyei mouz deic yaac liuc leiz ziangx mbuo nyei maengc. Mbuo mouz laanh mienh maaih ganh nyei gong zoux. Ninh bun mbuo maaih nyei zingh nyeic oix zuqc longc nzengc weic fu-sux Ninh. Maiv gunv mbuo nyei maengc maaih haaix nyungc baengc fai maaih haaix nyungc dongh zanc-zanc baengc jienv mbuo, naaiv deix yietc zungv weic bun mbuo gauh bangc Ninh. Ninh zeix mbuo yiem naaiv lungv ndiev Ninh maaih nyungc mouz deic bun mbuo zoux. Mbuo haih fu-sux Ninh tong taux mbuo hmuangv doic, jiu-bang doic, langz zong doic, caux lungv ndiev mienh.
  4. Yie nyei youz nyei maengc maiv gunv ziangh nangv nyei, zuqc janx buonv mbai mingh longc dienx taux qiex, weic naaic yie mbuo mouz laanh hmuangv doic zieqv duqv gorngv maengc se nangv nyei, mbuo maaih nyei ziangh hoc za'gengh nangv gor yiem naaiv seix zangc, maaih nyei ziangh hoc, maaih nyei qaqv, maaih nyei maengc oix zuqc longc fu-sux Ziouv, weic bun Ziouv nyei mbuox duqv njang-laangc, weic bun mbuo gauh zungv Ninh nyei Dorn Yesu Giduc.
  5. Tin-Hungh nyei mouz deic bun mbuo nyei maengc se maiv zeiz jiex gorn yiem mbuo sienx Tin-Hungh nyei ziangh hoc, mv baac ndangc mbuo cuotv seix Ninh zungv hiuv duqv mbuo yaac maaih mouz deic bun mbuo nyei maengc. **Ye^le^mi 1:5** "*Yie maiv gaengh zeix meih daaih yiem maa nyei ga'sie wuov zanc, yie hiuv duqv meih. Meih maiv gaengh cuotv seix, yie yaac ginv ziangx meih. Yie paaiv meih douc waac bun maanc guoqv mienh.*" Baulo ganh mengh nyei gorngv Tin-Hungh heuc ninh zoux gong-zoh, "*Mv baac yie maiv gaengh cuotv seix wuov zanc, Tin-Hungh ginv yie daaih yaac ei ninh nyei en heuc yie fu-sux ninh. Ninh a'hneiv*" (**Gaa^laa^tie 1:15**). Tin-Hungh liuc leiz mbuo zoux Ninh nyei gong dongh mbuo maiv gaengh cuotv seix nyei ziangh hoc. Meih yiem haaix cuotv seix, benx haaix fingx mienh se maiv zeiz ca'bouc, mv baac ei Tin-Hungh nyei cong-mengh caux za'eix mbenc ziangx.
  6. Maaih mienh yiem naaiv seix zangc maiv buangv hnyouv ninh mbuo zoux nyei gong. Camv nyei weic maiv zieqv duqv Tin-Hungh yaac maiv zipv Tin-Hungh paaiv mbuo zoux nyei gong. Yie jiex gorn hnamv jienv oix zoux haengh douh nyei gong, mv baac yietc nyungc jiex yietc nyungc, Tin-Hungh bun yie zoux Ninh nyei bou zunh Ninh nyei kuv fienx yiem Jiu-bang. Maiv duqv sau jienv mingh lungv ndiev zunh mv baac duqv zunh yiem dingc Jiu-bang. Cuotv liuz Tin-Hungh ganh hlo haic nyei en hnangv, yie nyei maengc maiv funx gorngv haih benx zunh doz mienh. Yie zunv dingc hnyouv laengz zoux dongh Ziouv heuc nyei, mv baac maiv hiuv duqv gorngv

- zoux zunh doz mienh. Jiex gorn se maiv zeiz heic, yie longc ziepc hnyangx nyei ziangh hoc caux mienh lunx mienh zoux gong yiem wuic, liemh zeih caux domh mienh zoux gong yiem Jiu-bang se siang nyei. Mv baac laengz zingh Tin-Hungh yie maiv gaengh cuotv seix Ninh zungv liuz leiz yie nyei maengc. Yie sienx dingc naaiv nyei...yiem lomc zangc, Tin-Hungh dorh yie taux Meiv guoqc, taux Ging-sou horqc, yie buac cing Tin-Hungh nyei buoz goux jienv nyei.
7. Maiv gunv Tin-Hungh heuc meih zoux haaix nyungc, hlo jiex hlang jiex nyei gong se dongh meih ei jienv zeix meih daaih wuov dauh Tin-Hungh zoux. Weic zuiz mbuo zuqc kouv camv yiem mbuo zoux nyei gong (Tin deic douh 3:19). Sienx liuz Yesu, mbuo mangc caux hnamv nyei jauv taux gong se yienc. Mbuo zoux nyei se bun qiangx mbuo haih zoux Ziouv nyei dang ziux hmuangx nyei dorngx. Baulo gorngv, *"Maiv gunv zoux haaix nyungc, oix zuqc buangv hnyouv zoux hnangv zoux weic Tin-Hungh, maiv zeiz zoux weic mienh"* (Ko<sup>lo</sup>si 3:23). Maaih camv nyei bou yiem Baulo nyei ziangh hoc dongh zuqc zoux gong dongh ninh mbuo maiv oix nyei fai kouv nyei. Baulo mbuox ninh mbuo zoux weic Tin-Hungh.
  8. Weic Tin-Hungh dingc ziangx mbuo nyei ziangh hoc, hnoi-hnoi oix zuqc maaih wuov hnoi nyei jienv, maaih wuov hnoi nyei mouz deic. Hnoi-hnoi se jienv bun mbuo weic zuqc Tin-Hungh ganh liepc daaih nyei hnoi, oix zuqc longc weic Tin-Hungh. Hnoi baav mbuo buangh nyei se maiv zeiz hungh heic. Mbuo oix zuqc jangx jienv Tin-Hungh gorngv mbuox I<sup>saa</sup>^<sup>laa</sup>^en mienh ndangc ninh mbuo zuqc Mbaa<sup>Mbi</sup>^lon mienh zorqv ninh mbuo mingh zoux nouh. *Ziouv gorngv, "Yie hiuv duqv yie weic meih mbuo maaih nyei za'eix, se weic bun meih mbuo duqv longx maiv zeiz duqv ciouv, weic bun meih mbuo maaih hoz nqaang yaac maaih lamh hnamv dorngx."* (Ye<sup>le</sup>mi 29:11). Mbuo buac Tin-Hungh nyei hnyouv, nyungc-nyungc cuotv daaih yiem mbuo nyei maengc se weic bun mbuo duqv longx. Maaih camv nyungc cuotv daaih yiem mbuo nyei maengc hnangv jang maiv longx nor, mbuo zungv hnamv maiv zaaic, maiv bieqc hnyouv mv baac oix zuqc bungx hnyouv, maaih sienx fiem yiem Ziouv nyei waac.

### C. Bungx Hnyouv Tin-Hungh Dorh fai Goux

1. Weic mbuo zieqv duqv yaac zipv gorngv Tin-Hungh zeix mbuo daaih yaac liuc leiz mbuo nyei ziangh hoc, mbuo ziouc haih bungx hnyouv Ninh dorh mbuo goux mbuo. Mv baac mbuo naaic gaax se gorngv yie piatv Tin-Hungh nyei mouz deic nor niv? Fai yie piatv Tin-Hungh oix yie zoux nyei nor niv? Tin-Hungh dorh mbuo goux mbuo caux mbuo ginv ei Ninh nyei za'eix se oix zuqc mangc muonc deix.
2. Ndaa<sup>witv</sup> hungh diex gorngv, *"Tin-Hungh Ninh bun yie bueix njiec miev nyiemz nyei dorngx, dorh yie yiem wuom sienc nyei ndoqv-hlen. Ninh bun yie nyei hnyouv. Weic ninh ganh nyei mbuox ninh yienz yie yangh zoux horpc nyei jauv."* (Singx Nzung 23:2-3). Mbuo buac ba'gi yungh ziouv (Tin-Hungh) goux jienv, dorh jienv ba'gi yungh (Giduc mienh). Ba'gi yungh Ziouv se dorh ba'gi yungh mingh yiem wuom suonc nyei dorngx...yienz mbuo yangh horpc nyei jauv. Tin-Hungh hiuv duqv haaix nyungc se longx nyei bun mbuo, haaix norm dorngx se longx nyei bun mbuo. Tin-Hungh hnoi-hnoi goux jienv mbuo dorh jienv mbuo nyei. Mv baac Tin-Hungh yaac bun mbuo maaih cong-mengh haih ginv ei jienv Ninh nyei waac (Ging-sou) ziangh. Mbuo ginv zoux nyei nyungc-nyungc se gorngv ei jienv Ging-sou ziouc benx maaih cong-mengh nyei ginv, horpc nyei ginv.

3. Tin-Hungh maaih mouz deic bun mouz laanh mienh, weic naaiv Ninh cingx bun mbuo mouz laanh mienh maaih zingh nyeic maiv fih hhangv weic longc fu-sux Ninh yiem jiu-bang. Maiv gunv nzunc baav mbuo ginv nyei se dorngc, Ninh zanc-zanc goux jienv mbuo, maaih ziex nyungc Ninh tengx guon jienv gaengh bun mbuo maiv duqv bieqc mingh. Weic Tin-Hungh ziepc zuoqv Ninh ganh goux jienv dorh jienv mbuo nzunc jiex nzunc, yietc kang jiex yietc kang. Ninh maiv zeiz bun mbuo hiuv nzengc mbuo nyei maengc nyei wuov ndangc hingv, nzunc baav laaix mbuo oix hiuv duqv fai nzauh maiv gaengh cuotv nyei sic kuonx hnyouv. Mbuo oix zuqc hoqc bungx hnyouv Ziouv dorh jienv mbuo goux jienv mbuo nyei.
4. Weic Ziouv dorh jienv mbuo goux jienv mbuo maiv zeiz gorngv sueih mbuo maiv guen maiv goux maiv gunv haaix nyungc sic wuov nyungc eix. Mbuo daux nzuonx horpc zuqc daux gaux doqc Ziouv nyei waac zaah toux Ziouv nyei waac mangc gaax dongh Ninh oix mbuo zoux nyei dongh Ninh mengh nyei fiev yiem Ging-sou se haaix nyungc. Mbuo hhangv haaix nor haih ei Ninh nyei eix se gorngv mbuo maiv hiuv duqv Ninh gorngv nyei waac, Ninh nyei hnyouv? Tin-Hungh zeix mbuo daaih bun mbuo haih hnamv haih ginv, Ninh dorh mbuo goux mbuo yiem mbuo hnamv nyei, yiem mbuo doqc nyei yiem Ging-sou. Tin-Hungh dorh mbuo hnamv nyei jauv dongh mbuo hnamv nyei ziangh hoc.

#### **Ginv Ei Ging-sou nyei eix-leiz:**

1. Mbuo haih bungx hnyouv Ziouv weic Ninh zeix mbuo daaih. Ninh hiuv duqv mbuo, Ninh goux jienv mbuo, Ninh dorh jienv mbuo. Ninh bun mbuo maaih ginv nyei hnyouv, maaih Ging-sou nyei waac, tov Singx Lingh dorh mbuo ginv ei jienv Ninh nyei waac, bungx hnyouv zeix mbuo daaih wuov dauh Ziouv.
2. Mbuo oix zuqc mingh dongh Ziouv dorh mbuo mingh nyei. Mbuo maiv horpc zuqc cai Ninh nyei waac fai Ninh nyei hnamv bun mbuo.
3. Meih caux yie haih bungx hnyouv haih kaux wuonv Ziouv weic Ninh dorh mbuo mingh nyei dorngx se kungx longx nyei dorngx hhangv. Mbuo haih gorngv, "Tov Ziouv dorh yie, yie ziouc gan jienv Ninh mingh."

#### **Hoqc Bungx Hnyouv Ziouv (Da'betv Ginc):** **Bungx Hnyouv Ziouv yiem kouv naanc**

**Ging-sou yiem : Yaagorpc 1:2-4** *"Yie nyei gorx-youz aac, meih mbuo buangh zuqc nyungc-nyungc kouv naanc oix zuqc funx benx njien-youh nyei sic, 3 weic zuqc meih mbuo hiuv duqv buangh naaiv deix sic se seix mangc meih mbuo nyei sienx fim, weic bun meih mbuo maaih noic diev duqv. 4 Oix zuqc longc noic diev taux daauh weic bun meih mbuo haih benx dunh yunh nzoih nyei mienh, maiv caa yietc nyungc."*

#### **Gorngv jiex gorn nyei waac:**

Hhangv mbuo buate gaengh ndunx nung fai yiem fioux-zoih mbuoqc (sopc bang cuotv) nor, mangc jienv tengx dangh ninh mbuo borngz cuotv mv baac se gorngv mbuo tengx ninh mbuo borngz liuz cuotv daaih nor, ninh mbuo ziouc daic, fai maiv haih ndaix hhangv Tin-Hungh zeix ninh mbuo nor. Borngz cuotv kouv nyei ziangh hoc se benx jienv nyei ziangh hoc bun ninh

mbuo. Weic zuqc ninh mbuo maiv daan fongv ndatv nqoi hhangv, mv baac fongv nziaamv caux wuom mingh taux ndatv bun ndatv haih nqoi. Se gorngv mbuo hnamv jienv oix tengx, ziouc zoux bun ninh zuqc kouv, zuqc daic.

Maengc buangh zuqc nyei aqc fai kouv naanc, fai naanc zingh se hhangv gaeng yiem fioux-zoih mbuoqc nor, borngz jienv cuotv mbuoqc, buatc maiv dungx tengx. Borngz cuotv mbuoqc nyei ziangh hoc se benx qiangx bun ninh mbuo haih longc qaqv, haih bun ndatv henv, bun maaih qaqv. Hhangv Yaagorpc gorngv nor, mbuo buangh zuqc nyei nyungc-nyungc kouv naanc se seix mangc mbuo nyei sienx fim, bun sienx fim haih wuonv bun mbuo haih benx domh mienh yiem mbuo nyei sienx fiem.

### **Tin-Hungh weic haaix diuc bun baamh gen maaih naanc zingh?**

1. Maaih yietc joux waac-naaic doic-doic mienh naaic taux: “*Weic haaix nyungc baamh mienh zuqc buangh naanc zingh, zuqc diev kouv, zuqc hnyouv mun, zuqc daic?*”
2. Yopv naaic naaiv joux waac, laanh laanh mienh buangh zuqc naanc zingh nyei ziangh hoc yaac naaic. Tin-Hungh maiv zorqv guangc naanc zingh nyei sic cuotv mbuo nyei maengc cuotv liuz Ninh longc mbuo buangh nyei bun mbuo gauh zuangv Ninh, longc mbuo buangh nyei bun mbuo gauh sienx wuonv Ninh. Weic Ziouv bun mbuo buangh nyei weic ceix mbuo nyei sienx fim.
3. Baulo yaac gorngv, “*Maiv daan naaiv hhangv, maiv gunv mbuo maaih naanc zingh, mbuo orn-lorqc haic weic zuqc mbuo hiuv duqv naanc zingh bun mbuo maaih noic diev duqv. 4 Mbuo maaih noic diev, Tin-Hungh ziouc buatc horpc hnyouv, mbuo cingx daaih maaih lamh hnamv.*” (Lomaa 5:3-4) Mbuo laanh laanh mienh se gorngv zingx bun ganh nor hiuv duqv za’gengh aqc bun mbuo diev taux naanc zingh nyei sic. Maiv daan diev hhangv mv baac orn-lorqc yiem naanc zingh nyei sic. Mv baac Baulo caux Yaagorpc gorngv mbuo horpc zuqc orn-lorqc weic naanc zingh nyei sic bun cuotv daaih nyei. Maiv zeiz maaih orn-lorqc yiem naanc zingh nyei sic, mv baac dongh naanc zingh nyei sic haih zoux cuotv daaih nyei, bun Tin-Hungh zoux nyei gong yiem mbuo nyei maengc. Mbuo horpc zuqc orn-lorqc weic Tin-Hungh gunv jienv nyungc-nyungc mbuo haih bungx hnyouv Ninh.
4. Sienx Yesu mienh nyei maengc se zanc-zanc hlo, zanc-zanc hoqc nyei maengc. Mbuo oix hlo nyei mv baac maiv oix *hlo nyei ziangh hoc*. Weic mbuo baamh mienh mangc naanc zingh nyei sic benx waaic nyei, maiv mangc tong Tin-Hungh nyei m’zing, maiv buatc Tin-Hungh zoux nyei gong yiem mbuo nyei maengc dongh mbuo buangh zuqc naanc zingh nyei ziangh hoc. Maaih deix ziangh hoc mbuo zungv maiv oix buatc longx nyei, mv baac oix zuqc mangc tong Ziouv nyei waac caux sienx fim mangc jiex ndangc mbuo buangh zuqc nyei taux mbuo duqv nyei. Yesu mangc jiex ndangc diev kouv yiem ziepc nzangc jaax weic njoux zuiz mienh (Hipv<sup>^</sup>lu 12:2). Mbuo horpc zuqc zuotc Ninh nyei nyungc zeiv.
5. Mouz dauh mienh oix hiuv duqv gorngv *haaix dauh bun maaih naanc zingh cuotv daaih? Naanc zingh nyei gorn dongh haaix?* Mbuo hhangv haaix nor haih mbenc jienv ndaangc mbuo buangh nyei? Mbuo oix juangc jienv hoqc taux hietc nyungc mbuo haih hoqc duqv yiem naanc zingh nyei sic.

## Gorngv Mengh caux muonc Ging-sou:

### A. Naanc zingh bun mbuo maiv hanc baamh gen:

1. Ging-sou gorngv mbuox mbuo, mbuo yiem naaiv baamh gen se hhangv kaeqv mienh yiem ganh norm deic-bung daaih nyei mienh. Naaiv norm baamh gen se maiv zeiz mbuo nyei biauv. Yesu nzuonx mingh mbenc longx nyei dorngx zuov jienv mbuo (Yo<sup>^</sup>han 14:1-3 “*Yesu aengx gorngv, “Maiv dungx hnyouv huaang hnyouv nzauh. Oix zuqc sienx kaux Tin-Hungh yaac sienx kaux yie. 2 Yie nyei Die nyei biauv maaih yiem nyei dorngx camv nyei. Se gorngv maiv maaih yie zungv mbuox meih mbuo mi'aqv. Yie yaac mingh liuc leiz dorngx bun meih mbuo yiem. 3 Yie mingh liuc leiz ziangx dorngx bun meih mbuo yiem, yie aengx daaih dorh meih mbuo mingh caux yie yiem wuov. Yie yiem haaix meih mbuo ziouc caux yie yiem wuov.”*”
2. Baamh gen maiv zeiz mbuo yietc liuz yiem nyei dorngx: **1 Bide 2:11** “*Hnamv nyei gorx youz aac, meih mbuo yiem naaiv baamh gen zoux ganh norm deic bung daaih nyei kaeqv mienh. Yie ziouc kuinx meih mbuo maiv dungx sueih ganh nyei hnyouv hanc zoux. Ganh nyei hnyouv hanc nyei kungx caux lingsh wuonh mborqv jaax hhangv.”*; **Hipv-lu 13:14** “*Weic zuqc yiem naaiv baamh gen mbuo maiv maaih yietc liuz wuonv nyei zingh, mbuo lorz nqa'haav hingv oix daaih wuov norm zingh”*; **2 Ko-lin-to 5:1,5** “*Mbuo hiuv duqv mbuo yiem jienv naaiv norm baamh gen nyei ndopv-liuh, dongh mbuo nyei sin, zuqc caeqv wuov zanc, yiem wuov Tin-dorngx Tin-Hungh oix bun norm maiv zeiz mienh zoux daaih nyei biauv mbuo yiem, se yietc liuz nyei biauv.”*”
3. Se gorngv maiv maaih naanc zingh nor: maiv maaih haaix dauh oix leih naaiv norm baamh gen, maiv gunv gorngv yiem camx baav nyei dorngx hhangv. Yaac fih hhangv nyei, Tin-Hungh maiv naaic gaax mbuo oix hhangv haaix nor hlo, mbuo benx Ninh zeix daaih nyei mienh, Ninh hiuv duqv mbuo hhangv haaix nor haih hlo, Ninh se hhangv goux huingx nyei mienh nor, tengx mbuo pitv, daav dueiv yiem huingx nyei biouv. Ninh longc Ging-sou tengx mbuo daav (Yo<sup>^</sup>han 15:1-7).
4. Tin-Hungh longc naanc zingh daav mbuo nyei maengc hhangv goux huingx mienh daav biouv-ndiangx nyei dueiv nor. Baulo gorngv, “*Yie sienx dingc Tin-Hungh yiem meih mbuo nyei hnyouv jiez gorn zoux kuv gong, yaac oix zoux jienv mingh taux Giduc Yesu aengx daaih nyei hnoi ziouc zoux ziangx nzengc aqv.*” (Fi<sup>^</sup>lipv<sup>^</sup>poi 1:6)
5. Tin-Hungh oix mbuo hlo yiem zuqc mborqv njaaux nyei ziangh hoc, “*O Ziouv aac, meih mborqv njaaux nyei mienh maaih orn-lorqc, se meih longc meih nyei leiz-latec njaaux nyei mienh*” (Singx Nzung 94:12).

### B. Naanc zingh haih bun longx nyei sic cuotv daaih:

Mbuo buatec yiem ging-sou...

1. Tin-Hungh maiv piatv - Ninh ei jienv Ninh nyei eix, maiv gunv mbuo buatec naanc zingh nyei sic, Tin-Hungh haih longc naaiv deix sic ei jienv Ninh nyei eix bun mbuo haih zuangv Ninh, bun mbuo gauh nitv Tin-Hungh, gauh bangc Tin-Hungh, yaac bun Jiu-baang mienh muoz caux muoz-doix maaih qiangx biux mengh Ninh mbuo nyei hnamv laanh bun laanh. Tin-Hungh hiuv duqv Ninh zoux nyei sic nyei. Mbuo buangh nyei sic se maiv zeiz ca'bouc, yietc zungv bun Ziouv gauh maaih qiangx zoux gong yiem mbuo nyei maengc.

2. Weic Ziouv zoux gong yiem mbuo nyei maengc dongh mbuo buangh zuqc sic nyei ziangh hoc, mbuo haih hoqc duqv yaac haih zieqv duqv Ziouv zoux nyei gong. Mbuo oix zuqc hoqc yiem mbuo buangh nyei naanc zingh.
- a) **Mbuo ih jaax hnoi yaac buatc longx nyei sic cuotv dongh mienh buangh zuqc naanc zingh nyei ziangh hoc:** Wuom yiemz fai ndau dongz, biauv waaic nzengc mv baac laanh corc maaih hnyouv tengx laanh. Butv domh baengc yaac bun qiangx ganh dauh ngoi hnyouv tengx.
- b) **Buangh naanc zingh nyei ziangh hoc oix zuqc hoqc duqv mbuoqc Tin-Hungh.** Suonc zingh suonc eix nyei kaux Ziouv. Hnangv yie nyei janx doic zuqc mingh bun ndie-sai paaix ninh nyei ga'sie nor. Ninh mbuoqc ndie-sai, yaac suonc zingh suonc hnyouv bungx hnyouv ndie-sai paaix ninh. Hiuv duqv gorngv ndie-sai paaix weic zorc ninh maiv zeix oix zoux ninh mun. Ninh zuqc paaix mun weic bun baengc haih longx. Yiem mbuo nyei maengc maaih camv nyungc zuqc paaix mun bun mbuo cingx duqv longx. Se gorngv mbuo hiuv duqv paaix nyei mouz deic nor mbuo gauh haih diev duqv.
- c) **Buangh zuqc naanc zingh nyei ziangh hoc, oix zuqc mangc tong Ziouv nyei waac.** Lorz Ziouv nyei waac daaih mangc hnangv paaix liuz nyei mienh zuqc nzatv/nyanc ndie bieqc sin weic tengx paaix nyei dorngx gauh maiv ndongc wuov mun. Mbuo haih buatc Ziouv nyei waac cing caux mengh nyei dongh mbuo buangh zuqc naanc zingh nyei ziangh hoc. Weic mbuo dorh daaih yiem hnyouv maiv daan yiem m'nqorngv hnangv. Zien leiz hnangv ndie nor tengx duqv mbuo nyei mun, weic zuqc jiex gorn zorc mbuo nyei hnyouv, bun mbuo haih hlo. Oix zuqc mangc naanc zingh fai buangh zuqc nyei sic hnangv zuqc ndie-sai paaix "cancer" baengc nor. Se gorngv maiv paaix nor haih jangv jienv mingh hoic meih daic. Paaix se mun...mv baac hnamv jienv bun meih haih longx.
- d) **Buangh zuqc naanc zingh nyei ziangh hoc, oix zuqc jangx taux jiex daaih nyei sic caux zinh ndangc duqv buangh nyei mienh hnangv haaix nor zoux.** Tin-Hungh maiv daan oix mbuo diev duqv mv baac oix mbuo jangx taux. Maiv daan jangx taux kouv naanc, mv baac dongh Ninh mborqv njaaux nyei, weic bun mbuo haih hlo yiem Ziouv. (Nzamec leiz latc 8:2-3 "*Meih mbuo oix zuqc jangx jienv yiem wuov deic-bung-huaang naaiv deix feix ziepc hnyangx gu'nyuoz, Ziouv, meih mbuo nyei Tin-Hungh, hnangv haaix nor dorh meih mbuo, weic bun meih mbuo nyiemc ganh zoux faix, weic seix mangc gaax meih mbuo nyei hnyouv hnangv haaix nor, meih mbuo za'gengh gan longx ninh nyei leiz-latc zeiz fai maiv zeiz. 3 Ninh bun meih mbuo nyiemc ganh zoux faix, bun meih mbuo hnyouv sie, aengx zorqv maa^naa bun meih mbuo nyanc, dongh meih mbuo ganh fai meih mbuo nyei ong-taaix maiv hiuv nyei ga'naaiv. Naaiv se weic bun meih mbuo hiuv duqv mienh maiv zeiz kungx kaux nyanc hopv yungz maengc hnangv. Yaac oix zuqc kaux Ziouv gorngv nyei joux-joux waac.*") Tin-Hungh oix njaaux I^saa^laa^en mienh, oix ninh mbuo jangx jienv ninh mbuo hnangv haaix nor bangc Tin-Hungh. Ngorc nyei ziangh hoc oix zuqc jangx taux Tin-Hungh.
3. **Loz-hnoi nyei jiu-bang maaih orn-lorqc dongh ninh mbuo buangh zuqc naanc zingh nyei ziangh hoc.**
- a) Ninh mbuo bieqc hnyouv gorngv naanc zingh haih tengx ninh mbuo hlo yiem Giduc. Tin-Hungh longc zieux nyungc yiem mbuo nyei maengc bun mbuo



haih hlo. Tin-Hungh bun naanc zingh taux mbuo nyei maengc, oix zuqc hiuv duqv gorngv Ninh hiuv duqv Ninh zoux nyei, maiv gunv mbuo maiv bieqc hnyouv weic haaix nyungc mbuo buangh dongh mbuo buangh nyei.

- b) Baulo fiev yiem **Lomaa 5:3-4** “*Maiv daan naaiv hnangv, maiv gunv mbuo maih naanc zingh, mbuo orn lorqc haic weic zuqc mbuo hiuv duqv naanc zingh bun mbuo maaih noic diev duqv. Mbuo maaih noic diev, Tin-Hungh ziouc buatc horpc hnyouv, mbuo cingx daaih maaih lamh hnamv.*”

### C. Naanc zingh zoux bun win-wangv sekv se gorngv mbuo diev duqv.

#### 1. Yopv buangh nyei naanc zingh:

- a) Sadaan oix gox Tin-Hungh gorngv Yopv fuh sux Tin-Hungh weic Tin-Hungh ceix fuqv bun Yopv (Yopv 1:9 “*Yopv taaih Tin-Hungh se baeqc baeqc taaih nyei fai?*”)
- b) Mv baac Yopv diev jienv ninh buangh nyei naanc zingh. Weic ninh hnangv naaiv, ziouc zoux bun Sadaan sekv, zoux zorn-g-zengx gorngv Sadaan gox nyei maiv maaih gorn-ndoqv.
- c) Zipv Hipv^lu wuov buonv sou nyei mienh za’gengh zuqc diev kouv camv, weic naaiv fiev nyei mienh gorngv, “*Oix zuqc jangx jienv zinh ndaangc meih mbuo hnangv haaix nor. Meih mbuo coqv hoqc duqv Tin-Hungh nyei njang ziux jienv meih mbuo wuov zanc, meih mbuo diev duqv camv-nyungc kouv naanc mv baac meih mbuo diev duqv hingh. 33 Maaih ziangh hoc meih mbuo dorn-g-zuqc mienh gorngv doqc, zoux doqc. Maaih ziangh hoc maaih deix zuqc mienh hnangv naaiv nor zoux. Meih mbuo yaac mingh caux ninh mbuo juangc jienv diev. 34 Meih mbuo yaac maaih hnyouv korv-lien zuqc wuonx nyei mienh. Meih mbuo nyei ga’naaiv zuqc caangv nzengc, meih mbuo a’hneiv diev weic zuqc meih mbuo hiuv duqv meih mbuo corc maaih nyungc gauh longx jiex, yaac yietc liuz yiem.*” (Hipv^lu 10:32-34)

#### 2. Tin-Hungh oix mbuo zoux kuv sic dangv jienv hnongx nyei mienh gorngv nyei pa’li pa’laaix waac – 1 Bide 2:15

- a) Maaih mienh gorngv doqc kuv fiex
- b) Maaih mienh gorngv doqc sienx Giduc nyei mienh
- c) 1 Bide 2:15 “*Tin-Hungh nyei za’eix se oix meih mbuo zoux kuv sic dangv jienv hngongx nyei mienh gorngv nyei pa’li pa’laaix waac.*”

### D. Naanc zingh zoux bun mbuo buangv hnyouv mbuo maaih nyei.

- a) Mbuo dauh dauh duqv zipv ziex nyungc Tin-Hungh nyei fuqv mv baac hungh heic nyei bun mbuo la’kuqv Tin-Hungh nyei en-zingh. Mbuo horpc zuqc laengz zingh nyungc-nyungc mbuo duqv zipv nyei.
- b) Sin wangc siangx, maaih hmuangv doic, maaih zien hnamv mbuo nyei doic
- c) Longx nyei nyungc zeiv gorngv naanc zingh haih bun mbuo laengz zingh dongh mbuo maaih nyei se Baulo yiem wuov loh. **Fi^lipv^poi 1:3-8** [“*Yie haaix zanc jangx taux meih mbuo, yie weic meih mbuo laengz zingh yie nyei Tin-Hungh...*”]

### E. Naanc zingh zoux bun mbuo baangc kaux Tin-hungh, maiv kaux ganh nyungc.

1. Camv nzunc nyei mbuo laaic duqv gorngv mbuo maiv qiemx zuqv haaix dauh. Yo^han 15:5 gorngv, “*Yie se a’ngunc hmei. Meih mbuo se a’ngunc nquaah. Haaix dauh ziangh jienv yie, yie yaac ziangh jienv ninh, wuov dauh ziouc ziangh biouv*”

*gitv aqv. Meih mbuo leih nqoi yie nor, meih mbuo maiv haih zoux haaix nyungc.*”  
Mbuo oix zuqc bangc Tin-Hungh...se gorngv haaix nyungc yaac longx nyei nor...mbuo jiex gorn maaih hnamv gorngv "mbuo maiv zuqc bangc haaix dauh wuov nyungc hnyouv."

- a) Nyungc zeiv se butv baengc. Ndie-sai yaac maiv haih zorc aqv, ninh mbuo nyei za'eix juotc mi'aqv...baamh mienh maiv maaih za'eix aqv...
- b) Mbuo ziouc zieqv duqv gorngv mbuo ndongc haaix qiemx zuqc Tin-Hungh yaac bangc ninh ndongc haaix camv.
- c) Baulo gorngv yiem 2 Ko<sup>lin</sup>to 12:10 *“Yie ziouc weic Giduc buangv hnyouv diev mau, zuqc mienh gorngv doqc, zuqc kouv naanc, zuqc mienh zoux doqc, zuqc heiv sic, weic zuqc yie haaix zanc mau, wuov zanc yie ziouc henv aqv.”*

## 2. Maiv maaih ziangh hoc hhangv naaiv...

- a) Mbuo bangc kaux Tin-Hungh bun mbuo tauv nyei diemv-diemv qiex. Baulo gorngv, *“Mbuo yiem ninh ziangh jienv, haih nangh, haih mingh mingh daaih daaih”* (Gong-zoh 17:28).
- b) Tin-Hungh longc Ninh nyei waac daav mbuo caux longc naanc zingh daav bun mbuo gauh haih ziangh biouv (Yo<sup>han</sup> 5:2). Se gorngv mbuo maiv zuqc daav mbuo ziouc maiv ziangh biouv gitv. Mbuo maaih ziex nyungc zuqc pitv guangc, weic zuqc maaih ziex nyungc zuiz ziangh jienv mbuo nyei maengc bun mbuo maiv haih ziangh longx nyei biouv. Tin-Hungh bun naanc zingh daaih haih nyanc jaav-biouv (baengc, hoic sic, ndortv gong, zinh zoih, ga'naaiv) bun mbuo hnamv taux haaix nyungc jienv caux jaaix yiem mbuo nyei maengc. Mbuo ziouc haih bangc Tin-Hungh gauh ziangh biouv weic mbuo duqv daav dueiv.
- c) Jienv nyei yietc nyungc yiem mbuo nyei maengc dongh mbuo haih buate cing se zuiz nyei fiem-fingx. Naanc zingh bun mbuo haih zaah ndo yiem mbuo nyei maengc, kauv ganh nyei hnyouv mangc gaax mbuo se maaih Singx Lingh ziangh nyei biouv nyei fai? (Gaa<sup>laa</sup>tie 5:22-23 *“Mv baac Singx Lingh bun nyei se [Gikc waac gorngv “Singx Lingh ziangh nyei biouv se...”] bun mienh maaih hnyouv hnamv mienh, bun mienh maaih njien-youh, maaih baengh orn, maaih noic, maaih hnyouv korv-lienh mienh, zoux longx nyei sic, maaih ziepc zuoqv nyei hnyouv, 23 zoux hnyouv suonc, haih gunv duqv ganh. Naaiv deix yietc zungv jauv leiz-late maiv haangh.”*) Nyungc zeiv zuqc mienh hoic mbuo, mbuo za'gengh haih zoux longx, guangc bun mienh nyei fai? Mbuo gengh hnyouv ndaav hnyouv suonc gunv duqv ganh nyei fai?

## F. Naanc zingh tengx sinx mbuo nyei sienx fim

### 1. Ging-sou mbuox mbuo:

- a) **Naanc zingh tengx sinx mbuo nyei sienx fim: 1 Bide 1:6-7** – *“Weic naaiv meih mbuo oix zuqc orn-lorqc haic, maiv gunv ih zanc zuqc seix, siouc camv-nyungc kouv naanc, nzauh caamx baav. Naaiv deix sic se weic bun cing meih mbuo zien-zien nyei sienx. Sienx fim se gauh jaaix jiex jiem. Maiv gunv jiem haih zitc corc oix zuqc longc douz sinx. Hhangv naaic, oix zuqc seix mangc meih mbuo nyei*

*siex fim. Taux Giduc aengx daaih wuov hnoi, Tin-Hungh Ziouc ceng meih mbuo taaih meih mbuo, bun meih mbuo duqv njang-laangc."*

- b) Naanc zingh haih tengx mbuo nyei siex fim hlo: Yaagorpc 1:2-5** “*Yie nyei gorx-youz aac, meih mbuo buangh zuqc nyungc-nyungc kouv naanc oix zuqc funx benx njien-youh nyei sic. Weic zuqc meih mbuo hiuv duqv buangh naaiv deix sic se siex mangc meih mbuo nyei siex fim, weic bun meih mbuo maaih noic diev duqv. Oix zuqc longc noic diev taux daauh weic bun meih mbuo haih benx dunh yunh nzoih nyei mienh, maiv caa yietc nyungc...*”

[Nyungc zeiv yiem yie mbuo nyei hmuangv doic: Yie mbuo yietc biauiv mienh weic yie nyei youz Saan buangh nyei naanc zingh zoux bun yie mbuo gauh nitv fatv gauh bungz hnyouv Tin-Hungh. Yie mbuo hiuv duqv Tin-Hungh gengh kaux duqv wuonv yiem buangh zuqc sic nyei ziangh hoc.]

## **G. Naanc zingh zoux bun mbuo gauh haih korh lienh mienh**

### **1. Baulo gorngv taux naanc zingh duqv nyei:**

- a) **2 Ko<sup>^</sup>lin<sup>^</sup>to 1:3-4** “*Mbuo oix zuqc ceng mbuo nyei Ziouv Yesu nyei Die, Tin-Hungh, dongh korh lienh mienh nyei Zangc Diex, Yaac zanc-zanc orn mbuo nyei hnyouv nyei Tin-Hungh. Mbuo maaih nyungc-nyungc kuonx naanh ninh orn mbuo nyei hnyouv, weic bun mbuo aengx haih orn buangh zuqc haaix nyungc kuonx naanh nyei mienh nyei hnyouv. Tin-Hungh hnavg haaix nor orn mbuo nyei hnyouv, mbuo yaac hnavg wuov nor haih orn mienh nyei hnyouv.*”
- b) Mbuo buangh naanc zingh haih tengx mbuo gauh haih tengx ganh dauh dongh ninh mbuo buangh zuqc nyei ziangh hoc.
- c) Yo<sup>^</sup>han gorngv, “*Yie, Yo<sup>^</sup>han, zoux meih mbuo nyei gorx-youz. Mbuo caux Giduc juangc maengc ziangh, yie ziouc caux meih mbuo lomh nzoih siouc kouv, longc noic diev, yaac juangc zoux Tin-Hungh nyei guoqv nyei baeqc fingx. Weic yie zunh Tin-Hungh nyei doz yaac tengx Yesu zoux zorng-zengx, yie zuqc yiem Batc<sup>^</sup>mortv Koiv-Nzou*” (**Laauc Yaangh 1:9**).

### **2. Mbuo maiv haih bieqc hnyouv mienh buangh nyei sic cuotv liuz mbuo yaac duqv buangh jiex:**

- a) Mbuo buangh naanc zingh weic haih orn ganh dauh mienh.
- b) Buangh zuqc nyei kouv naanc bun mbuo haih caux jienv mienh nzauh yaac bun mbuo gauh haih tengx mienh –  
**Lomaa 12:15** “*Mienh njien-youh, oix zuqc caux jienv njien-youh. Mienh nyiemv oix zuqc caux jienv nyiemv.*”

## **H. Naanc zingh njaaux mbuo hnavg haaix nor daux gauh**

### **1. Mienh weic ziex nyungc daux gauh:**

- a) Mbuo daux gauh liuz nyanc hnavgx, daux gauh liuz bueix njormh, daux gauh weic ziex nyungc; mv baac, naanc zingh bun mbuo daux gauh duqv horpc.

### **2. Yiem naanc zingh mbu'ndongx mbuo horpc hnavg haaix nor daux gauh:**

- a) Ziepc zuoqv nyei, diev jienv nyei daux gauh.
- b) “Njunh jienv nyei”: **Lomaa 8:26** “*Fih hnavg nyei, mbuo mau haic, Singx Lingh njunh jienv gorngv maiv cuotv waac tengx mbuo tov Tin-Hungh.*”

### **Nzutv Zunv Gorngv:**

1. Mbuo haih jiex gorn buatc yaac bieqc hnyouv gorngv weic haaix diuc Tin-Hungh bun sienx Ninh nyei mienh maaih, fai buangh zuqc naanc zingh. Mbuo yaac buatc Tin-Hungh nyei korh lienh hnyouv caux Ninh ziepc zuoqv nyei laangh fim. Mbuo ziouc haih bungx hnyouv Ninh.
2. Se gorngv mbuo mangc “naanc zingh” yiem baamh mienh nyei m’zing nor mbuo maiv haih bieqc hnyouv weic haaix nyungc mbuo zuqc buangh zuqc naanc zingh.
3. Mbuo oix jangx jienv Isaiah nyei waac: I<sup>^</sup>saa<sup>^</sup>yaa 55:8-9 "*Ziouv gorngv, Yie hnamv nyei sic se maiv hnavg meih mbuo hnamv nyei. Yie nyei jauv yaac maiv hnavg meih mbuo nyei jauv. 9 Weic zuqc lung h leih ndau ndongc haaix hlang, yie nyei jauv leih meih mbuo nyei jauv, yie hnamv nyei sic yaac leih meih mbuo hnamv nyei sic ndongc wuov hlang.*"
4. Se gorngv mbuo mangc “naanc zingh” nyei sic tong Ziouv nyei m’zing nor mbuo jiex gorn buatc yaac bieqc hnyouv taux weic haaix diuc mbuo maaih naanc zingh. Tin-Hungh mbenx jienv mbuo.....
5. Mbuo oix zuqc jangx jienv, mbuo buangh naanc zingh se maiv zeix gorngv Tin-Hungh maiv hnamv mbuo...Ninh hnamv mbuo camv: **Lomaa 8:35-39** "*Giduc hnamv mbuo, haaix nyungc zoux bun mbuo nqaeqv ndutv? Naanc zingh fai? Kuonx hnyouv nyei sic fai? Zuqc mienh zoux doqc fai? Ngorc hnaangx fai? Laaix jomc maiv maaih lui-houx zuqv fai? Haih hoic maengc nyei sic fai? Zuqc daix daic fai? Hnavg Ging-sou fiev jienv gorngv, Weic meih yie ziangh hnoi zuqc mienh daix jienv yiem. Yie mbuo hnavg zuqc ken mingh daix nyei ba’gi yungh nor. Yiem naaiv deix yietc zungv nzaic zingh, Giduc, dongh hnamv mbuo wuov dauh, bun mbuo hingh jiex nzengc. Yie sienx dingc Tin-Hungh hnamv mbuo yaac maiv maaih haaix nyungc haih nqaeqv ndutv bun ninh maiv hnamv, maiv gunv ziangh fai daic, fin-mienh fai mienv, haaix nyungc maaih lingc maaih qaqv nyei, ih zanc cuotv daaih nyei sic fai nqa’haav hingv nyei sic, yiem gu’nquaaic lung h fai ga’ndiev ndau nyei, fai haaix nyungc zeix daaih nyei maanc muotc. Tin-Hungh longc mbuo nyei Ziouv Giduc Yesu biux mengh ninh hnamv mbuo yaac maiv maaih haaix nyungc haih nqaeqv ndutv bun Tin-Hungh maiv hnamv."*

### **Hoqc Bungx Hnyouv Ziouv (Da’juov Ginc):**

### **Bungx Hnyouv Ziouv Yiem Naanc Zingh Nyei Gu'nyuoz**

**Ging-sou yiem: Singx Nzung 56:3-4** "*Yie gamh nziex nyei ziangh hoc yie kaux meih. 4 Yie kaux Tin-Hungh, dongh yie ceng ninh nyei waac wuov dauh, yie kaux Tin-Hungh, yie zungv maiv gamh nziex. Baamh mienh haih zoux haaix nyungc bun yie?"*

### **Gorngv jiex gorn nyei waac:**

Mbuo duqv hoqc taux gorngv naanc zingh bun longx nyei sic cuotv daaih:

- a. Naanc zingh bun mbuo maiv hanc baamh gen
- b. Naanc zingh bun longx nyei sic cuotv (naanc zingh bun mbuo maaih noic diev...)

- c. Naanc zingh bun mbuo nyei win-wangv sekv (hnavgv Yopv nor)
- d. Naanc zingh bun mbuo laengz zingh Tin-Hungh nyei fuqv
- e. Naanc zingh bun mbuo maiv bangc ganh mv baac bangc Ziouv
- f. Naanc zingh sinx/seix mangc mbuo nyei sienx fim (1 Bi-De 1:6-7; Yaagorpc 1:2-5)
- g. Naanc zingh bun mbuo haih orn mienh nyei hnyouv (2 Ko<sup>^</sup>lin<sup>^</sup>to 1:3-4)
- h. Naanc zingh bun mbuo gauh haih dauh gauh

Mbuo jiex gorn bieqc hnyouv gorngv weic haaix diuh Tin-Hungh bun mbuo buangh naanc zingh. Naaiv se **maiv zeiz** gorngv Tin-Hungh bun maaih naanc zingh, naanc zingh maiv zeiz yiem Ninh jiex gorn. Ih zanc mbuo oix hoqc taux haaix dauh bun naanc zingh hoic mbuo. Yie ganh yaac maaih camv nyei maiv bieqc hnyouv taux naanc zingh nyei javv mv baac dongh yie njaaux nyei, yie sienx gorngv yiem Ging-sou bun cing mbuo hiuv, mbuo cingx daaih oix zuqc hoqc bieqc hnyouv. Mbuo mangc Ndaa<sup>^</sup>witv nyei maengc yaac haih hoqc duqv gorngv dongh mbuo maaih gamh nziex kouv naanc fai naanc zingh nyei ziangh hoc mbuo oix zuqc bungx hnyouv Ziouv. Mbuo hiuv duqv mengh nyei gorngv Ndaa<sup>^</sup>witv se zoux yietc laanh baeng mienh, zoux hungh, mv baac ninh zingx nyei gorngv maaih ziangh hoc ninh maaih gamh nziex, maaih kouv naanc nyei. Ninh ginv bungx hnyouv Ziouv maiv gunv buac cing gorngv maaih gamh nziex fai maaih hoic nyei sic, weic zuqc Tin-Hungh caux yiem maiv gunv zuqc mienh, zuqc mienv hoic. Tin-Hungh zanc-zanc gouh jienv Ninh nyei naamh nyouz. Jangx jienv oc, bungx hnyouv Ziouv, sienx liuz Ziouv mv baac zuqc buangh zuqc kouv naanc naanc zingh nyei, weic mbuo yiem maaih zuiz nyei dorngx. Mv baac maaih eix-leiz gorngv mbuo bungx hnyouv Ziouv zoux nyei gong yiem mbuo nyei maengc maiv gunv zuqc gingh borqc. Mbuo buangh nyei naanc zingh, kouv naanc, ging-borqc se yiem haaix daaih?

### Gorngv Mengh caux muonc Ging-sou:

#### I. Nyungc baav naanc zingh se mbuo ganh zoux hoic zuqc mbuo ganh.

A. Tin-Hungh zeix lungh, zeix ndau daaih, maaih leiz gouh jienv zeix daaih nyei ga'naaiv.

1. Leiz gorngv zuangx ziouc duqv siou (*Gaa<sup>^</sup>laa<sup>^</sup>tie. 6:7* “Maiv dungx nduov ganh, maiv maaih haaix dauh haih nduov duqv Tin-Hungh. Meih zuangx haaix nyungc ziouc siou duqv wuov nyungc. Se gorngv mienh sueih ganh nyei hnyouv hanc zoux se hnavgv zuangx nyim njiec ndau nor, siou daaih nyei se bun ninh zuqc daic. Mv baac mienh ei Singx Lingh zuangx, Singx Lingh ziouc bun ninh siou daaih nyei se yietc liuz nyei maengc.”)
2. Maaih camv nyungc kouv naanc, naanc zingh, fai zuqc diev nyei sic weic mbuo ganh zoux hoic zuqc ganh. Maaih camv nyungc baengc weic ganh zoux nyei zuiz hoic zuqc. (Nyungc zeiv maaih camv hopv diuv caux buov in hoic piom, hoic lipc zeiv, cie zong jaax, zoux maiv luonx horngc nyei sic maaih baengc, sauv maiv hingh ganh zoux hoic ganh fai hoic hmuangv doic nyei sic.)

B. Zoux dorngc zeix nyei leiz, zuiz nyie jaax-zinh hniev haic.

1. Dorngc leiz nyei nyungc zeiv se hngangv naaiv, tiux mingh cie nyei wuov ndaangc cie ziouc zong daic. Biu njiec mbaengx ziouc ndortv daic...naaiv se pou-tong zeix daaih nyei leiz.
2. Nyanc maiv longx nyei ga'naaiv sin ziouc maiv wangc siangx aqv. Dorh ga'naaiv daaih dapv sin dorngc Tin-Hungh zeix sin haih zipv nyei ziouc hoic ganh nyei sin, yaac hoic goux meih nyei mienh.
3. Bun waaic nyei ga'naaiv bieqc sin, sin ziouc maaih baengc aqv. Mv baac zuiz nyei jaax-zinh za'gengh hniev haic. Lomaa 6:23 *"Weic zuqc zuiz nyei gong-zinh se bun mienh zuqc daic..."*

## II. Nyungc baav naanc zingh se mienv hoic mbuo

- A. Ging-sou mengh nyei gorngv Saadaan hoic mienh zoux bun mienh maaih naanc zingh.
  1. Yiem Yopv nyei naanc zingh (Yopv **1:6-12; 2:1-6**) mbuo haih buatac cing nyei gorngv mienh zanc-zanc lorz qiangx daaih hoic, daaih ging-borqc, daaih gox Giduc mienh.
  2. Zoux hoic sienx Tin-Hungh nyei mienh yiem **1 Bide 5:8-9** *"oix zuqc ging hnyouv mbungh jienv, Meih mbuo nyei win-wangv, mienv nyei hungh, hngangv sienh nor njunh jienv mingh mingh daaih daaih lorz mienh ngaatc nyanc."*
  3. Saadaan nyei mouz deic se bun Giduc mienh houv Tin-Hungh, hemx Tin-Hungh dongh ninh mbuo buangh zuqc naanc zingh nyei ziangh hoc hngangv Yopv nyei auv gorngv wuov nor (Yopv 2:9).
- B. Weic haaix nyungc Tin-Hungh bun Mienv hoic mbuo bun mbuo maaih naanc zingh?
  1. Weic zuqc Tin-Hungh haih longc mbuo buangc zuqc nyei naanc zingh bun mbuo gan longx Ninh! Naanc zingh haih sinx mbuo nyei sienx fim. Maiv gunv naanc zingh fai kouv naanc se aqc bun mbuo mv baac bungx hnyouv Ziouv se sienx fim. Kungx Singx Lingh ganh haih bun Ziouv nyei waac nangh daaih yiem mbuo nyei maengc, bun mbuo haih sienx Ninh nyei waac. Se gorngv mbuo sienx Ziouv mbuo yaac ginv sienx Ninh nyei waac.
  2. Baulo maaih ceix baqv jienv ninh - **2 Ko<sup>lin</sup>To 12:7-10** *"Hngangv ceix baqv jienv, naaiv diuh ceix se hngangv Saadaan nyei bou, hoic jienv yie, bun yie maiv haih ceng-hlo jeix jaax...dauz gauz tov buo nzunc...Ziouv dauh 'Meih duqv yie nyei en ziouc gauz aqv. Weic zuqc mieh mau nyei ziangh hoc yie nyei qaqv se gauh henv jiex."*
  3. **Ya<sup>gorpv</sup> 1:2-4**, *"Buangh nyungc-nyungc sic se weic seix mangc sienx fim. Longc noic diev taux daauh weic bun meih mbuo haih benx dunh yunh nzoih nyei mienh, maiv caa yietc nyungc."*
  4. Tin-Hungh hngangv haaix nor tengx dongh diev duqv hingh wuov deix? **1 Bide 5:10** *"Mv baac zuov meih mbuo zuqc siouc kouv caamx baav liuz, ceix nyungc-nyungc en nyei Tin-Hungh, dongh heuc meih mbuo caux Giduc juangc maengc ziangh yeite liuz juangc ninh nyei njang-laangc wuov dauh, oix bun meih mbuo dunh yunh, sienx henv yaac sienx wuonv."*

## C. Mienv haih zoux dongh Tin-Hungh bun ninh zoux nyei hngangv

1. Mienh maiv haih zoux jiex ndangc dongh Tin-Hungh bun ninh zoux nyei (Yopv 2:6 "...cuotv liuz ninh nyei maengc"). Tin-Hungh maiv bun Mienv zorqv Yopv nyei maengc...kungx hoic ninh hngangv. Bun cing Mienv maiv maaih qaqv cuotv liuz Tin-Hungh bun nyei.
2. Baulo fiev fienv bun Ko<sup>lin</sup>to Jiu-baang: *“Meih mbuo buangh zuqc nyungc-nyungc seix hnyouv nyei sic se baamh mienh aah loh buangh nyei sic. Mv baac Tin-Hungh kaux duqv wuonv nyei, **maiv bun meih mbuo zuqc seix jiex ndaangc meih mbuo nyei qaqv. Zuqc seix wuov zanc, Tin-Hungh oix bun meih mbuo maaih jauv ciex duqv cuotv ziouc maaih qaqv diev duqv hingh (1 Ko<sup>lin</sup>to 10:13).***
3. Tin-Hungh bun Mienv hoic mbuo sienx Tin-Hungh nyei mienh. *Mbuo nyei win-wangv, mienv nyei hungh, hngangv sienh nor njunh jienv mingh mingh daaih daaih lorz mienh ngaatc nyanc. Mienv oix mbuo houv Tin-Hungh mv baac weic Tin-Hungh nyei en, ninh bun mbuo maaih qaqv zuqc seix wuov zanc, Tin-Hungh bun mbuo maaih jauv ciex duqv cuotv yaac maaih qaqv diev duqv hingh, bun mbuo dunh yunh, sienx henv yaac sienx wuonv.”*

### III. Nyungc baav naanc zingh se mienh zoux hoic mbuo

#### A. Naanc zingh se mbuo fai mienh zoux nyei sic.

1. Mbuo zoux nyei zuiz hoic zuqc ganh, yaac hoic zuqc hmuangv doic. Mbuo zoux dae maa nyei mienh zoux nyei zuiz hoic zuqc hmuangv doic. Nyungc zeiz se gorngv domh mienh mingh zoux zuiz hienx auv hienx nqox, bun nqoi doic hoic zuqc fu'jueiv. Nqox zoux nyei zuiz ganh zuqc ndaam-dorng mv baac hoic zuqc auv caux fu'jueiv hmuangv doic. Auv zoux nyei yaac fih hngangv, fu'jueiv zoux nyei yaac fih hngangv.
2. Mbuo maiv haih gorngv yiem Jiu-bang mienh zoux hoic zuqc ninh mbuo ganh hngangv. Jiu-bang mienh zoux nyei zuiz bun mienh ging-borqc Tin-Hungh, ging-borqc jiu-bang, ging-borqc hmuangv doic. Weic naaiv mbuo cingx oix zuqc laanh goux laanh, laanh orn laanh, laanh mangc laanh.
3. Mbuo hiuv duqv dingc maiv gunv haaix nyungc “Tin-Hungh yietc liuz maiv leih mbuo” (Hipv<sup>lu</sup> 13:5). Mbuo maiv zuqc cai gorngv Tin-Hungh nitv fatv mbuo. Maaih ziangh hoc weic mbuo zoux nyei zuiz mbuo ganh mingh leih go Tin-Hungh. Se gorngv mbuo zaah liuz ganh nyei hnyouv, nyiemc ganh zoux nyei zuiz liuz, mbuo oix zuqc bungx hnyouv Tin-Hungh weic Ninh za'gengh longx haic. Maiv gunv mbuo hngangv haaix nor hnamv, mbuo hiuv duqv dingc gorngv Tin-Hungh se mbuo nyei ndauh kaux dorngx. Hoqc bungx hnyouv Ziouv se mbuo ginv dingc yiem hnyouv, yiem hnamv nyei, caux yiem nyei za'eix. Mbuo hiuv duqv cingx haih bungx hnyouv.

#### B. Mbuo zuqc naanc zingh weic mbuo siou zuqc mienh zuangx nyei orqv sic.

1. Aqc nyei, se gorngv mbuo siou zuqc mienh zuangx nyei waaic sic.
2. Mbuo nyei cie zong jaax weic ganh dauh mienh diuv nquin koi cie.
3. Domh mienh zoux zuiz hoic zuqc fu'jueiv fai fu'jueiv zoux zuiz hoic domh mienh.
4. Mbuo mangc buac Yo<sup>sepv</sup> nyei maengc yiem Tin-deic douh 37-50 zang, mbuo buac cing nyei Yo<sup>sepv</sup> zuqc mienh zoux hoic ninh buangh ziex nyungc

kouv naanc mv baac ninh buac cing gorngv naaic se Tin-Hungh longc liuc leiz ninh nyei maenge ei jienv Ziouv nyei za'eix. (Tin-deic douh 50:20 "*Meih mbuo daav za'eix hoic yie, mv baac Tin-Hungh longc wuov nyungc za'eix zoux longx nyei sic. Hnangv ih zanc mbuo buac jienv nor, ninh longc naaiv nyungc za'eix njoux mienh camv nyei maengc.*")

5. Mbuo haih bungx hnyouv Tin-Hungh maiv gunv mienh zoux hoic mbuo, weic zuqc Tin-Hungh se kaux duqv wuonv nyei gorn-ndoqv, mbuo haih kaux duqv wuonv weic mbuo nyei sienx fim se yiem Ninh nyei waac, Ging-sou. Mbuo jaa hiiuv duqv Ziouv weic Ninh nyei waac, mbuo ziouc jaa bungx hnyouv Ninh.

#### IV. Benx Tin-Hungh nyei biaav-bin longc mborqv njaaux mbuo

##### A. Tin-Hungh mborqv njaaux dorngh ninh hnamv nyei mienh

###### 1. Yiem Loz-Ngaengc Waac:

- a. "Yiem meih mbuo nyei hnyouv oix zuqc hiiuv duqv Ziouv, meih mbuo nyei Tin-Hungh, mborqv njaaux meih mbuo hnangv die mborqv njaaux ganh nyei dorn nor" (Nzamec Leiz Latc 8:5).
- b. "Yie nyei dorn aah! Maiv dungx mangc piex Ziouv mborqv njaaux nyei waac, yaac maiv dungx youx ninh gorngv-hemx, weic zuqc Ziouv hnamv wuov laanh ninh gorngv-hemx hnangv die gorngv-hemx ninh a'hneiv nyei dorn" (Cong-mengh sou 3:11-12).
- c. Lewi 26:21, 24, 28 "*Se gorngv meih mbuo corc ngaengc jienv maiv kangv muangx yie, yie ziouc bun zeqc naanc hoic meih mbuo ziux meih mbuo zoux nyei jaa dingc zuiz taux siec bounc.*"

###### 2. Yiem Siang-Ngaengc Waac:

- a. "*Da'faanh yie hnamv nyei mienh yie gorngv hemx yaac mborqv njaaux, hnangv naaic meih mbuo oix zuqc jorm daaih goiv hnyouv guangc meih nyei zuiz*" (***Laauc Yaangh 3:19***).
- b. "*Meih mbuo la'kuqv Tin-Hungh kuinx meih mbuo hnangv die kuinx dorn wuov deix waac fai? Ninh gorngv, Yie nyei dorn aac, Ziouv mborqv njaaux nyei ziangh hoc oix zuqc muangx longx. Ninh gorngv njaaux nyei ziangh hoc maiv dungx hnyouv namx. Weic zuqc Ziouv hnamv haaix dauh Ninh ziouc mborqv njaaux wuov dauh. Ninh zipv haaix dauh zoux dorn, ninh yaac longc biaav fitv wuov dauh. Meih mbuo zuqc diev nyei kouv naanc se weic mborqv njaaux. Tin-Hungh zoux bun meih mbuo hnangv zoux bun ninh nyei dorn jueiv nor. Maaih haaix dauh dorn jueiv maiv zuqv ninh nyei die mborqv njaaux jiex. Se gorngv meih mbuo maiv hnangv ninh nyei zuangx dorn zuqc mborqv njaaux, meih mbuo maiv ziez cien dorn, kungx zoux fu'jueiv toi hnangv.*" (***Hiv^lu 12:5-8***)

##### B. Tin-Hungh weic haaix nyungc mborqv njaaux ninh nyei naamh nyouz?

1. Maiv zeiz gorngv Tin-Hungh oix mv baac qiemx zuqc (***Ndortv Naanc Nzung 3:31-33***).
2. ***Hiv^lu 12:9*** "*Mbuo nyei cien die mborqv njaaux mbuo, mbuo yaac mbuoqc ninh. Hnangv naaic mbuo yietc zei oix zuqc mbuoqc mbuo nyei tin-dorngh Diex ziouc duqv ziangh jienv.*"



3. **Hipv^lu 12:10** “*Mbuo nyei die mborqv njaaux mbuo se ziux ninh mbuo buatc horpc zuqc njaaux nyei yaac weic dangh baav hnavg. Mv baac Tin-Hungh mborqv njaaux mbuo se weic bun mbuo duqv longx yaac weic bun mbuo hnavg ninh nor CING-NZENG.*”
4. **Hipv^lu 12:11** “*Zuqc mborqv njaaux wuov zanc maiv maaih haaix dauh njien-youh, zungv haiz nzauh nye. Mv baac zuqc mborqv njaaux liuz, hoqc hiuv nyei mienh nqa’haav ziouc duqv horpc yaac maaih baengh orn.*”
5. **1 Ko^lin^to 11:32** “*Mv baac Ziouv dingc mbuo nyei zuiz yaac mborqv njaaux mbuo weic bun mbuo maiv zuqc caux baamh mienh dingc zuiz.*”

### C. Tin-Hungh haaix zanc mborqv njaaux mbuo?

1. **1 Ko^lin^to 11:31** “*se gorngv mbuo zaah ganh nyei hnyouv ndaangc ziouc maiv zuqc Tin-Hungh dingz zuiz.*”
2. **1 Ko^lin^to 11:32** “*Mv baac Ziouv dingc mbuo nyei zuiz yaac mborqv njaaux mbuo weic bun mbuo maiv zuqc caux baamh mienh dingc zuiz.*”
3. Tin-Hungh hnavg haaix nor mborqv njaaux ninh nyie mienh? Tin-Hungh hnavg haaix nor mborqv njaaux I^saa^laa^en mienh (**Amos 4:6-12**).
  - a. Longc zeix daaih nyei ga’naaiv hoic mienh
  - b. Lewi 26:16 Liemh zaih zuqc domh heiv sic, butv domh zeqc naanc, butv sin jorm baengc, maengc maanc-maanc kou nqaai nzengc; 26:19 bun lungh haanz, bun ndau mbang, 26:22 bun hieh zoih bieqc mbuo mbu’ndongx; 26:25 butv domh wuon-baengc...
  - c. Tin-Hungh mborqv weic oix bun I^saa^laa^en mienh goiv hnyouv guangc zuiz. Ih hnoi yaac fih hnavg nyei Ninh mborqv weic oix zuiz-mienh goiv hnyouv, maiv zeiz gorngv Ninh maiv hnamv cingx mborqv njaaux (**1 Ko^lin^to 11:30-32; Lauc Yaangh 2:20-23**).

### Nzutv Norz Waac/Ei Ging-sou:

1. **Dongh mbuo buangh zuqc naanc zingh yiem mbuo nyei maengc, nyungc baav se:**
  - a. Mbuo ganh zoux hoic zuqc mbuo ganh, mbuo siou dongh mbuo zuangx nyei. Hnavg zuangx gaengh zuangx nyei leiz nor.
  - b. Nyungc baav naanc zingh se Mienv zoux hoic mbuo, nyungc baav se mienh zoux hoic mbuo.
  - c. Mbuo naaic gaax ganh, mbuo se horpc Tin-Hungh nyei fai?
    1. (2 Ti^mo^tai 3:12 "*Haaix dauh oix caux Giduc Yesu juangc maengc ziangh, gan longx Tin-Hungh, wuov dauh ziouc zuqc mienh zoux doqc.*")
    2. Mbuo zuqc buangh se weic mbuo gan longx Tin-Hungh fai mbuo siou dongh mbuo zuangx nyei?
    3. Mienv oix hoic mbuo, oix mbuo doit-dekc Tin-Hungh (Matv^tai 4:1-11).
2. **Nyungc baav se benx Tin-Hungh nyei biaav-bin, longc mborqv njaaux mbuo:**
  - a. Se gorngv ninh mborqv se weic...
  - b. Ninh hnamv mbuo, buatc mbuo mingh dorngc jauv oix ken mbuo nzuonx.
  - c. Tin-Hungh oix mbuo hnamv mangc dongh mbuo zoux nyei...ziouc longc Ninh zeix daaih nyei ga’naaiv mborqv njaaux mbuo.

- d. Mbuo hnavg haaix nor haih hiuv duqv gorngv mbuo buangh nyei naanc zingh se mbuo siou dongh mbuo zuangx nyei, fai mienv hoic, fai Tin-Hungh mborqv njaaux?
- e. Mbuo maiv haih hiuv duqv cuotv liuz mbuo zoux nyei zuiz gengh mengh.
- 3. Se gorngv mbuo buangh zuqc naanc zingh nor mbuo oix zuqc hnavg haaix nor zoux?**
- a. Tin-Hungh mborqv njaaux fai? Longc ziangh hoc zaah ganh nyei maengc, daaih nitv fatv Tin-Hungh.
- b. Maiv gunv haaix nyungc mbuo haih mingh nitv fatv Tin-Hungh fai leih go Tin-Hungh, dongh mbuo buangh zuqc naanc zingh nyei ziangh hoc...tov ginv mingh nitv fatv Tin-Hungh.
- c. Oix zuqc jangx jienv 1 Bide 5:7 gorngv nyei waac, "*Oix zuqc zorqv yietc zungv you-nzauh guangc bun ninh weic zuqc ninh goux jienv meih mbuo.*" Tin-Hungh cau-fim taux mbuo nyei maengc, mbuo oix zuqc zorqv mbuo buangh nyei yietc zungv youh nzauh, kouv naanc, naanc zingh mbuox Ninh. Tov Ninh tengx mbuo, bun mbuo haih diev duqv bun mbuo haih hingh jiex weic Ninh goux jienv mbuo. Ninh hnamv mbuo bun Ninh nyei ndoqc dorn Yesu daaih daic weic mbuo. Ninh hnamv mbuo Ninh hiuv duqv mbuo nyei sic. (Matv<sup>^</sup>tai 10:30 "*Liemh meih mbuo nyei mba'biei zungv saavv nzengc mi'aqv*".) Yesu gorngv, "*Hnavg naaic maiv dungx gamh nziex. Meih mbuo zungv gauh jaaix jiex norqc meix camv*" (Matv<sup>^</sup>tai 10:31). Zorqv wuov joux waac maaih eix-leiz gorngv ginv, weic Tin-Hungh nyei waac, weic Singx-Lingh nyei qaqv bun mbuo, mbuo haih ginv bungx hnyouv Ziouv weic Ninh gorngv nyei waac.
- 4. Mbuo hnavg haaix nor haih mbenc jienv mbuo nyei maengc ndangc buangh zuqc naanc zingh nyei ziangh hoc:**
- a. **Mbuo haih bungx hnyouv Tin-Hungh laengz nyei ngaengc waac:** Longx nyei ziangh hoc hungh heic bungx hnyouv, buangh zuqc sic nyei ziangh hoc yaac horpc zuqc haih bungx hnyouv. Longx nyei ziangh hoc horpc zuqc laengz zingh, daux gaux caux Ziouv gorngv waac. Nzauh nyei ziangh hoc yaac horpc zuqc laengz zingh daux gaux fih hnavg (**Gorngv seix zangc 7:14** "*Buangh zuqc njien-youh nyei ziangh hoc oix zuqc orn-lorqc. Buangh zuqc kouv nyei ziangh hoc, oix zuqc longx-longx nyei hnamv. Njien-youh caux kouv naanc, i nyungc zungv Tin-Hungh bun daaih, weic bun mienh zaah maiv cuotv, yiem ninh nyei hoz nqaang oix maaih haaix nyungc sic*".) Baamh mienh duqv longx nyei ziangh hoc maiv cai Tin-Hungh, mv baac buangh zuqc kouv nyei ziangh hoc jiex gorn cai yaac la'kuqv Tin-Hungh nyei en.
- b. **Yiem Loz-Ngaengc Waac: Singx Nzung 46:1-3** "*Tin-Hungh zoux yie mbuo ndaauh kaux nyei dorngx yaac zoux yie mbuo nyei qaqv; Yie mbuo haaix zanc buangh zuqc kouv naanc ninh yaac tengx. Weic naaiv yie mbuo maiv gamh nziex...; 55:22 "Zorqv meih nyei kouv naanc fungx bun Ziouv ninh zungv oix baav jienv meih, Ninh yietc liuz maiv bun kuv mienh zuqc ndanc dongz."*
- c. **Yiem Siang-Ngaengc Waac: Lomaa 8:35-39** "Maiv maaih haaix nyungc leih bun Tin-hungh maiv hnamv mbuo"; **1 Bide 5:7** "*Oix zuqc zorqv yietc zungv youh nzauh guangc bun ninh (Tin-Hungh) weic zuqc ninh goux jienv mbuo.*"

**5. Maaih naanc zingh nyei ziangh hoc Tin-Hungh tengx mbuo:**

- a. **Naa^hum 1:7** “Ziouv se longx haic. Yiem kouv naanc nyei ziangc hoc ninh zoux kaux duqv wuonv nyei dorngx. Ninh yaac goux daaih kaux ninh nyei mienh.”
- b. **I^saa^yaa 26:4** “Oix zuqc yietc liuz kaux Ziouv, weic zuqc Ziouv Tin-Hungh se yietc liuz yiem nyei la’beiv.

**6. Daux gaux caux Ziouv jiu tong, longc ziangh hoc caux Ziouv gorngv waac.**

- a. Maiv dungx weic haaix nyungc guaax hnyouv. Oix zuqc weic nyungc-nyungc sic daux gaux jough Tin-Hungh, laengz zingh Tin-Hungh, ei meih mbuo qiex longc nyei tov ninh tengx. Tin-Hungh nyei baengh orn, dongh baamh mienh zungv hnamv maiv zaaic nyei baengh orn, ziouc beu jienv meih mbuo nyei hnyouv caux hnamv nyei jauv, weic zuqc meih mbuo caux Giduc Yesu juangc maengc ziangh” (Fi^lipv^poi 4:6-7).
- b. Daux gaux wuov zanc oix zuqc longc sienx fim, wuov dauh nyei baengc ziouc longx aqv...Kuv mienh daux gaux, ninh nyei daux gaux waac maaih qaqv yaac lingh haic (Yaagorpc 5:15-16).
- c. Singx Nzung 66:18 “Se gorngv yie sueih zuiz yiem yie nyei hnyouv, Ziouv zungv maiv muangx yie.”
- d. I^saa^yaa 59:1-2 “Mangc maah! Ziouv nyei buoz maiv zeiz nangv, maiv haih njoux meih mbuo, ninh nyei m’normh yaac maiv zeiz ndung maiv haih muangx meih mbuo. *MV BAAC* meih mbuo nyei zuiz bun meih mbuo caux meih mbuo nyei Tin-Hungh nqaevq jienv. Meih mbuo nyei zuiz torngv ninh nyei hmien, bun ninh maiv muangx meih mbuo.”
- e. Yo^han 9:31 “Mbuo hiuv duqv Tin-Hungh maiv muangx baamz zuiz mienh nyei waac, Mv baac haaix dauh taaih Tin-Hungh ei jienv ninh nyei eix zoux, ninh muangx wuov dauh.”
- f. 1 Yo^han 1:9 “Se gorngv mbuo nyiemc mbuo nyei zuiz, Tin-Hungh se ziepc zuoqv nyei, baengh fim nyei, ziouc guangc mbuo nyei zuiz caux mbuo zoux nyei yietc zungv waaic sic, fioux mbuo cing-nzengc daaih.”
- g. Bungx hnyouv Ziouv laengz nyei waac, yaac ziux *yiex fei fangv/fiem fangv* Ziouv nyei waac. Zanc-zanc caux Ziouv jiu-tong/daux gaux caux Ninh gorngv waac.

**Hoqc Bungx Hnyouv Ziouv (Da’ziepc Ginc):**

**Bungx Hnyouv Caux Laengz Zingh Ziouv Yiem Maanc Sic**

**Ging-sou yiem : 1 Te^saa^lo^ni^gaa 5:18** "*Yiem maanc sic oix zuqc laengz zingh Tin-Hungh. Meih mbuo caux Giduc Yesu juangc maengc ziangh, Tin-Hungh ziouc oix meih mbuo hnangv naaiv nor zoux.*"

**Gorngv jiex gorn nyei waac:**

Mbuo mouz laanh mienh maaih sic, maaih youh nzauh, maaih ziangh hoc buangh naanc zingh. Maaih camv nyungc ging-borqc fai zuqc ndaam yiem seix zangc. Maiv gunv zuqc buangh haaix nyungc sic, naaiv deix sic maiv horpc zuqc zoux bun meih naamx hnyouv Ziouv,

naamx hnyouv meih sienx nyei, fai guangc meih sienx nyei. Mbuo buatc yietc laanh mienh heuc Yopv - ninh liemh zeih zuqc mienv gorngv hoic ninh zuqc buangh zuqc camv nyungc sic. Ninh liemh zeih ndortv nzengc ninh maaih nyei zinh zoih, ndortv nzengc ninh nyei hmuangv doic zengc njiec ninh nyei auv hngangv. Ninh ndortv ninh nyei sin zangc wangc siangx nyei. Ninh ndortv nzengc ninh nyei doic. Ninh zuqc ninh nyei doic gorngv hoic, zuqc auv ngopv ninh guaix ninh. Mbuo duqv buangh zuqc hngangv ninh buangh nor zungv haiz kouv, mv baac zuqc liemh zeih buangh naaiv deix yietc zungv za'gengh hniv haic. Mv baac mbuo buatc Yopv hngangv naaiv nor zoux, "*Yopv ziouc jiez sin daaih betv ninh nyei lui, yaac teix ninh nyei m'nqorngv, puoqv njiec ndau baaix*" (Yopv 1:20). Yiem Yopv buangh nyei ninh hoqc duqv cing nyei gorngv Ziouv za'gengh longx haic, Ninh za'gengh korh lienh mbuo. Weic Ziouv ziepc zuoqv, longx haic, mbuo haih bungx hnyouv Ninh. Se gorngv mbuo buangh sic nyei ziangh hoc mbuo oix zuqc ginv bungx hnyouv Ziouv weic mbuo taaih Ninh, weic mbuo haih duqv maaih baengh orn nyei yiem sic nyei gu'nyouz. Maiv gunv haaix nyungc sic cuotv daaih mbuo oix zuqc ginv taaih Ziouv, mbuo dau dongh mbuo buangh nyei sic biux mengh "mbuo bungx hnyouv Ziouv" Bungx hnyouv Ziouv nyei mienh haih mangc duqv cuotv nyei yaac maaih nyungc zeiv camv nyei.

### **Gorngv Mengh caux muonc Ging-sou:**

#### **A. Bungx Hnyouv Ziouv yiem maanc sic biux mengh yiem mbuo nyei laengz zingh.**

1. Bungx hnyouv nyei fangx: Zinh ndangc maaih laanh m'sieqv mienh za'gengh maaih ziepc zuoqv hnyouv buoqc zangc Ziouv. Maaih hnoi ninh mingh wuov wuom-domh mangc fu'jueiv ziouh wuom. Ninh za'gengh a'hneiv buatc fu'jueiv camv nyei biu njiec wuom-domh. Liemh zeih maaih dauh dorn tiux taux ninh nyei nza'hmien, wuov laanh m'sieqv dorn ziouc naaic gaax ninh, "Dorn aac, meih sienx Yesu nyei fai?" Wuov dauh dorn dau, "Sienx nyei! Weic haaix nyungc meih naaic naaiv?" Wuov dauh dorn zorqv duqv kuaaiv nyaanh zeiv bun ninh, yaac gorngv, "Dorc aah, se gorngv meih sienx Yesu nyei nor tengx yie siou jienv yie nyei nyaanh oc. Yie maiv oix yie nyei nyaanh ndorn." Ninh bun jienv nyaanh wuov dauh dorc, naaic dauh dorn ziouc biu bieqc wuom-domh mingh ziouh wuom mi'aqv.
2. Baulo gorngv yiem maanc sic laengz zingh Tin-Hungh: Maiv gunv buangh longx fai kouv naanc mbuo zuqc laengz zingh, duqv fuqv fai buangh zuqc hoic mbuo horpc zuqc laengz zingh. Duqv longx se gauh hungh heic bun mbuo laengz zingh, mv baac Tin-Hungh heuc mbuo yiem maanc sic laengz zingh. Laengz zingh nyei hnyouv se maiv zeiz hungh heic maaih nyei hnyouv.
3. Mbuo oix zuqc zieqv duqv gorngv maiv maaih haaix nyungc la'guaih cuotv daaih fai ca'bouc cuotv daaih. Mbuo haih laengz zingh weic mbuo zieqv duqv Tin-Hungh nyei buoz yiem nyungc-nyungc sic. Mbuo hiuv duqv Tin-Hungh nyei mienh oix zuqc laengz zingh Tin-Hungh. Maiv dungx hngangv zuqc Tin-Hungh dingc nyei mienh weic zuqc, "*Ninh mbuo hiuv duqv Tin-Hungh mv baac maiv taaih ninh zoux Tin-Hungh yaac maiv laengz zingh ninh. Ninh mbuo hnamv nyei jauv ziouc maiv lamh longc aqv. Hnyouv hngongx yaac hmuangx mi'aqv*" (Lomaa 1:21).
4. Laengz zingh nyei hnyouv biux mengh taux mbuo bangc kaux Tin-Hungh nyei mienh. Mbuo zieqv duqv gorngv mbuo maaih ziangh maengc se yiem Tin-Hungh daaih. Gong-zoh 17:25 "*Ninh yaac maiv longc baamh mienh nyei buoz fu-sux ninh hngangv ninh qiex zuqc haaix nyungc nor. Daaux nzuonx ninh ganh bun mbuo maaih maengc, maaih qiex tauv, yaac ceix maanc muotc bun maanc mienh.*" Mbuo maaih

neyi nyungc-nyungc se yiem Tin-Hungh daaih. Baulo gorngv, "*Haaix dauh bun meih zoux gauh hlo ganh dauh? Meih maaih haaix nyungc maiv zeiz meih zipv daaih? Wuov nyungc, se gorngv meih zipv daaih, meih weic haaix diuc bungx waac-maux hnungv maiv zeiz zipv daaih nor?*" (1 Ko<sup>lin</sup> 4:7).

5. Mbuo laengz zingh Tin-Hungh yiem mbuo buangh neyi, yiem maanc sic biux mengh mbuo bungx hnyouv Ziouv. Yiem Lugaa 17:11-19 mbuo buatc taux mienh maaih gomh huv baengc duqv zorc longx mv baac maaih nduqc laanh ganh fingx mienh zieqv duqv laengz zingh Tin-Hungh. Duqv longx yaac maiv laengz zingh yaac maaih neyi. Mv baac sienx Yesu Giduc neyi mienh, yiem maanc sic laengz zingh se biux mengh meih bungx hnyouv Ziouv.
6. Mbuo haih laengz zingh Tin-Hungh yiem maanc sic se weic zuqc Ziouv za'gengh longx haic. Ninh goux jienv mbuo, Ninh hnamv mbuo, maiv gunv mbuo buangh neyi mbuo hiuv duqv Zangc Diex longc naaiv deix sic bun mbuo haih hlo yiem mbuo neyi sienx fim, haih zuangv Ninh, gauh hlo yiem Ninh, yaac bun mbuo duqv longx (Lomaa 8:28; 1 Te<sup>saa</sup>lo<sup>ni</sup>gaa 5:18). Weic maanc sic cuotv daaih bun mbuo duqv longx mbuo ziouc haih yiem maanc sic laengz zingh Tin-Hungh.
7. Mbuo haih maaih baengh orn caux orn-lorqc yiem longx fai waaic neyi sic neyi, se gorngv mbuo neyi ndauh kaux se Ziouv. Nyungc-nyungc mbuo buangh neyi jiex jienv mingh. Nyungc-nyungc sic cuotv daaih se camx baav hnungv, mbuo oix zuqc mangc jiex ndangc mbuo buangh neyi sic, mangc jiex ndangc zuqc diev kouv neyi sic, mangc taux dongh mbuo oix duqv neyi yiem wuov ndangc neyi ziangh hoc dongh Ziouv laengz ziangx bun mbuo neyi. **Baulo ganh gorngv**, "*Yie funx mbuo ih zanc buangh neyi kouv naanc maiv fungc beiv Tin-Hungh oix hinc bun mbuo neyi njang-laangc*" (Lomaa 8:18).

#### **B. Bungx hnyouv Ziouv yiem maanc sic biux mengh yiem mbuo buoqc zangc neyi sic:**

1. Mbuo haih bungx hnyouv Ziouv yiem mbuo buoqc zangc neyi dongh mbuo buangh zuqc sic neyi ziangh hoc. Yopv neyi maengc bun cing mbuo buatc taux gorngv ninh bungx hnyouv Ziouv weic ninh buoqc zangc Ziouv dongh ninh liemh zeih buangh zuqc sic. **Yopv 1:20-22** "*Yopv ziouc jiez sin daaih betv ninh neyi lui, yaac teix ninh neyi m'nqorngv, puoqv njiec ndau baaix 21 yaac gorng, Yie njang sin yiem yie neyi maa neyi ga'sie cuotv, yaac oix zuqc njang sin neyi nzuonx. Ziouv ceix bun neyi, Ziouv aengx siou nzuonx. Oix zuqc ceng Ziouv neyi mengh.*" 22 *Yiem naaiv deix yietc zungv sic, Yopv maiv baamz zuiz yaac maiv guaix Tin-Hungh.*"
2. Yopv maiv qiex jiez Tin-Hungh, maiv lieh go Tin-Hungh. Daux nzuonx ninh buoqc zangc Tin-Hungh. Ninh maiv guaix Tin-Hungh, maiv nqopv Tin-Hungh, mv baac ninh gueic njiec Tin-Hungh neyi nza'hmien, nyiemc ganh zoux faix yiem Tin-Hungh neyi nza'hmien. Ninh bungx hnyouv Tin-Hungh. Ninh zieqv duqv nyungc-nyungc se yiem Tin-Hungh bun daaih, Tin-Hungh haih zorqv nzuonx neyi. Mbuo mangc jomc Yopv wuov buonv sou nor mbuo buatc Tin-Hungh neyi qaqv, njang-laangc, caux en hlo haic bun Yopv neyi maengc. Yopv zieqv duqv zeix lungh zeix ndau wuov dauh Ziouv, buatc ganh se benx zeix daaih neyi ga'naaiv, zuiz-mienh, maiv puix, yaac piatv maiv fu-sux Tin-Hungh, piatv maiv buoqc zangc Tin-Hungh, piatv maiv muangx Tin-Hungh. Mbuo maiv zic duqv neyi (Tin-dorng) mv baac mbuo duqv weic Ziouv neyi en, mbuo horpc zuqc

duqv mv baac maiv duqv (dingc zuiz) weic Ziouv korh lienh mbuo. Nyungc-nyungc yiem Ziouv daaih weic Ninh nyei en.

3. Tin-Hungh goux jienv nyungc-nyungc. Ninh zeix nyungc-nyungc ei Ninh ganh nyei za'eix yaac weic Ninh ganh. Ninh oix korh lienh nyei Ninh ganh ginv (Cuotv<sup>i</sup>yipv 33:19).
4. Buoqc zangc Ziouv yiem naanc zingh nyei ziangh hoc fai yiem buangh zuqc sic nyei ziangh hoc biux mengh gorngv hnyouv zieqv duqv yaac nyiemc gorngv Tin-Hungh haih zoux nyungc-nyungc ei Ninh nyei za'eix yiem mbuo nyei maengc. Yaac zieqv duqv gorngv norm-norm ziangh hoc yiem mbuo nyei maengc, mbuo nyei qiex, mbuo nyei sin, mbuo maaih nyei zinh zoih fai nyungc-nyungc se Tin-Hungh bun daaih. Mbuo oix zuqc funx benx fuqv caux zingh nyeic yiem Ziouv daaih, yaac oix goux longx.
5. Weic Tin-Hungh hnamv mbuo, Ninh maiv zeiz zoux sueih Ninh ganh hoic mbuo mv baac zoux longx bun mbuo.

**C. Bungx hnyouv Ziouv yiem maanc sic biux mengh yiem nyiemc ganh zoux faix.**

1. Yiem 1 Bide 5:6-7 *"Hnangv naaic oix zuqc nyiemc ganh zoux faix yiem Tin-Hungh maaih qaqv nyei buoz-ndiev. Taux ninh dingc nyei ziangh hoc ninh ziouc taaih meih mbuo faaux. Oix zuqc zorqv yietc zungv you-nzauh guangc bun ninh weic zuqc ninh goux jienv meih mbuo."* Mbuo oix zuqc nyiemc ganh zoux faix fai mbuoqc Ziouv dongh mbuo buangh zuqc nyei sic, zorqv mbuo nyei yietc zungv youh-nzauh mbuox Ziouv, weic zuqc Ninh goux jienv mbuo. Mbuo maaih youh-nzauh weic zuqc mbuo zuqc buangh nyei sic. Pou-tong nyei mienh maiv oix dorh youh-nzauh mbuox Tin-Hungh, mv baac dorh daaih aan jienv hnyouv nzauh weic mbuo maiv nyiemc ganh zoux faix.
2. Nyiemc ganh zoux faix maiv daan biux mengh gorngv mbuo bungx hnyouv Tin-Hungh hnangv mv baac benx Singx Lingh zoux nyei gong yiem mbuo nyei maengc. Baulo gorngv mbuo buangh nyei sic, hnangv ceix baqv mbuo nor, *"Naaiv diuh ceix se hnangv Saadaan nyei bou, hoic jienv yie, bun yie maiv haih ceng-hlo jiex jaax"* (2 Ko<sup>lin</sup>to 12:7). Mbuo laanh laanh mienh maaih ziangh hoc haih ceng hlo, maiv zieqv duqv Tin-Hungh, maiv zieqv duqv ganh. Naaiv deix ceix bun mbuo haih nyiemc ganh zoux faix bangc Tin-Hungh.
3. Haaix zanc mbuo duqv nyei fuqv haih bun mbuo haih ceng hlo, Ziouv yaac bun mbuo maaih ceix weic bun mbuo maiv ceng hlo. *"Ceix, fai naanc zingh, zoux bun mbuo zieqv duqv gorngv mbuo oix zuqc bangc kaux Tin-Hungh yaac zieqv duqv Tin-Hungh nyei qaqv. Mbuo haih ginv hnangv haaix nor dau dongh mbuo buangh nyei ceix. Mbuo haih ngopv fai guaix Tin-Hungh, fai zieqv duqv gorngv Tin-Hungh bun mbuo buangh nyei weic bun mbuo haih hlo, nyiemc mbuoqc Tin-Hungh (Yaagorpc 4:6).*

**D. Bungx hnyouv Ziouv yiem maanc sic biux mengh yiem mbuo guangc mienh dorngc mbuo nyei zuiz:**

1. Maaih camv nyunge naanc zingh, kouv naanc, fai zuqc hoic nyei sic se weic mienh zoux nyei bun mbuo. Maaih mienh baac-baac oix hoic mbuo, maiv deix mienh zoux nyei hoic zuqc mbuo. Mbuo hnangv haaix nor dau se jienv yiem

- mbuo nyei maengc. Mbuo haih ginv guangc mienh zoux dorngc mbuo nyei zuiz fai ginv hietv jienv hnyouv. Ginv guaix mienh, nzorng mienh, ginv jauv win.
2. Mbuo haih guangc mienh zoux dorngc mbuo se gorngv mbuo zieqv duqv mbuo ganh se zuiz-mienh, duqv Tin-Hungh guangc mbuo nyei zuiz weic Yesu daic weic mbuo. Mbuo yaac maaih ziangh hoc zoux mun mienh nyei, maiv gunv ca'bouh fai baac-baac. Hnangv Gorngv Seix Zangc sou 7:21-22 gorngv nor, *"Maiv dungx muangx dauh dauh mienh gorngv nyei yietc zungv waac, nziex meih muangx haiz meih nyei bou zioux meih,<sup>22</sup> weic zuqc yiem meih ganh nyei hnyouv meih hiuv duqv, ziex nzunc meih ganh yaac zioux mienh."* Naaiv mengh nyei njaaux mbuo gorngv maaih ziangh hoc mienh zoux nyei hoic zuqc mbuo, maaih ziangh hoc mbuo zoux nyei hoic zuqc mienh. Maiv dungx hnyouv im bun zoux hoic mbuo nyei mienh. Oix zuqc guangc mienh zoux dorngc mbuo nyei zuiz, hnangv Tin-Hungh guangc mbuo nyei zuiz nor (E<sup>^</sup>fe<sup>^</sup>so 4:32 *"Daaux nzuonx, laanh oix zuqc zoux longx bun laanh, laanh korv-lienh laanh, yaac oix zuqc guangc laanh zoux dorngc laanh nyei sic hnangv Tin-Hungh longc Giduc guangc meih mbuo nyei zuiz wuov nor."*)
  3. Mbuo oix zuqc mangc jiex ndangc dongh hoic mbuo nyei mienh, weic Tin-Hungh maaih mouz deic bun mbuo yiem mbuo buangh zuqc nyei sic. Se gorngv Tin-Hungh bun mbuo buangh zuqc nyei sic, ndongc haaix zungv maaih nyungc dongh Tin-Hungh oix mbuo hoqc nyei, dongh Ziouv funx longx nyei bun mbuo. Ninh zoux nyei gong yiem mbuo nyei maengc, maiv gunv mienh zoux hoic mbuo nyei fai zoux nyei zuiz, mbuo haih buatc longx nyei sic yiem maengc.
  4. Mbuo buangh zuqc nyei sic, mbuo haih laengz zingh Tin-Hungh nyei, maiv zeix laengz zingh weic sic, mv baac YIEM sic. Nyungc zeiv mienh niouv cie daaih zong zuqc mbuo nyei cie. Mbuo maiv zeiz gorngv laengz zingh cie zong jaax. Mv baac laengz zingh yiem cing zong jaax nyei ziangh hoc, mbuo buatc Tin-Hungh goux jienv mbuo nyei. Cie waaic mv baac mienh longx nyei.
  5. Mbuo maiv daan yiem maanc sic laengz zingh Tin-Hungh. Dongh wuov norm ziangh hoc mbuo yaac haih ginv guangc mienh zoux dorngc mbuo nyei zuiz nyei. Mbuo zuqc tov Tin-Hungh bun mbuo haih hingh jiex mienv hoic mbuo caux mienh hoic mbuo nyei. Mienv maiv haih hoic mbuo cuotv liuz Tin-Hungh nqoi nzuih (Yopv 1:12; 2:3; Lugaa 22:31). Mbuo maiv hiuv duqv weic haaix nyungc nzunc baav Tin-Hungh bun mienv nyei hungh hoic mbuo. Mv baac naaiv se bun qiangx mbuo ngaengc jienv mienv nyei hungh (Yaagorpc 4:7). Tov Tin-Hungh tengx jienv mbuo, weic Yesu mbuo duqv hingh jiex. Bungx hnyouv Ziouv yiem mbuo buangh zuqc nyei nyungc-nyungc, hnangv mbuo sienx gorngv Ninh liuz leiz nyungc-nyungc (Singx Nzung 23).

### **Ginv Ei Ging-sou nyei eix-leiz:**

1. Mbuo dau mbuo buangh zuqc nyei nyungc-nyungc sic horpc zuqc biux mengh taux mbuo zieqv duqv Ziouv nyei njang-laangc. Baulo nyei maengc mengh nyei, gorngv ninh zieqv duqv Tin-Hungh maiv gunv ninh zuqc wuonx jienv loh, ninh yiem loz zunh kuv fiex (Fi<sup>^</sup>lipv<sup>^</sup>poi 1:14-17). Baulo gorngv nyei waac yaac mengh nyei gorngv, ninh sienx gorngv maiv gunv haaix nyungc sic cuotv daaih yiem ninh nyei maengc ninh oix bun mienh haih hiuv Ziouv, hiuv kuv fiex. Mbuo yaac horpc zuqc maaih naaiv nyungc hnyouv, maiv gunv mbuo mingh maiv gaengh taux.

2. Longc qiangx yiem mbuo buangh zuqc nyei sic nitv fatv Tin-Hungh, oix zuqc buatc Tin-Hungh nyei buoz zoux gong yiem mbuo nyei maengc maiv gunv maaih haaix nyungc sic.
3. Mbuo haih bungx hnyouv Tin-Hungh weic zuqc Tin-Hungh se kaux duqv wuonv nyei gorn-ndoqv. Ninh gunv nyungc-nyungc, Ninh nyei hatc maaz gunv jienv Ninh zeix daaih nyei. "MEIH HAIH BUNGX HNYOUV TIN-HUNGH!" Ninh yietc liuz maiv guangc meih. Se gorngv mbuo bungx hnyouv Tin-Hungh oix zuqc bungx hnyouv nyungc-nyungc, maiv zeiz bungx deix naaiv bungx deix wuov. Mbuo oix zuqc hlo yiem mbuo nyei sienx fim yaac hlo yiem bungx hnyouv Ziouv. Mbuo haih hlo weic mbuo hiuv Ninh, mbuo haih hiuv Ninh weic mbuo doqc ninh nyei waac. Mbuo jaa hiuv Ninh, ziouc bun mbuo jaa haih bungx hnyouv Ninh. Bungx hnyouv nyei gorn-ndoqv se weic zanc-zanc maaih jiu-tong caux Zangc Diex.
4. Mbuo buangh zuqc nyei nyungc-nyungc bun qiangx mbuo hoqc bungx hnyouv Ziouv, bun qiangx mbuo bangc kaux Singx-Lingh nyei qaqv, mbuo cing haih "*Bungx Hnyouv Ziouv.*"



© 2012 Yauzsing tov doqc caux hoqc nyei laanh laanh mienh tengx jienv zorc caux dimv naaiv buonv sou. Se gorngv haaix laanh mienh oix longc gunv dorh mingh aamx cuotv (copy) duqv nyei, se gorngv aamx cuotv daaih weic fu-sux Tin-Hungh. Tov Tin-Hungh njaaux mbuo bungx hnyouv Ninh.

**For additional resources/Maaih sou caux doz yiem:**

[www.yauzsing.wordpress.com](http://www.yauzsing.wordpress.com)